

EPIMELO YA MOTO

OYO ABONGI BE



Natondi yo, Ndeko Neville. Nkolo apambola yo.

Ezali malamu kozala lisusu na mongombo na ntongo oyo. “Mbote” mingi na bino nyonso. Pe na tii motema ete ekozala mokolo monene mpo na biso nyonso, li—Liboso na Nkolo na biso. Pe sikawa, nazali na liteya moko na ntongo oyo. Nalingi koleka mbala moko na liteya yango, mpo ezali . . . nabanzi ete ezali na motuya. Pe ezali . . . Pe mpo bato bátungisama mingi te, boyebi, kowumela ntango molai, bato mingi batelemi. Nakokota mbala moko na liteya.

² Pe sikawa, na mpokwa ya lelo, nalingi kosolola likolo na liteya oyo ya *Mokambi Ya Bomoi Na Ngai*. Pe nákolikia ete mingi oyo bakoki, baoyo nyonso bakokoka, bakoza wana na ntango yango, mpo na mpokwa ya lelo. Ata bongo, soki ozali na losambo na yo, biso tozali . . . na ntembe te, tolingi ete ózala na—na losambo na yo. Yango nde lotómo na yo, kozala kuna, na esika na yo ya mosala, kotika mwinda na yo éngenga.

³ Sikawa, tozali kaka kolikia ete, ngonga nyonso bokoya lisusu, tokozala na esika ya mwa monene koleka awa. Kasi tozali na kokoso na ntina na yango, oh, bipai nyonso. Likita ya bayangeli misolo, na ntembe te, bameki na ndenge nyonso. Pe batindi yango na esika moko, bandimi yango; na sima batindi yango na esika mosusu, pe baboyi yango. Pe batindi yango lisusu, pe bandimi yango *awa*, pe bazongisi yango. Oh, tolekisaki ntango moko ya matata! Kasi, boyebi, Satana abundisaka ntango nyonso makambo ya malamumu. Bóbosana te, bozalaka ntango nyonso na elonga mpo na . . .

⁴ Nazalaki komituna soki ozalaki wapi, Anthony. Namoni ete okutanaki na tata na yo. Pe nabwakaki miso, na liyangani. Alobaki ete ofandaki kuna. Tozali na esengo ya koyamba yo ná tata na yo awa elonga na biso, Ndeko Milano ya New York. Nazali na elikia, ntango nakosala mobembo na mikili mosusu mbala oyo, ete nakobimela lisusu, longwa na New York, na esika moko boye kuna, soki Nkolo alingi.

⁵ Na bongo tozali na esengo mingi mpo na moko na moko na bino. Ezali—ezali malamumu mpo na bino kozala awa.

⁶ Pe tolekisaki ntango malamumu mpenza lobi na mpokwa, to tóloba ngai nde. Nazalaki na . . . [Losambo balobi: “Amen.”—N.D.E.] “Yisaya kati na tempelo.” Na bongo bino . . .

⁷ Pe na ntongo oyo, tolingi kosolola likolo na liteya oyo, to kolakisa nde, soki tokokoka: “Kotonga Mongombo ya bomoi; kotonga mo—kotonga Mongombo ya bomoi, efandelo ya Nzambe na bomoi, Moto oyo abongi be; Mongombo ya bomoi ya Nzambe na bomoi, esika oyo Ye afandaka.” Pe soki. . .

⁸ Nasosoli ete bazali na ba-nzembo ya malamau awa. Nazuaka libaku ya koyoka yango te. Pe na mpokwa ya lelo, nakomeka koya awa. Mwasi na ngai ayebisaki ngai mpo na Ndeko Ungren, nakanisi nkombo na ye yango wana, oyo auti na—na Tennessee. Sikawa, azalaki awa lobi na mpokwa. Nazali komona ye te na ntongo oyo, kasi nabanzi ete azali awa na esika moko boye. Pe nakosepela koyoka ye koyemba na mpokwa, soki nakokoka, to *Akitaki Uta Na Nkembo Na Ye*, to *Yo Ozali Mpenza Monene*. Nakosepela koyoka yango. Bato boni bakosepela koyoka Ndeko Ungren koyemba? [Losambo balobi: “Amen.”—N.D.E.] Oh, na—nalingaka koyemba ya malamau. Pe Meda alobaki ete azali na mongongo ya mwa bariton. Pe ezali kokanisela ngai Ndeko na biso Baxter; azali pe moyembi, ndenge biso nyonso toyebi. *Akitaki Uta Na Nkembo Na Ye*, to *Yo Ozali Mpenza Monene*. Nakanisi nayebi esika azali sikawa, na. . .Ekozala malamau, Ndeko Ungren, kosala yango na mpokwa, soki olingi, soki okozala naino awa? Okotikala, to okomeka kozela liyangani ya mpokwa? Ee, na—na. . .Ee, te. . .nalobi boye, olobi boni mpo na oyo, soki to. . .Nalingi kotungisa moto moko te. Kasi, na bongo, mpo na nini te, soki tokokoka, kosala yango na ntango ya *Bilembo Nsambo*, ntango tokoteya yango, soki okoya. Nakosepela kotia yango na bande, bomoni, kokamata yango, *Yo Ozali Mpenza Monene*, pe, lisusu, *Akitaki Uta Na Nkembo Na Ye*, na ntango wana.

⁹ Oh, kosalela Nkolo ezali malamau mingi, boye te? [Losambo balobi: “Amen.”—N.D.E.] Nayebi te nalingaki kosala nini, soki názalaka Moklisto te! . . .? . . .Ezali mpenza malamau mingi kozala Moklisto. Nayoki mposa ya kopumbwa-pumbwa pe kogánga, na mongongo makasi mpenza. Kozala Moklisto, bókanisa yango naino, kokangama mobimba kati na Klisto!

¹⁰ Nayebi ete natángaka nkombo ya mobali oyo mabe mbala nyonso. Ezali to S.T. to T.S., to eloko moko ya ndenge wana. Sumners, Ndeko Sumner. Ye. . .Nalingi kotónda ye ná mwasi na ye molingami. Nakanisi ete ezuaki mwasi na ye sanza soki, penepene, soki motoba, mpo na kobeta *Bileko Nsambo Ya Lingomba* na masini. Pe sikawa tozali na yango awa mobimba, ebetami na masini, ebelemi mpo bátala yango malamau, pe bápesa yango lolenge ya buku: *Bileko Nsambo Ya Lingomba*. Ndeko mwasi Sumner, ózala wapi, na ntembe te okotika biso tófuta yo mpo na yango. Yango, yango ezuaki mpenza mosala mingi. Ee, ezali monene boye. Ekozua ngai pene na sanza motoba mpo na kosilisa kotánga yango, wana etali ata te kokoma yango uta na bande, na sima kobandela yango mpo na kolongola bisika

oyo ézongeli maloba, pe kokómisa yango buku. Tokobongisa yango pe tokotinda yango mbala moko na imprimerie, mpamba te tokanisi ezali eloko oyo bato basengeli kozala na yango sikawa, mpo bákoka koyekola yango. Pe Billy azalaki kolakisa ngai, ntango nakotaki kuna na sima, kala mingi te, ete—ete—ete ezalaki—ebelemi sikawa mpo ékende na imprimerie. Boye, ndeko mwasi, losambo ekofuta yo mpo na yango. Nalingi te ete ósala yango ofelé. Pe—pe to biso . . . Soki tozui buku yango pe esengeli ete topesa ntalo na yango, to eloko moko boye, tokotia ntalo na lolenge ete ózua eloko moko ntango bakoteka yango, ézala ata boni. Yo solola bobele na likita, likita ya bayangeli misolo, to na moko na bango, pe bakotala likambo yango mpo na yo. Nkolo apambola yo mingi mpenza.

¹¹ Mibangé Ndeko mobali pe Ndeko mwasi Kidd oyo bafandi awa, bazali na mibu pene na monkama, etikali moke mpenza. Pe nakutanaki na ndeko mwasi kala mingi te, pe alobaki: “Ee, oyo ekozala ntango mosusu mbala na ngai ya suka ya komonana na yo, Ndeko Billy.” Alobaki: “Nakómi mpenza mobange.”

¹² Nalobaki: “Oh! la la! Nalingi koyoka bino koloba bongo te. Bozali mpenza lokola mama ná papa oyo bakóli.” Tolingi Ndeko mobali ná Ndeko mwasi Kidd. Bisó nyonso mpenza. Pe yango . . .

¹³ Esalaka ngai eloko moko boye ntango namonaka bango kokota na losambo, mwasi ná mobali oyo bakóli ndenge wana. Pe bókanisa naino, babandaki koteya Nsango Malamu liboso ngai nábotama. Pe nakómi mokolo. Iyo, bókanisa naino, bazalaki koteya liboso nábotama. Pe ngai oyo sikawa, nabandi kokanisa ete nabandi kokóma mpenza mobange. Nakomaka kokanisa ete nakómi mpenza pene na kotika mosala. Nakomona Ndeko mobali pe Ndeko mwasi Kidd bákokota: “Nkembo na Nzambe! Aleluia!” Nakoloba: “Te, nazali malamú.” Iyo, mesie. Komona bango, ndenge bákokoka, ndenge na bango epesaka mpenza mpemela!

¹⁴ Bongo bómona ete bango, bakomi pene na mibu na ngai, mbala mibale, kasi bazali kaka kokoba na elanga. Bayaki na ntongo oyo kosenga babuku, soki bakokaki kozua babuku mpo na koteka yango. Bazalaki na mposa ya ba-bande, mpo bakende, kolónge milimo na nzela na koyokisa ba-bande yango, bazali na mibu pene na monkama. Sikawa, wapi “mapapu mibale” na bino, oyo tozalaki kolobela lobi na mpokwa? Iyo. Nabandaki kokanisa: “Oyo ya ngai ezali wapi?” ntango alobaki yango—yango lobi. Ozali na mibu boni, Ndeko mwasi Kidd? [Ndeko mwasi Kidd alobi: “Ntuku mwambe na moko.”—N.D.E.] Ntuku mwambe na moko. Ozali na mibu boni, Ndeko Tom? [Ndeko mobali Kidd alobi: “Ntuku mwambe na mibale.”] Mibu ntuku mwambe na moko pe ntuku mwambe na mibale, pe bazali kaka kosalela mapapu na bango, kati na mosala, bazali kaka kokoba.

¹⁵ Soki likambo moko ya mabe esalemi na Ohio, oyo Ndeko

mwasi Kidd ayebi, telefone ekoleda epai na ngai. Mokolo mosusu wana, atelefonaki, pe bebé moko, bebé moko ya mwasi, nabanzi, abotamaki, pe misopo na ye ezalaki libanda. [Ndeko mwasi Kidd alobi: “Vésicule.”—N.D.E.] Vésicule, ezalaki libanda ya bebé yango. Pe monganga ayebaki te eloko ya kosala mpo na yango, azalaki kobanga kosala lipasó. Tobondelaki. [“Asalaki lipasó, Ndeko Branham, pe azongisaki yango, mpo, balobaki: ‘Akoki kobika te.’ Pe bazongisaki bobele misopo na ye na kati.”] Azongisaki misopo na kati, na nzela na lipasó, pe bakanisaki ete akokoka kobika te. Kasi abikaki mpenza. [“Nzela ezalaki te.”] Na bongo nzela ezalaki te mpo—mpo na . . . uta na suka ya mosopo, mpo bilei éleka. Pe Ndeko mwasi Kidd abengaki lisusu. Tobondelaki lisusu, pe sikawa nzela ezali polele. Pe ye oyo, lokola motatoli; ná monganga, pe. Bomoni? Ezali litatoli ete Nkolo Yesu, azali Mokeli monene! Bomoni likambo Satana alukaki kosala? Kolongola bomoi ya bebé wana. Na bongo, bomoni, na bongo nandimi ete mwasi yango andimeli Nkolo. [“Azongeli Nkolo, kaka na ndako na ngai.”] Azongeli Nkolo. Ndeko mwasi Kidd nde akambaki ye lisusu epai na Klisto, sima na likamwisi monene oyo esalamaki mpo na bebé na ye.

¹⁶ Babengaki ngai na Californie, lobi, ndeko moko elenge motei ya kuna, oyo nazalaki na ye elongo ntango nakendáká mbala ya liboso na Californie, eleki mibu ebele. Nkoko na ye ya mobali abotamaki ná—ná ba-valve minei . . . misato na motema na ye ya kokangama. Pe nayebisaki ye likambo yango. Nalobaki: “Nzambe oyo akoki kokela eloko mosusu, pe kobongisa yango, akoki pe kobikisa nkoko na yo.” Yebisa bobele mwana na yo ete ázala na mpiko.

¹⁷ Pe mwana mobali yango azalaki na liyangani ntango nazalaki na Californie mbala ya liboso, eleki mibu zomi na mwambe sikawa, esalemaki eleki mibu zomi na motoba. Nazalaki na Californie. Pe azalak- . . . Liyangani yango esimbaki mpenza motema ya mwana mobali yango na lolenge ete . . . Ntango bazuaki bebé yango, ete abotamaki, bamonaki ete eloko moko ezalaki malamau te, azalaki komonana bleu, pe bamekaki kopesa ye oxygène, pe bongo na bongo. Pe emonanaki lokola ete akobika te, na bongo minganga batalaki ye, pe bamonaki ete ba-valve misato ezalaki ya kokangama na motema na ye. Ata nzela moke ezalaki te, bomoni, kaka—kaka valve moko nde ezalaki kosala. Abengaki papa na ye, pe alobaki: “Papa, benga Ndeko Branham, sika-sikawa. Yebisa ye ete nyonso . . . ‘Asenga epai na Klisto. Akosala yango.’” Yango mpenza. Oh! la la! Bokúmi wana, oyo bamonaka, bomoni, tolobelaki yango, lobi na mpokwa. Eloko oyo elongobani na ntango oyo elongobani.

¹⁸ Ee, soki tokobi koloba, tokokóta na liteya ata moke te, boye te? Ezali lokola súpu ya melasse na ntongo moko ya malili, oyo ya kilo mpenza, boyebi, pe ya kokangama mpenza. Tozali na esengo mingi ya kozala na bondeko ya ndenge wana. Iyo, misie.

¹⁹ Na boye tófanda kimia, sikawa, pe tóleka na liteya sikawa. Ntango mosusu nako. . . Nayebi te soki bozali komona yango to te, na tableau. Ntango mosusu soki nabaloli yango *boye*, sima na mwa ntango, ee, tokokoka, sikawa, bamosusu kati na bino, ya. . . [Ndeko Edgar “Doc” Branham alobi: “Olingi totia mwinda likolo na yango?”—N.D.E.] Olobi nini? [“Olingi ete mwinda ézala likolo na yango?”] Te, nabanzi te, sikawa te, Doc. Ntango mosusu sima na mwa ntango. [“Na nse mpenza, nakoki kotia mwinda likolo na yango.”] Ee, toko—tokosala yango ntango nakozua mwa. . . Ozali na mwinda awa? Malamu. Tobalola yango na ngámbo na yango. Kuna na suka, bozali komona? Bozali komona? Soki bozali komona, tombola loboko, soki bozali komona tableau oyo, soki bokoki kotánga oyo ekomami likolo na yango. Te. Malamu. Zua mwinda yango. Sikawa, wana bazali kobongisa yango. . .

²⁰ Nazali kobanda sima na ntango na ntongo oyo; to, te, te, pene na miníti zomi na mitano liboso na ntango. Pe boye, na bongo, tokozua mpenza ntango na biso sikawa, mpo tolingi kokende mbangu-mbangu te. Soki okei mbangu-mbangu, okobebisa makambo olingaki koloba. Sikawa, nazalaki kolanda bande, mokolo mosusu wana, ndenge nayebisaki bino, pe namiyokelaki mpenza nsoni; mpo na oyo nazalaki koloba te, kasi ndenge nazalaki koloba yango noki-noki mpenza, pe elobeli ya mongongo moko ya likolo. Nayoki mposa ya kozela. Yango. . .

²¹ Na—namonaki mokolo mosusu wana esika balingaki kotonga zoo ya monene, awa na katikati ya Louisville. Pe Mesie Brown, nakanisi ezalaki ye, kuna, nde apesaki milió moko ya dollar mpo na zoo yango. Ee, soki názalaka na yango, nalingaki mpenza kopesa bango yango mpo bátika banyama yango na bonsomi. Na—nandimaka makambo ya kokanga banyama na kati ya bandako ya mike ndenge wana te. Na. . . Nakendeke na zoo, pe namonaka banyama wana, ba-ngombolo, ba-nkosi, ná banyama mosusu, bazali kokende-kozonga, bakangami na bolóko mpo na bomoi na bango mobimba, bomoni. Esalaka mpasi. Sima na nyonso, bakangami na nzela na mayele ya moto oyo aleki bango na mayele mpenza. Bomoni? Bakokanga bango pe bakotia bango na boloko.

²² Pe nakanisaka na ntina na yango: zaboló nde asalaka bongo. Azuaka bato ya motuya oyo basengelaki kotambola na bonsomi na bisika minene ya Nzambe, na bitando, pe—pe na makambo ya ndenge wana, na sima atii ye na bolóko ya ebongiseli moko, to ya endimeli moko, to ya eloko mosusu, pe akangi ye kuna na kati. Ezali mpenza likambo ya nsomo.

²³ Pe nalingaka ba-zoo te. Kasi namiyokaka lokola moko na banyama wana, na ntango otiami mpenza na kati ya ekangelo pe ozali koluka komikangola, boyebi, mpo—mpo na kobima pe kosala eloko moko.

24 Sikawa, liboso ete tóbelema na Liloba, tóbelema na Mokóló Liloba, wana togumbi mitó sikawa mpo na kobondela.

25 Tata na biso ya boboto na Likolo, tosangani na ntongo oyo lisusu na Nkombo ya Nkolo Yesu, Mwana na Yo ya motuya. Nzambe, oyo alati nzoto, ayaki na mokili, mpo na kolongola masumu na biso, pe akufaki, Moyengebeni; mpo biso, na nzela na boyengebeni na Ye, lokola bazangi boyengebeni, tókoka kobonga be kati na Ye. Toyei pe toyamboli ete tobongi te, Nkolo. Eloko moko ya malamú ezali te ná biso. Pe biso nyonso tozali kati na bolóko monene moko. Etali te na litúmu nini totelemeli, biso nyonso tozali kaka kati na bolóko. Moko akoki kosunga mosusu te. Kasi, Nzambe, na mawa na Ye oyo ezangi suka, akitaki pe afungolaki bikuke ya bolóko, mpo na kosikola biso. Sikawa, tokangami lisusu na kati na ekangelo te. Tozali kati na zoo ya mokili te, kasi sikawa tozali nsomi. Tobimi libanda.

26 Oh, ndenge mpenza tolingi Ye mingi pe tokumbameli Ye! Tokoki mpenza kotambola na bitando minene ya bilaka na Ye, pe komona yango kotalisama polele liboso na biso! Na miso na biso moko, komona Nzambe monene ya Seko, komizipola Ye moko liboso na biso, pe komitalisa Ye moko mpenza, ndenge Asalaki na basakoli ya kala. Koyeba oyo ete bazali kopema na elikia, ete mokolo moko tokozongisama lisusu, sima na bomoi oyo kosila, na mokolo ya lisekwa, na Bomoi ya Seko oyo ekolimwáká ata mote te. Ba-nzoto na biso ekonuna te. Pe tokokufáká te. Pe tokoyokáká nzala te. Pe tokozaláká na bosenga te. Kasi tokotambola elongo na Ye. Tolingi koyoka Ye koloba: “Kota na bisengo ya Nkolo, oyo esila kobongisama mpo na yo banda kozalisama ya mokili.” Kala, liboso ete lisumu ékota, Asilaki kobongisa makambo, ndakisa lokola Adama ná Eva, ete batikálá kozala na ntina ya kozala na bokono te to kozua kokoso moko. Pe sikawa, Abongisi yango mpo na biso, pe Ayebaki liboso ete tozalaki koya. Lisumu nde ezalaki epekiseli monene, kasi sikawa, lisumu esili kolongolama, na Makila na Yesu. Sikawa, tozali kokende na Mboka ya elaka, na nzela na elaka ya Nzambe, oyo ezali Seko.

27 Pambola biso sikawa, Tata, wana tozali koyekola Liloba na Yo. Tolingi koyeba lolenge ya bato oyo tosengeli kozala, mpo na kozala Kuna. Sunga biso lelo na eteyelo oyo, mpo tokoka kozala na Nkolo Molakisi monene elongo na biso, Molimo Mosantu, oyo Akokita mpo na komimonisa Ye moko epai na biso, na nzela ya Liloba na Ye. Mpo tosengei yango na Nkombo na Ye pe mpo na nkembo na Ye. Amen.

28 Sikawa, liboso, nalingi ete bózua elongo na ngai Petelo ya Mibale, mokapo ya 1. Nalingi kotángá eteni ya Likomi oyo, Petelo ya Mibale, mokapo ya 1. Sikawa mpo na bino baoyo bozali na bikomeli ná lokasa . . .

29 Pe nakanisi bayebisaki ngai na ntongo oyo ete—ete ngonga

mosusu, soki nabaloli motó mosika na wana, maloba eyokanaka malamu te na bande. Nasalaka yango na nko te. Nakanisi ete mokolo moko, tokoluka kosomba micró oyo—oyo esalaka na ngámbo nyonso, pe kodiémbisa yango awa uta na plafond. Na bongo, ata soki ozali wapi, ekosala malamumu. Ekozala malamumu mpenza, zinga-zinga na yango, kaka micró moko na plafond.

³⁰ Pe sikawa, wana nazali koloba, pe soki bozali na mposa na yango, sima na liyangani, bokoki koyema likambo oyo awa. Lisusu, nazali na oyo ebetami na masini awa. Nakozua mwa tonga pe nakotia yango awa na liboso, soki bokolinga kosala yango na ntango moko. Bóya na ntango malamumu sima na nzánga ya lelo, mpo tókoka kososola yango.

³¹ Sikawa, tozali kobeleva na *Bilembo Nsambo*. Touti kosilisa *Bileko Nsambo Ya Lingomba*. Pe oyo ezali Liteya moko ya malakisi, oyo ekangaka moto na kati, moto oyo akosikolama na nzela na Makila ya Nkolo Yesu, pe oyo akozala kati na eleko ya Lingomba wana, na eleko ya Lingomba ya Seko, na suka ya Bilembo. Sikawa toyebi ete tozali na Kelelo Nsambo, Malozi Nsambo, Mbeki, pe bongo na bongo, oyo tokolobela, wana tozali kokende liboso. Kasi tozali kozela koyeisama monene ya esika oyo mpo bato bákoka kofanda.

³² Sikawa, nakanisaki ete likambo oyo ekotambola mpenza elongo na oyo nazalaki kozela. Nayebaki te ete nakoyema likambo oyo, kasi mokolo mosusu wana, nazalaki elongo na baike ya baninga na ngai ya motuya, ba-Cox, kuna na Kentucky. Nakendeki kuna, nakanisaki, ntango mosusu, ete nazua mokolo moko lisusu mpo na bokila ya biséndé, liboso ete eleko na yango ésila. Pe nazalaki kuna na zamba elongo na moninga na ngai Charlie, oyo azali awa, ná Rodney, ndeko na ye ya mobali. Namonaki ata eséndé moko te. Nakanisi nabangisaki bango nyonso pe bakimaki, ntango nabandaki koganga kuna na zamba. Likambo ekomelaki ngai yango oyo, baninga, pe—pe Ndeko mwasi Nellie ná Margie, ntango nayebisaki bino ete nakoyebisa bino yango mokolo ya lomingo, ntango nakolobela yango. Yango nde ekomelaki ngai, mpo na liteya oyo nalingaki koteya. Pe ndenge nyonso oyo etikali etambolaki elongo na yango mpenza! Pe, oh, ndenge nalingaka bongo. Nazalaki na—mpenza na—mpenza na molimo ya koganga, kuna na zamba.

³³ Boye sikawa, tótanga sikawa, Petelo ya Liboso, to . . . Petelo ya Mibale nde, mokapo ya 1, eteni na Yango.

Ngai Simona Petelo, moombo pe ntoma na Yesu Klisto, nazali kokomela bango basili kozua likabo lolenge moko na biso kati na boyengebeni na Nzambe na biso pe Mobikisi Yesu Klisto:

³⁴ Nasepeli na ndenge elobami wana, mpo liteya na ngai mobimba ya ntongo oyo etongami likolo na kondima. Bomoni? Tika nátanga yango lisusu. Boyoka na bokebi.

Ngai Simona Petelo, moombo pe ntoma na Yesu Klisto, nazali kokomela bango basili bazui—kozua likabo lolenge moko. . .kati na boyengebeni na Nzambe na biso. . .Mobikisi pe Yesu Klisto:

35 Bótala, azali koloba, ete: “Nasili kozua kondima oyo, pe nazali kokoma oyo na baoyo basili kozua kondima ya motuya lolenge moko.” Nalingi. . .Ezali mpo na bato ya libanda te. Oyo ezali mpo na Lingomba, bomoni, baoyo bazali kati na Klisto.

Ngolu ezala na bino pe kimia eyikana kati na boyebi na Nzambe, pe (kati na) ya Yesu Klisto Nkolo na biso,

Nguya na ye Nzambe esili kopesa biso biloko nyonso. . . nguya na ye Nzambe esili kopesa biso sikawa biloko nyonso bikoki na bomoi. . .kosambela Nzambe, mpo na boyebi na oyo abiangi biso na nkembo pe na malamumu na ye mpenza:

Na yango pe asili kotiela biso. . .asili kotiela biso bilaka minene pe na motuya mingi, na ntina ete (bilaka oyo) tozua likabo kati na lolenge na Nzambe, . . .

36 Sikawa, bótika yango ekota na bozindo mpenza. Na ntongo oyo, nazali koteya te; tozali bobele kolakisa liteya oyo. “Lolenge na Nzambe.” Botika nátanga lisusu molongo ya 4 sikawa, mpo bozanga yango te. “Na yango pe asili kotiela biso. . .”

Na yango pe asili kotiela biso bilaka minene pe na motuya mingi, na ntina ete (na bilaka yango) tozua likabo kati na lolenge na Nzambe, pe tokima libebi lizali kati na mokili mpo na mposa mabe.

37 Bomoni, “mokili,” tosili kokima yango sikawa. Azali kokoma yango na Lingomba. Yango wana nde tosangani awa na ntongo oyo, ezali mpo tóyeba nzela nini, makambo nini Nzambe asengi. Moto moko te azali awa, oyo alingi Nzambe, bongo ázanga kozala—kozala na mposa makasi ya kokóma lokola Klisto. Sikawa, etalisami polele awa. Moklisto nyonso! Ngai naúmeli na mosala oyo. Bótala Ndeko mobali pe Ndeko mwasi Kidd, awa, na ntembe te, bango nde bakoki kozala na mibu mingi koleka na esika oyo. Kasi soki natuni bango: “Mposa ya mitema na bino ezali nini?” Ekozala: “Kobelema pene na Nzambe koleka.” Na ntango ozali koyeba makambo ya Klisto, Azalaka na eloko moko boye ya bolingo mingi, na lolenge ete okoluka mpenza kokota kati na Ye na mbala moko.

38 Bólimbisa ngai mpo na maloba oyo. Nayebisaki mwasi na ngai, awa kala mingi te, ye. . .bisu nyonso mibale tobandi kokóma mibangé, pe nalobaki na ye, nalobaki: “Olingaka ngai ndenge ozaláká kolinga ngai?”

Alobaki: “Na ntembe te.”

39 Pe nalobaki: “Oyebi, nalingi yo mingi mpenza na lolenge ete nakolinga kozua yo pe kobenda yo kati na ngai, mpo tókóma bobele, mpenza, tókóma moto moko koleka.”

40 Sikawa, oyo wana, yikanisa yango mbala milió monkama, nde okomona ndenge mondimi, oyo alingi mpenza Klisto, azalaka na mposa ya kokota kati na Ye, mpo ezali bolingo nde. Pe awa, Akolakisa biso ndenge nini, na nzela na bilaka oyo, tokoki kozala bazui likabo na lolenge na Bonzambe ya Klisto. Na nzoto ya kufa oyo, ndenge oyo tokoki kozala bazui likabo na yango.

41 Nakoki koloba likambo moko awa. Ntina oyo ngai nandimaka. . . Sikawa, moto moko asósolaki ngai mabe, awa kala mingi te. Nazuaki mokanda moko kouta na lisanga ya batei, oyo elobaki ete ngai nandimaka ete ezalaka na. . . “Tobalanaka na moto oyo tokokani na molimo. Pe ete tosengeli kokabwana na balóngani na biso, soki tokokani te na molimo, mpo na kobala molóngani mosusu, oyo tokokani na ye na molimo.” Oh! la la!

42 Nalobaki: “Lipengwa ya ndenge wana, ngai nakweisami na yango te.” Natelemelaka yango ntango nyonso. Ngai—ngai nandimaka yango te. Ata moke te. Nandimaka ete Nzambe nde apesaka biso molóngani. Ezali solo. Na bongo, tokómaka eteni ya moko na mosusu. Ya solo. Pe liboso ete moto ábala, asengeli kokanisa makambo oyo malamumu, koyekola yango.

43 Elenge mobali moko atunaki ngai mokolo mosusu wana, alobaki: “Ndeko Branham, okanisi ete nakoki, nasengeli kobala elenge mwasi *songolo*?”

Nalobaki: “Okanisaka boni mpenza na ntina na ye?”

Alobaki: “Oh! la la! nalingaka ye mingi.”

Nalobaki: “Ee, soki okokoka kobika te kozanga ye, malamumu óbala ye kasi. Kasi soki okoki kobika kozanga ye, malamumu óbala ye te. Na bongo, kasi, soki yango ekoki koboma yo, malamumu—malamumu ókende liboso pe bóbalana,” nde nalobaki. Na bongo, eloko nazalaki koluka kososolisa ye, ezali ete, soki olingi ye mingi!

44 Na bongo, sikawa, liboso ete bóbalana, nyonso ezalaka malamumu pe kitoko. Kasi sima na bino kobalana, nde ba-mpasi pe mimekano ya bomoi eyaka. Na ntango wana nde bosengeli kolingana makasi, na lolenge ete bokosololana. Soki ye ayokisi yo motema mpasi, to yo oyokisi ye motema mpasi, bokokoba koyokana.

45 Ezali pe bongo ná Klisto. Bomoni? Tosengeli kozala na bolingo mingi mpenza ná Ye, na lolenge ete soki tosengi Ye eloko moko, pe Apesi biso yango te, ekonigingisa biso ata moke te. Bomoni? Bomoni? Mpo na nini? Pe lolenge bobele moko mpo bósalala yango, ezali ya kokoma bazui likabo na lolenge na Ye ya Bonzambe, na ntango wana nde okosolola ntina oyo

Akoki kopesa yo yango te. “Bazui likabo na lolenge na Ye ya Bonzambe.”

⁴⁶ Pe botala awa: “Kokima libebi lizali kati na mokili mpo na mposa mabe.” Tosili kokima yango! Bomoni baoyo yango etali? Etali Lingomba, baoyo bazali kati na Klisto, basili kotombolama likolo na makambo oyo. Ezali te ete amitomboli, kasi Klisto nde atomboli ye.

⁴⁷ Mpo na bandeko na ngai mibali pe basi ya moindo oyo bazali awa na ntongo oyo, nazali koloba likambo oyo mpo na kotungisa te. Kasi, nazalaki na liyangani moko, eleki mwa ntango, nayebi te soki nasila koloba yango na mongombo oyo. Nalobá yango na bisika mingi. Ezalaki na ndeko mwasi moko ya moindo oyo alobaki: “Nakoki kopesa litatoli moko, to kotatola?”

“Na ntembe te, ndeko mwasi, tátola.”

⁴⁸ Alobaki: “Nalingi kopesa litatoli oyo mpo na nkembo na Nzambe.” Alobaki: “Boyebi, na—nazali te oyo nasengelaki kozala,” pe alobaki, “na—nazali te oyo nalingi kozala, kasi,” alobaki, “likambo moko ya solo mpenza ezali ete, nazali te oyo nazaláká.” Bomoni? Autaki na esika moko boye. Asilaki kotombolama.

⁴⁹ Ndenge wana nde toyebaka ete tolongwe na kufa pe tokoti na Bomoi. Totalaka na sima, na libulu oyo tobimisamá na yango. Bomoni? Tozali naino te oyo tolingi kozala; tozali naino ata kutu te oyo tosengelaki kozala; kasi eloko moko ezali oyo tozongisaka matondi mpo na likambo moko, tozali lisusu oyo tozaláká te. Ezali solo. Tozali kokoba kokende.

⁵⁰ “Pe tokimi libebi lizali kati na mokili.” Bokimi yango, mposa mabe pe libebi ya mokili, bozali likolo na yango. Sikawa ezali—sikawa wana nde lolenge ya moto oyo Ye azali kolobela, moto oyo akimi makambo oyo, bomoni, libebi lizali kati na mokili.

*Na ntina oyo mpenza, na kosaláká molende nyonso
ya makasi lokola eyano na likambo yango, bobakisa na
kondima na bino nguya, na nguya na bino boyebi;*

*Na boyebi na bino komipekisa; . . . komipekisa na bino
motema molai; . . . motema molai na bino bosantu;*

*Na bosantu boboto na bandeko; na boboto na bandeko
bolingo.*

⁵¹ Sikawa, Apesi biso awa molongo na makambo tosengeli kosala, koyeba ndenge ya kosala yango. Sikawa, ndenge nalobaki, biso nyonso tozali komeka kobeleva na Nzambe mpenza. Yango wana naponaki Liteya oyo na ntongo oyo, mpo na lingomba, koyeba ete bato bazali kosala mobembo. Mpamba te, lobi na mpokwa, nalobaki: “Bato boni bazali awa, bauti bipai mosusu?” Pene na bato ntuku libwa na mwambe likolo na monkama, bautaki bipai mosusu. “Bato boni bazali awa bauti na ntaka ya kilometre koleka nkama na ntuku mitano?”

Ee, nabanzi ete elekaki ntuku mwambe likolo na monkama. “Bato boni bazali awa bauti na ntaka ya kilometre koleka nkama nsambo?” Pene na—na moko likolo na misato ya bato oyo bazalaki awa bautaki na ntaka ya kilometre koleka nkama na ntuku motoba, nkama mwambe. Bókanisa naino, bato oyo bazali kosala mobembo. Ee, bato yango bayaka na losambo te, ndenge wana, bobele mpo bato bámona bango. Ezali te . . . lokola soki eloko moko ya kitoko nde bato ya libanda bakomona na esika oyo. Bango nyonso bazali bato lokola bato nyonso, babóla, balataka lokola bato nyonso. Ezali te na banzembo kitoko oyo eyembamaka na ba—korale lokola ba—Anjelu, ná ba—orgue ya minene, ná maninísa kitoko ya talatala. Bomonaka mpasi mpo na kozua esika ya kofanda, pe ya kotelema pembeni na etutu. Bayaka mpo na makambo ya ndenge wana te. Kasi bayaka mpo na kati na bango, ezali na eloko moko, oyo emonaka kitoko oyo liso ya bomoto emonaka te. Liso ya molimo nde emonaka kitoko ya Klisto. Yango wana bayaka.

⁵² Boye, mikolo ebele liboso tozala na liyangani, nabondelaka ntango nyonso. Nakendeke na zamba, natiaka na libenga na ngai . . . Nakoyebisa mwasi na ngai: “Nazali kokende bokila ya biséndé na ntongo ya lelo.” Pe nakotia ekomeli pe kayé ya moke na libenga na ngai. Kaka ntango mwa póle oyo okoki komona ebandi koya, efandi ngai pe nayékami na nzete na esika moko boye, ná maboko ya kotombwama, pe nalobi: “Nkolo, násala nini lelo? Okopesa ngai nini mpo na bana Yo?”

⁵³ Na bongo, soki namoni eloko moko oyo esali lokola kopela, eloko moko eyaka bongo. Soki Bozali na Ye ekómi pene, nabandaka koyoka eloko moko lokola na mosika, eloko moko ya boye. “Mibale mbala mibale epesi minei.” Pene koleka, “Mibale mbala mibale epesi minei. Mibale mbala mibale epesi minei. Mibale mbala mibale epesi minei.” [Ndeko Branham azongeli maloba oyo wana azali kobakisa mbangu—N.D.E.] Bongo na bongo na bongo, ndenge wana. Bozali na Ye nde ezali koya.

⁵⁴ Omitiki, pe sima na mwa ntango, omilongoli na yo moko. Emononeli ebandi koya: “Kende esika *boye na boye*, pe likambo *boye na boye*.” Bomoni? Ebandaka na kotia makanisi na yo epai na Nzambe, libanda na mokili, mosika na mokili, kuna na esobe, yo moko.

⁵⁵ Pe Ebandi koya: “Moko, moko . . .” Nalobi, ata motango nini, to eloko nini, eloko moko boye ebandi koya moke-moke, malembe malembe. Na sima, ekómi koya mbangu, mbangu koleka. Ofandi wana pe otomboli maboko, koloba eloko moko te, otomboli kaka maboko likolo. Na mbala moko, bomoto na yo mobimba ememami. Na bongo obandi komona makambo oyo Alingi yo óyeba, kolakisa yo makambo oyo ekoya.

⁵⁶ Mbala mosusu ekomaka na esika moko, kino na esika moko boye, na bongo eteleme. Ekóti na emononeli te. Bongo Makomi

ebandi bobele kosopana elongo. [Ndeko Branham alelisi misapi na ye mbala misato—N.D.E.] Nakokamata ekomeli na ngai, mpo nábosana yango te, pe nakomi yango, nakomi yango.

⁵⁷ Pe soki nazongi na ndako, nakotala yango lisusu, pe nakoyekola yango. Pe ntango mosusu ezalaka ata na molongo te, mpo na ngai, ntango natangaka yango. Na bongo, sima na mwa ntango, tala yango oyo! Ebeti ngai, pe tala yango oyo ebandi lisusu. Na sima, nazui kayé ya moke *boye*, pe nabandi kokoma yango, mbangu-mbangu mpenza, makambo oyo Ayebisi ngai. Nakanisaki: “Nkolo, nakokende na losambo pe nakoyebisa bango. Na . . . ‘Boya.’ Nazali na eloko moko mpo na bango.” Ee, eyaka nde bongo. Ya solo mpenza. Kino Ye ápesa ngai yango liboso, nakoki kopesa yango te.

⁵⁸ Na bongo, ezali likolo na mwa biyemi oyo bomoni ngai nákotala yango. Pe oyo, liboso, nabandaki, nazalaki na eteni oyo te, nazui yango kaka eleki mokolo to mibale, kuna na zamba.

⁵⁹ Sikawa, bato oyo bazali—bazali . . . Petelo azali koloba, awa, ndenge tosengeli kozua likabo ya lolenge na Ye ya Bonzambe. Sikawa, moko moko na biso, tozali koluka kokola kino na epimelo ya Nzambe.

⁶⁰ Sikawa, sima na biso kosilisa ná Bilembo Nsambo, bongo, na ntango wana oyo ya Elembo ya Nsambo ekoyokisama, to kofungwama . . . Na ntembe te, toyebi eloko nini elembo ezali, ezali mpo na kofungola mosala, mpo na kofungola Bilembo Nsambo. Pe tokomona yango kati na liyemi yango. Ezali kofungola Nsango moko, eloko oyo ekangámá.

⁶¹ Lomingo eleki na mpokwa, nateyaki likolo na “Fungóla.” Pe fungóla ezali kondima. Kondima esimbaka fungóla, pe fungóla ezali Likomi. Pe Klisto azali Ekuke. Bomoni? Bongo, kondima ezuaka makambo mike-mike ya Likomi pe efungolaka bankembo pe bolamu ya Nzambe, epai ya bato na Ye. Bomoni? Boye, ezali, kondima nde esimbaka fungóla oyo efungolaka Klisto epai na bato; efungolaka yango, emonisaka yango.

⁶² Boye, lelo, tokomeka kozua fungóla moko wana, mpo na kofungola nzela ya kokóma Moklisto malamau na epimelo ya Nzambe, mpo na kozala Mongombo ya bomoi mpo Nzambe na bomoi áfanda na kati.

⁶³ Bóbosana te, Nzambe amimonisaká na lolenge misato. Mbala ya liboso, Amimonisaki kati na Likonzi na Móto, oyo ebengamaki Botata. Na sima Nzambe moko wana, amimonisaki kati na Yesu Klisto, Amitongelaki nzoto moko, Asalaki nzoto yango. Ya misato, na nzela na liwa ya nzoto yango, Abulisaki Lingomba mpo Áfanda kati na yango. Ezalaki Nzambe likolo na biso; Nzambe elongo na biso; Nzambe kati na biso; Nzambe moko yango.

64 Yango nde ntina oyo ebengamaki Tata, Mwana, Molimo Mosantu. Banzambe misato te; misala misato ya Nzambe moko. Soki bobele bakanisaka yango na Likita ya Nicée, tolingaki kozua mobulu nyonso oyo te, boye te? Ya solo. Banzambe misato te. Bato bakokaki kososola te ndenge Yesu azalaki kosolola na Tata, pe Ye ná Tata bazali Moko. Ee, likambo yango mobimba ezali nde wana. Ya solo, ezipolami. Na ntembe te. Bomoni? Ezali Banzambe misato te. Misala misato nde! Ndenge misato ya ko- . . .

65 Ezali nini? Ezali Nzambe komikitisáká na ekelamo na Ye. Nzambe alingaka basambela Ye. Liloba oyo *Nzambe* elingi koloba “eloko ya kosambela.” Nzambe nde azali koluka kobongisa bato na Ye, mpo Ázua epai na bango ntina oyo Ye akelelaki bango. Asalaki yo te mpo ózala eloko mosusu libanda na mwana mobali pe mwana mwasi ya Nzambe. Soki ozangi yango, kozala mwana mobali pe mwana mwasi ya Nzambe, ozangi kokokisa ntina yango.

66 Pe “kozanga,” liloba oyo *l-i-s-u-m-u* elingi koloba “kozanga kokokisa ntina”, kozanga kokokisa ntina. Na bongo, soki nazali kobeta masasi na eloko moko boye, kobeta yango na katikati mpenza, na metre ntuku minei na motoba, pe nabeti; soki nakitisi mondóki na ngai pe nabeti, kasi lisasi ekei pembeni, na centimetre zomi to zomi na misato, eloko nini esalemi? Mondóki na ngai esengeli kobongisama. Eloko moko ezali kosala malamumu te. Pe soki nazangi kondima Nzambe, soki nazangi kozala Moklisto. . . Nzambe atíá yo awa mpo ózala Moklisto. Soki okei na ngámbo moko, zonga pe bongisámá. Pe eloko ekoki kobongisa yo ezali bobele moko, ezali nde Likomi. Molimo Mosantu kati na Likomi, ekobongisa yo, ekozongisa yo mbala moko na esika oyo osengeli mpenza kobeta. Ya solo.

67 Sikawa tokoyekola Liloba na Ye. Etiene alobaki, na Misala 7, pe lisusu na . . . Tótanga yango naino. (Tozali kolobela, sikawa, tozali kolobela Mongombo ya Nzambe.) Sikawa, Etiene alobaki . . . (Lokola, ekozala Mongombo ya bomoi ya Nzambe na bomoi.) Etiene alobaki, na Misala mokapo ya 7, pe nandimi ete biso . . . na Misala 7, kobanda na molongo ya 44.

Batata na biso bazalaki na hema na litatoli na lisobe, oyo etongamaki pelamoko na motindo Mose amonaki, ye oyo asololaki na ye alobelaki ye kosala yango bongo.

Pe na sima, batata na biso bazalaki, batata na biso bayaki, bamemi yango. . . na Yesu na mokili na mabota oyo Nzambe abangani liboso na batata na biso, ezalaki bongo kino na mokolo na Dawidi.

Ye azuaki bolamu na miso na Nzambe pe asengaki nzela ya kotongela Nzambe na Yakobo esika ya kofanda.

Nzoka nde, Salomo moto atongelaki ye ndako.

Kasi Oyo-aleki-likolo afandaka na bandako etongámá na bato te, ndenge mosakoli alobaki:

Likolo ezali kiti na bokonzi na ngai, pe mabelé ezali etemelo na makolo na ngai: Nkolo alobi ete, bino bokotongela ngai ndako ya motindo nini? Esika nini ekozala epemelo na ngai?

68 Sikawa kati na . . . Sikawa, “mongombo,” na ntembe te, ezali esika oyo tokendeke kopema, sikawa, mpo na kozua mopepe, pe bongo na bongo, lokola kopema oyo tozuaka na mpongi, to nyonso wana. Sikawa, Baebele 10, na molongo ya 5, Polo akotisi likambo yango.

Na bongo, ntango ayaki na mokili, alobaki ete, Mbeka . . . (Ezali Klisto.) . . . Mbeka na kotumba pe makabo olingaki yango te, kasi osili kobongisela ngai nzoto:

69 Sikawa, Mongombo ezali nini? Nzoto, Nzambe afandi kati na mongombo ya Nzoto.

70 Mokolo moko Nzambe, na likolo, ntango Akitaki likolo na ngomba, ata soki ngombe mo—mobali to ngombe mwasi esimbaki ngomba yango, asengelaki kokufa. Nzambe azali búle.

71 Lobi na mpokwa, ntango Banje wana bazipaki bilongi na Bango. Baselafa ya búle ná bilongi ya búle, bayebi ata oyo lisumu ezali te, kasi Basengeli kozipa bilongi na Bango, Liboso na Nzambe; kozipa makolo na Bango, na komikitisa.

72 Sikawa, Nzambe na búle akokaki kondima lisumu te, boye eloko moko te ekokaki kosimba ngomba oyo Nzambe azalaki.

73 Bongo Nzambe akómaki mosuni pe afandaki elongo na biso, na lolenge ya Yesu Klisto, Mwana na Ye, ekelamo na Ye. Bongo Mwana yango apesaki bomoi na Ye, pe cellule ya Makila ya Nzambe epasukaki, mpo Bomoi ébima na Makila yango, éya epai na biso.

74 Na nzela na Makila wana biso topetolami. Pe sikawa makila na biso, bomoi na biso, oyo eyaki na nzela na mposa ya nzoto, ememaki bomoi na biso na mokili. Makila na Yesu Klisto epetoli biso, ebongoli lolenge na biso, na kotindáká Molimo Mosantu likolo na biso; na bongo, tokoti kati na lolenge ya Bonzambe ya Nzambe, na bongo nde tokómi efandelo ya Nzambe. Yesu alobaki: “Na mokolo yango bokoyeba ete Ngai nazali kati na Tata, pe Tata kati na Ngai; Ngai kati na bino, pe bino kati na Ngai.” Bomoni?

75 Bokoyeba ndenge Nzambe yango azali kati na Lingomba na Ye. Lingomba etindami sikawa kozua esika ya Klisto, kokoba mosala na Ye. “Ye oyo akondima Ngai, misala mizali Ngai kosala, akosala yango pe lokola. Sima na ntango moke, bamokili bakomona Ngai lisusu te; nde bino bokomona Ngai, mpo ete

Nakozala elongo na bino, ata kati na bino, kino na suka na mokili.” Bomoni? Yango wana, kokoba mosala na Ye.

⁷⁶ Sikawa, Nzambe, to Biblia nde elobi yango, awa. Etiene alobaki na ntina na Solomo kotonga tempelo: “Oyo-Aleki-Likolo afandaka na ba-tempelo oyo etongami na bato te. ‘Mpo ete Likolo ezali Kiti na Ngai ya bokonzi, pe mabelé ezali esika na Ngai ya kotia makolo. Esika nini ekozala epemelo na Ngai?’ ‘Kasi Osili kobongisela Ngai Nzoto.’” Amen. Yango mpenza.

⁷⁷ “Osili kobongisela Ngai Nzoto.” Nzambe afandaka na epimelo ya moto, Amitalisaka kati na Ezali yango. Kosambela oyo ebongi be! Nzambe kati na biso, lokola Mongombo na Ye, Nzambe komimonisáká. Oh, tokokaki koumela na yango kino bolingaki kozanga mpéma awa, mpo na molunge. Bótala, yango, Nzambe ntango nyonso, na bileko nyonso, Amitalisaka na nzela na moto.

⁷⁸ Ezalaki Nzambe kati na Mose. Bótala ye, abotamaki mokambi; Klisto. Ntango abotamaki, bazalaki konyokola bana, balukaki ye; esalemaki ndenge moko ná Klisto. Pe azalaki—abikisamaki na eleko wana; ndenge moko na Klisto. Azalaki mopesi-mibeko; ndenge moko na Klisto. Mose amataki, mikolo ntuku minei, azuaki mibeko, pe akitaki. Klisto akendeki na biliki, mikolo ntuku minei, pe azongaki alobaki: “Boyoká bato ya kala koloba ete: ‘Okosala ekobo te.’ Nde Ngai nalobi na bino, ye nani akotala mwasi, na mposa mabe, asili kosala na ye ekobo.” Bomoni? Makambo nyonso ya ndenge wana, oyo, Nzambe nde azalaki komitalisa Ye moko.

⁷⁹ Bótala Yosefe, abotamaki muana mobali ya molimo kati na—na bandeko ebele. Bango nyonso bazalaki bato malamumu, bango nyonso batata ya mabota. Kasi, ntango Yosefe ayaki, azalaki ndenge mosusu. Azalaki komona bimononeli, kolimbola ba-ndoto, pe bandeko na ye bayinaki ye mpo na yango. Mpo na mosala mpenza oyo Nzambe atindaki ye kosala na mokili, bandeko na ye bayinaki ye mpo na yango. Bomoni? Pe nyonso wana ezalaki kotalisa ekulusu. Pe, bótala, atekamaki na palata pene na ntuku misato, na bandeko na ye. Abwakamaki na libulu, mpo ákufa, na bandeko na ye. Abimismaki na libulu yango, pe akendeki kofanda na loboko ya mobali ya Falo. Pe moto moko te akokaki kokóma liboso na Falo, oyo azalaki kokonza mokili na eleko yango, moto moko te akokaki kokóma liboso na Falo, soki aleki epai na Yosefe te. Moto moko te akoki kokóma liboso na Nzambe, soki aleki epai na Klisto te. Pe ntango Yosefe azalaki kobima na ndako ya bokonzi, liboso ete ábima, kelelo ezalaki koyula, pe bapoti mbangu bazalaki kokende liboso na ye, na koganga: “Bófukama! Yosefe azali koya!” Ata soki ozalaki wapi, to soki ozalaki kosala nini, to boni mosala na yo ezalaki na motuya; osengelaki kofukama kino ete Yosefe ákóma wana.

⁸⁰ Pe ntango Kelelo ekoyula, moko na mikolo oyo, mabolongu

nyonso ekofukama pe minoko nyonso ekotatola. Ntango Klisto, Yosefe na biso, akotika Nkembo pe akoya, mosala na yo ekozala lisusu na ntina te, na ntango wana. Mabolongo nyonso ekofukama, pe ekotatola ete Azali Mwana na Nzambe. Ya solo.

⁸¹ Oh, tozali mpenza komona Ye kati na Dawidi! Ndenge Dawidi, mokonzi oyo aboyamaki, alongolamaki na ngwende na ye moko, na bandeko na ye, na mwana na ye moko, afandaki likolo na Ngomba ya Olive, wana azalaki komata, likolo na nsongé ya Ngomba ya Olive, abwakaki miso na sima, na Yelusaleme pe alelaki; mpamba te, kuna, bato na ye moko oyo asilaki kosalela pe koteya bango Nzambe, pe bato na ye moko baboyaki ye pe babambaki ye biloko, babwakelaki ye nsói pe batiolaki ye, wana abandaki komata ngomba, pe aboyamaki. Oh, ezali mpenza kotalisa Mwana na Nzambe, mibu nkama mwambe na sima; Mokonzi oyo aboyami, kati na libota na Ye Moko, afandaki likolo na ngomba pe alelaki mpo na Yelusaleme, lokola Mokonzi oyo aboyami.

⁸² Ezalaki nini? Nzambe nde azalaki komitalisa Ye moko kati na basakoli yango, bazalaki kotalisa Klisto.

⁸³ Na sima Moko ayaki, oyo azalaki kobonga be ya Nzambe. Ezalaki Nzambe elongo na biso.

⁸⁴ Pe kobanda ntango wana, Amitalisaka Ye moko kati na Lingomba na Ye, na ngámbo oyo ya Kálvari. Bongo, bomoni, biso nyonso tozali komeka kokóma na efandelo oyo, Mongombo ya Nzambe na bomoi. Sikawa, bato mosusu bazali. . .

⁸⁵ Tomoni awa, alobaki: “Ya liboso, tozali na kondima, nguya, boyébi, komipekisa, motema molai, boboto to bosantu, pe bolingo na bandeko.” Malamu. Boboto na bandeko, na sima bobakisa bolingo. Bótika nátanga yango lisusu, nyonso, mpo boyeba solo ete bososoli yango mpenza, sikoyo. Sikawa tokobanda na molongó ya 5.

Na ntina oyo mpenza, na kosaláká molende nyonso ya makasi lokola eyano na likambo yango, bobakisa na kondima na bino nguya, na nguya na bino boyébi,

Na boyébi na bino komipekisa, na komipekisa na bino motema molai, na motema molai na bino bosantu,

Na bosantu boboto epai na bandeko, na boboto epai na bandeko bolingo, oyo ezali bolingo.

. . . soko makambo oyo mazali kati na bino pe mazali koyikana, makobatela bino ete bozala mpamba te to bozanga kobota mbuma te, mpo na boyebi na Nkolo na biso Yesu Klisto.

⁸⁶ Sikawa, Petelo azali kotalisa biso eloko moko awa, ndenge ya kokóma wana.

⁸⁷ Sikawa, nalingi koloba boye, ete, ezali na bato mosusu oyo bazali na eteni ya nguya oyo, boyébi, bwanya, motema molai,

pe bongo na bongo, oyo bamibengaka ata Baklisto te. Sikawa, biso. . . tozali koteya na eteyelo ya mokolo mwa lomingo. Pe ezali solo. Bato mosusu bazali na eteni ya oyo, oyo bazali ata komizwa lokola Baklisto te. Kasi elakisi te. . . Yango ekosala yango te. Ezali lokola ndeke oyo merle, azali komeka kotia nsala ya ndeke oyo paon na mapapu na ye, mpo ákóma paon. Azali bobele komisambwisa. Malamu átikala na ye merle. Bomoni? Na ntango azali komeka kosala makambo oyo kozanga kozala Moklisto, azali mpenza mobimba libanda ya esika na ye.

⁸⁸ Ezali lokola nzete ya sinapi ezali komeka kobimisa ba-pomme. Ekokoka kosala te, bomoni, atako ezali nzete. Kasi ekoki kobimisa ba-pomme te.

⁸⁹ Ezali lokola mbalata-mpunda azali komeka komisalela nkunza ya mpate, azali komeka kozala mwana-mpate na ntango oyo azali nkunza, to, azali mbalata-mpunda. Bomoni, akoki komisalela nkunza ya mpate te. Akokoka kosala yango te. Nkunza ezali likabo epai na mpate, epai na mbalata-mpunda te. Akoki komeka kosala lokola mpate, kasi azali kaka mbalata-mpunda. Bomoni? Boye, akoloba: “Ee, nakoki kolia lokola mpate. Nakoki kosala likambo *oyo* lokola mpate.” Ata soki okoki kosala nini, mpo na kozala na nkunza, osengeli kozala mpate.

⁹⁰ Nátelema naino awa miníti moke. Mpate amisalelaka nkunza te. Azalaka na nkunza mpo azali mpate. Bato mingi bamekaka koloba: “Ee, nakomeka kokóma moto malamú. Nakomeka kosala likambo *oyo*.” Bómisalela eloko moko te. Te, okokoka kosala yango te. Mpate ezalaka te, esengami na yango te, ezelami te émisalela nkunza. Ebotaka nkunza, pe esalaka yango mpo ezali mpate.

⁹¹ Pe na ntango ozali Moklisto, okobota mbuma ya Molimo. Oko—okomisalela yango te. Okomeka kosala yango te. Okomeka. . . Komikómisa eloko oyo yo ozali te. Kómá bobele oyo osengeli kozala, na sima nde ekobonga yango moko. Bósila koyoka bato koloba: “Ee, nalobi na yo. Ngai. . . Nakótá na lingomba. Na—nasengelaki mpenza kotika lokuta?” Ozali nde komeka komisalela eloko moko, sikawa. Okokoka kosala yango te, na bongo, ntina ya komeka ezali te, ndenge moko na—na mba—na mbalata-mpunda oyo akoki komisalela nkunza te. Akokoka kosala yango te.

⁹² To, engondó oyo azali koluka kolia esika moko na ebenga, engondó azali koluka—engondó azali koluka kokóma ebenga. Okoki kokanisa nzéngó moko kuna, áloba: “Oyebi, ngai nazali ebenga,” pe amitieli mwa ba-nsala, alobi: “Omoni, nakómi lokola. . .” Bomoni? Akozala mpenza kitoko te. Wana ezali mo—moto oyo alobaka ete azali eloko moko, na ntango oyo azali yango te. Bomoni, okoki kosala yango te.

⁹³ Okoki koloba te: “Tala, nasengeli kozala na nguya, boye nakozala na nguya. Nasengeli kobika bomoi ya mosantu, boye

nakozala pe bongo.” Ee, ozali bobele komitiela ba-nsala. Atako ezali pene na yo, kasi okoki kotia ba-nsala na ndeke mosusu te. Bomoni? Ekosimba te. Yango ekotalisa bobele ete ndeke yango azali mokosi. Bomoni? Bokoki kokanisa ndeke nzéngó oyo azali koluka kozua ba-nsala mibale to misato ya ebenga, koloba: “Bótala awa, bomoni, nazali ebenga”? Bomoni? Ee, biso nyonso toyebi ete azali nzéngó. Bomoni? Bomoni? Esili. Toyebi ete azali nzéngó.

⁹⁴ Ee, sikawa nde ndenge ezali, bazali komeka —komekola Boklisto. Bokoki kosala yango te. Likambo ya liboso osengeli kosala, ezali kobotama mbala na mibale. Osengeli kobongwana. Bomoni? Pe na ntango obongwani, okomi ekelamo ya sika. Sikawa obandi kokóma na molongó. Bomoni? Na ntango wana nde ozali na ntina ya komitungisa mpo na ba-nsala te, ekomibongisa yango moko, na ntango—na ntango obotami mbala na mibale. Iyo, misie.

⁹⁵ Ndenge nalobaka ntango nyonso. Soki ozui ngu—ngulu, oniki ye malamumu pe olatisi ye kazaka ya smoking, to kazaka ya smoking, nde, pe otiki ye; akokende komibwaka mbala moko na libulu ya potopoto. Mpamba te, bomoni, ekosunga ata moke te. Azali ngulu. Ezali lolenge na ye. Komibalola na potopoto nde lolenge na ye. Osengeli kobongola lolenge na ye, pe (ye) oyo etikali ekobonga yango moko.

⁹⁶ Sikawa, bótala. Bosengeli kobotama mbala na mibale, elingi koloba, kobongwana. Mbongwana esengeli kosalema.

⁹⁷ Okoloba: “Ee, Ndeko Branham, nayebi mwasi moko awa, ee, asálá likambo moko ya mabe te. Azali mwasi malamumu. To, mobali *songolo-pakala* oyo, azali moto malamumu. Asalaka eloko moko te. Oyebi asalaka bato mabe te.” Yango elakisi eloko moko te. Akoki kozala mozalani malamumu, kasi azali Moklisto te, kino ábotama mbala na mibale.

⁹⁸ Yesu alobaki: “Soko moto akobotama mbala na mibale te,” Yoane 3, ete, “akoki kutu komona Bokonzi te.” Sikawa, yango elingi koloba, *komona*, elingi koloba “kososola.”

⁹⁹ Soki otali likambo moko, olobi: “Nazali mpenza komona yango te.” Olingi nde koloba ete ososoli yango te.

¹⁰⁰ Moto akoki kososola te mpo na nini bato bagangaka. Moto akoki kososola te mpo na nini lokóta ya moto ekoki kobongwana pe alobi monoko na sika. Moto ya mokili akoki komona te ndenge nini nkembo ya Nzambe ekoki kokita na miso ya moto, akomona emononeli pe akoyebisa moto makambo, pe oyo asengeli kosala; koyebisa bango makambo oyo elingi kosalema, pe kobongisa makambo oyo ekosalema, ndenge Nkolo asalaki mpo na biso awa, kutu, lobi na mpokwa. Bomoni? Bomoni? Ma—makanisi ya mokili ekoluka kososola. “Ee, asalaki nini? To, azali kosalela lokuta ya ndenge nini? Azali na mayele mabe nini?” Komona moto azali koloba minoko na sika, bakoloba . . . pe moto

mosusu akolimbola pe ayebisi mpenza na enama moko ya Nzoto likambo oyo asalaki, oyo asengelaki kosala te. Bomoni? Bomoni? Bakanisaka ete ezali eloko moko boye ya lokuta. “Ezali likambo moko bayokani bango na bango.”

¹⁰¹ Bakoki kososola yango te, kino moto yango ábotama mbala ya mibale. Na bongo, ntango abotami mbala ya mibale, nde abelemi mpo na kozala na bondeko na boyokani, mpo akómi ekelamo ya sika. Ezaleli mabe wana ya kala, ya ntembe, oyo azalaki na yango, ekufi. Sikawa, akómi ekelamo ya sika. Na bongo, bomoni, sikawa azali na ntina ya komibakisela eloko te, mpo ekobakisama yango moko.

¹⁰² Bótala, osengeli kobotama mbala ya mibale. Pe na ntango obotami mbala ya mibale, okoki kobotama mbala ya mibale te bongo ózanga kondima. Ya solo. Boye, bomoni, na liyemi na ngai oyo, nazali na mobóko mpenza, kondima ezali mobóko na yango nyonso. “Soko na kondima te, ekoki na kosepelisa Nzambe te. Moto oyo azali kobeleva na Nzambe asengeli kondima ete Ye azali pe ete Azongisaka libonza epai na bango bakolukaka Ye.” Bomoni? Asengeli kozala bongo. Pe, soki otiaka ntembe na Biblia, soki otiaka ntembe ete Liloba ezali solo te, ekozala malamú ete ótikala na sima kino óndima yango liboso.

¹⁰³ Lisumu ezali nini? Kozanga kondima. Makambo ezali bobele mibale oyo ekonza moto. Ezali ntembe to kondima, moko to mosusu. Osimbami na moko oyo ekonza bomoi na yo. Ezali kotala bobele kondima boni ozali na yango, mosanda nini okoki komata.

¹⁰⁴ Kasi, liboso, esengeli ete kondima ézala. Bótika nátelema mwa moke na mobóko wana. Sikawa, kondima ezali oyo osengeli kondima. Kondima ezali oyo . . . “Kondima ezali elendiseli ya makambo oyo tozali kolikia.” Ezali, osili kozua yango na ntango ozali na kondima, mpo emonisami kati na kondima. “Kondima ezali elendiseli ya makambo oyo ókolikia,” Baebele 11, bomoni, “elimbweli.” Ezali nini? Elimbweli ya ndenge nini? Elimbweli ya búle.

¹⁰⁵ Yango wana, soki olobi: “Ndeko Branham, nandimi ete Nzambe azali Mobikisi ya bokono.” Ee, soki ondimi yango, pe na sima oyambi Ye lokola Mobikisi ya bokono na yo, pe okosi te, kasi ondimi mpenza ete na mapipi na Ye obikisami, eloko moko te ekotangola yo na yango. Ezali likambo oyo esili kokatama. Sikawa, okoki kozala na elikia, bobele kopumbwáká likolo na oyo, pe kopumbwáká likolo na oyo kuna. Kasi na ntango ozali na kondima, oyebi yango, mpo ezali elimbweli. Osili kozua yango. Nazalaki . . .

¹⁰⁶ Bato boni, banani balandi Oral Roberts na ntongo oyo, ntango azalaki koteya na ntongo oyo, Oral Roberts? Na—nayokaki ye koloba likambo moko boye, ete kondima moko ezali, oyo ya kokangola, kobondela libondeli ya kondima, ya

kokangola. Alobaki: “Simbamá na nzela na kosimba radio, simbamá na nzela na kosimba eloko moko, mpo ete . . .” Mobali yango azalaki kosala bongo, mpo épesa bato eloko moko oyo bakoki kosimbela. Eloko moko, okoloba: “Nazui yango sikawa, mpo ayebisaki ngai ete násimba radio na ngai. Nazui yango.” Bomoni? Sikawa, ezali malamu. Kasi, sika, kondima ya solosolo ezali na ntina ya kosimba biloko wana te. Sikawa, nazali kokweisa Ndeko Oral te, ata moke te. Azali kosala mosala monene, pe azali moto na bosantu, pe na—nasepelaka mingi na Oral Roberts. Ezali mawa bato lokola ye, tozali na bango mingi te.

¹⁰⁷ Kasi oyo nazali koluka koloba, ezali ete—ete, kondima ezalaka na ntina na eloko moko te. Bomoni? Kondima endimaka Liloba na Nzambe. Mpo kondima eutaka na “kosimba”? Te. “Kondima eutaka na koyoka, pe koyoka Liloba na Nzambe.” Yango nde efandisaka yango. Ezali wana. Bomoni? Pe kondima, ndenge elobamaki, etalaka ntaka te. Kondima ezali nde sika-sikawa. Kondima ezali awa. Ndakisa, soki moto moko azali . . .

¹⁰⁸ Mwa bebé wana, mokolo mosusu. Mama wana oyo Ndeko mwasi Kidd ná bandeko mosusu balobelaki, oyo azalaki na bebé oyo misopo na ye ezalaki libanda, ezalaki na nzela ya kofungwama te na mosomba, mpo na kolekisa bilei. Sikawa, mwasi yango, ntango ayokaki Ndeko mwasi Kidd ná bandeko mosusu kotatola, andimaki, ete soki akokaki kokutana na ngai, nabondela mpo na bebé yango. Sikawa, bomoni, Nzambe apesaka biso bato . . .

¹⁰⁹ Bamosusu na kati na biso babikélá makambo ná Nzambe, oyo ya—ya solo mpenza na lolenge ete Nzambe akómi kaka lokola kokende awa, kaka lokola pe kosolola na Ndeko Neville to na moto moko oyo boyebani. Pe mbala na mbala, tosendaka na bato yango ete bábondela mpo na biso. Yango nde tosendeli kosala. Na bongo, soki tozali na kondima ete mobali to mwasi yango, ézala nani oyo azali kobondela mpo na biso, azali kosolola na Nzambe, na ntango wana kondima na biso esimbami. Ekangi mpenza. Etelemi ngwi.

¹¹⁰ Bótala. Moróma oyo akendeki kokutana na Yesu. Alobaki: “Na—nabongi te ete Ókota na ndako na ngai. Nazali te. Na—nabongi te. Pe na—nazalaki te . . . na—nazali komimona ndenge wana te. Kasi,” alobaki, “mwana na ngai azali kobela makasi. Pe Yo loba bobele Liloba, bomoni, pe mwana na ngai akobika.”

¹¹¹ Ezalaki nini? Ntaka esalaki bokeseni moko te. Bomoni? Mpamba te, Nzambe azali oyo-na-bisika-nyonso. Nzambe azali oyo-na-nguya-nyonso. Pe bisika nyonso Nzambe azali, ya nguya-nyonso ezali wana. Pe Nzambe, lokola azali oyo-na-bisika-nyonso, yango nde esalaka ete Nzambe ázala bisika nyonso, bipai nyonso. Bomoni? Nzambe azali monene ndenge moko na

Allemagne, na Suisse, pe kuna na Afrika, kaka na miníti oyo, ndenge Azali awa. Oh! Yango mpenza.

¹¹² Na bongo, alobaki: “Nabongi te ete Ókota na ndako na ngai. Loba bobele Liloba.” Ezalaki nini? Ezalaki kondima ya Moróma wana. Andimaki yango.

Pe Yesu alobaki: “Kende na yo. Mwana na yo azali na bomoi.”

¹¹³ Pe akendeki, atambolaki mikolo mibale. Pe na mokolo oyo elandaki, liboso ete ákóma na ndako, akutanaki na bayike ya basali na ye oyo bazalaki koya. Pe balobaki: “Mwana na yo azali na bomoi.”

¹¹⁴ Pe Moróma yango asepelaki mingi mpenza, kino ete alobaki: “Na ngonga nini ya mokolo abandaki koyoka malamumu? Na eteni nini ya mokolo?”

Alobaki: “Pene na ngonga ya zomi na moko, abandaki komiyoka malamumu.”

¹¹⁵ Pe Moróma yango ayebaki ete ezalaki mpenza na ngonga yango nde Yesu alobaki: “Mwana na yo azali na bomoi,” pe andimaki. Amen.

¹¹⁶ Oyo-na-nguya-nyonso, oyo-na-bisika-nyonso, oyo-na-boyebi-nyonso, azangi suka, wana ezali Nzambe. Boye, ntango babengaka na telefone pe balobaka: “Bondela!” Bokutani wana! Pe kondima na bino nde ebendaka Nzambe. Yango nde eloko oyo etiaka libondeli ná Nzambe, elongo, kati na mosala. Libondeli! Kondima ebongolaka longwa *awa* kino *awa*. Etiaka yango esika moko.

¹¹⁷ “Loba Liloba. Nyonso oyo nalingi Yo ósala ezali koloba Liloba, pe nyonso ekozala malamumu.” Bomoni, Azalaki na ntina ya kozala kuna te. “Loba bobele Liloba.” Mpo na nini? Nzambe azali oyo-na-bisika-nyonso. Atondi nguya-nyonso. Azali na nguya nyonso ndenge moko na nse ya mokili ndenge pe Azali na likolo ya mokili, to na ngámbo moko to mosusu. Azali Nzambe. “Eloko bobele moko Osengeli kosala ezali bobele koloba Liloba,” alobaki bongo.

¹¹⁸ Na bongo, kondima nde esalaka nyonso oyo etikali. Kondima nde esalaka oyo etikali. Boye, osengeli kozala na kondima lokola mobóko. Boklisto mobimba, nyonso oyo ozali, nyonso oyo okozaláká, etongami likolo na kondima kati na Liloba. Yango wana ngai nandimaka Liloba. Bomoni?

¹¹⁹ Nakoki kotia kondima na ngai likolo na eloko mosusu te. Soki nasengelaki kotia yango likolo na lingomba, nalingaki kotia yango likolo na lingomba nini: Katoliko, Luterien, Metodiste, Batiste, Pantekotiste? Nalingaki kotia yango wapi? Nayebi te. Bango nyonso bakomi yíkí-yiki pe nyonso wana, mbilinga-mbilinga, pe nyonso wana.

¹²⁰ Kasi na ntango natii kondima na ngai na Liloba na Ye, ebwaki lóngo. Moto moko te alimbolaka Yango. Awa Yango

ezali: YANGO ELOBI NKOLO. Boye nandimi Yango. Wana nde Mobóko.

¹²¹ Elenge monganga moko malamumu, awa na engumba, moninga na ngai, Docteur Sam Adair. Tozalaki bana mike elongo. Bino nyonso boyebi Sam. Pe ayebisaki ngai, alobaki: “Bill. . .” Sima ya emononeli wana, nayebisaki ye esika akotonga ndako na ye, ndenge ekozala. Sikawa, bókende kuna, bótuna ye na ntango moko soki yango ezali solo te. Mibu mibale to misato liboso ete ékóma, nayebisaki ye esika ekozala. Nalobaki: “Okozua pene na liboke ya mapango nyonso wana ya engumba.” Pe bobele eloko moko nde etikali kati na ye ná yango, ezali nde centre ya réinsertion wana. Docteur Adair azali na oyo etikali, ná pharmacie. Esili. Docteur Adair akokisaki mpenza emononeli yango. Epai, esika oyo ye alobaki: “Bakoki ata kosimba yango te na mibu ntuku mibale na mitano. Ezali kozela bosámbsi.”

¹²² Nalobaki: “Dokotolo, Nkolo nde apesi yo yango, mpo na komikitisa na yo.”

Alobaki: “Nazali malamumu te.”

¹²³ Nalobaki: “Yo ozali kóbá. Ozali na lomposo ya makasi na libanda, lomposo oyo otalaka baninga na yo na nzela na yango, kasi na kati, ozali mpenza moto malamumu. Bima libanda na lomposo wana.” Nalobaki: “Nzambe nde apesi yo yango.”

¹²⁴ Alobaki: “Natiélá yo naino ntembe te, Billy, kasi nasengeli kotielá oyo wana ntembe.”

Nalobaki: “Kende na biró na yo.” Pe akendekei.

¹²⁵ Na ntongo oyo elandaki, abengaki ngai, alobaki: “Nazali kolenga makasi.”

¹²⁶ Nalobaki: “Likambo nini?” Ezalaki pene na sanza ya nsambo. Nalobaki: “Likambo nini, Doc?”

¹²⁷ Alobaki: “Nasili kosomba esika yango, Billy. Bayanganaki lobi na mpokwa na Boston, pe nasili kosomba esika yango na ntongo oyo.”

Nalobaki: “Nayebisaki yo.”

¹²⁸ Nazalaki kuna mokolo mosusu wana, kosolola na ye, ntango mondóki epanzanaki na elongi na ngai. Alobaki: “Nakanisi ete nasílá koloba yango na bato nkoto oyo bayaka awa, ndenge wana.” Ezali nini? Sikawa, ntango Nzambe alobi likambo moko, esengeli kokokisama.

¹²⁹ Lobi na mpokwa, baninga mosusu bayaki epai na ngai. Bayokaki nsango ya emononeli ya nyama caribou oyo ezalaki na maséké ya metre moko ná ngombolo ya nkunza mbwé. Nayebi te bato boni bayá na ndako, balukaka komona yango. Nalobaki: “Metre ya komeka molai yango oyo. Bómeka maséké yango.” Ayokaki likambo yango liboso ete ésalema. Bomoni? Mpo na

nini? Ntango Nzambe alobi likambo moko, esengeli kokoma. Yango nde ntina, ezali na mobóko.

¹³⁰ Sikawa, mwango ya lobiko yango *oyo*. Na bongo, soki emononeli na Ye ekokisami na kobonga be nyonso, ndenge mpenza elobaki ete ekosalema, pe losambo oyo eyebi ete ezali solo, bongo boni boni mpo na Liloba na Ye? Bomoni? Yango ezali solo mpenza koleka emononeli. Soki emononeli elobi kokokana na Liloba te, boye, emononeli yango ezali lokuta. Kasi Liloba liboso, nde, mpamba te Liloba ezali Nzambe. Bomoni? Boye, Azali oyo-na-bisika-nyonso. Alobaki yango awa, pe Akokisi yango na Canada. Amen. Bomoni, Azali oyo-na-bisika-nyonso. Malamu.

¹³¹ Liboso, osengeli kobotama mbala ya mibale. Na sima soki obotami mbala ya mibale, ozui kondima; ondimi Liloba. Soki obotami naino mbala ya mibale te, okotelemela Yango. Soki ozali bobele moto oyo asambelaka, pe—pe ozali na—na—na mwa boyébi ya bomoto ete osengeli kosala oyo ezali malamumu, okokoka koyokana na Liloba na Nzambe ata moke te. Okokoka kosala yango ata moke te. Osengeli kobotama mbala ya mibale. Pe, kobotama mbala ya mibale, ebotaka kondima. Malamu. Na sima, soki ozui kondima, oyo *awa*, k-o-n-d-i-m-a, kondima, na ntango wana obelemi mpenza mpo na kokola.

¹³² Sikawa, bato mingi bakendeke na etumbelo, babondelaka pe balobaka: “Nkolo, limbisa ngai.” Pe emeko monene ya kobulisama ekitaka likolo na bango, pe nyonso wana. bongo okolekisa ntango moko ya nkembo, otelemi na etumbelo, ókoganga. Ozongi, olobi: “Nzambe apambolama, nazui yango.” Te, obandi nde na esika oyo okoki kokóla. Osali naino eloko moko te. Omoni? Eloko bobele moko osali ezali ete otii mobóko.

¹³³ Sikawa soki olingi kotonga ndako, pe otii mobóko na yo, okoloba: “Eh, natii yango.” Bomoni? Otii nde mobóko mpo na kotonga ndako na yo likolo na yango. Sikawa nde osengeli kotonga ndako.

¹³⁴ Sikawa, wana nde esika likambo oyo tolingi kolobela na ntongo oyo, ekoti. Malamu. Ndako, mobóko nde eloko ya liboso. Mobóko ya Boklisto ezali nini? Kondima kati na Liloba na Nzambe. Yango nde mobóko na yo. Bongo obandi kokola. Na sima obandi, obandi kobakisa na mobóko yango.

¹³⁵ Sikawa, kotonga ndako, okotelemisa makonzi pe nyonso wana. Ndeko Wood, ná bato ya mabaya mosusu pe batongi ndako oyo bazali awa, bakoki koyebisa biso ndenge nini bokoki kotonga ndako. Bomoni? Kasi ngai nakoyebisa bino ndenge nini kotonga ndako na yo ya molimo, esika oyo Nzambe akoki kofanda. Alingi kofanda kati na yo. Alingi kokómisa yo lokola Ye moko. Alingi ete ózala kotalisama, kotalisa, nde, Bozali na Ye.

¹³⁶ Boyebi, na ntango ya kala, ntango bazalaki kopetola wólo, liboso ete bázua etúlelo mpo na kopetola yango na móto,

bazalaka kobeta wólo yango, kobeta mpo na kobimisa bosoto, bibende, motáko pe nyonso wana, bakokoba kobeta, kobalola yango, pe kobeta yango. Ba-Indien basalaka yango téé sikoyo, babetaka wólo, pe babetaka yango. Boyebi ndenge nini bazalaki koyeba ete bibende nyonso, ná bosoto pe mbindo nyonso elongwe? Ntango mobéti wólo akómaki komona elilingi na ye moko, kati na yango, lokola na talatala. Ekómaki peto pe ezalaki lisusu na bosoto te, na lolenge ete ekómaki kotalisa mobéti na yango.

¹³⁷ Ndenge wana nde Nzambe asalaka. Akamataka wólo oyo Azui na mabelé, pe Akobeta yango, na Molimo Mosantu, Akobalola yango, kobalola, kobalola, pe kobeta kobeta kino (Ázua) Ákoka komona elilingi na Ye. [Ndeko Branham abeti maboko mbala ebele ntango ákoloba maloba oyo—N.D.E.]

¹³⁸ Pe yango nde tosengeli kosala, kotalisa Mwana na Nzambe. Na boye tosengeli kosala mosala na Ye. Alobaki: “Ye oyo akondimaka Ngai. . .” Yoane 14:7: “Ye oyo akondimaka Ngai, misala mizali Ngai kosala, akosala yango pe lokola.” Obandi kotalisa misala ya Klisto.

¹³⁹ Kasi mingi mpenza kati na biso balukaka kosala misala ya Klisto liboso ete elilingi ya Klisto ékoma kati na biso. Sikawa Yango nde kokoso. Tozali komona makambo yango kosalema. Boyebi yango. Nayebi yango. Tozali komona bango, bazali kobeta mabaku na nzela. Tozali komona ba-fúlu minene ya batei, ya Baklisto, batondi pembeni na nzela, ezali mpo bakotaki na likambo yango malamú te.

¹⁴⁰ Pe yango wana nazali awa na ntongo oyo, ezali mpo na komeka kolakisa na lingomba moke oyo, pe na ngai moko, ndenge nini tokoki kokóma efandelo ya Nzambe na bomoi. Bato boni balingi kozala yango? [Losambo balobi: “Amen.”—N.D.E.] Efandelo ya Nzambe na bomoi!

¹⁴¹ Sikawa, tala oyo tokosala. Likambo ya liboso ezali nini? Kozala na kondima, pe kobotama mbala na mibale. Yango ezali kotia mobóko.

¹⁴² Na bongo, sima na kotia mobóko, ya mibale, bakisa na mobóko na yo. “Bakisa na kondima na yo,” Petelo alobaki awa. Bakisa na . . . Liboso, ozali na kondima, na sima bakisa nguya na kondima na yo. Oyo ezali likonzi oyo elandi. Liboso, sopa mobóko na yo, kondima. Na sima, na kondima na yo, bakisa nguya.

¹⁴³ Sikawa, wana nde esika ekwesaka mingi kati na biso. Iyo, misie. Iyo. “Bakisa nguya na kondima na yo.” Yango elingi koloba te kobika bomoi ya mongondo, boyebi, lokola mwasi to mobali, pe bongo na bongo. Yango ezali na likambo moko ya kosala ná oyo wana te.

¹⁴⁴ Biblia elobi, totangi awa, na Buku ya Luka, epai wapi Elobi: “Nguya ebimaki kati na Ye.” Boye te? [Losambo balobi:

“Amen.”—N.D.E.] Soki tokozala lokola Ye, na boye, tosengeli kozala na nguya. Tosengeli kozala na yango, mpo na kozala lokola Ye. Loyembo ya liboso oyo natikálá kolinga, na—na banzembo, moko na banzembo ya malamú koleka, ezalaki, *Kozala Lokola Yesu*. Ee, soki nalingi kozala lokola Yesu, nasengeli kozala na nguya, pe nzela oyo yango ekoki kolekela longwa na ngai kino na bato mosusu. Mpamba te, “Nguya ebimaki kati na Ye, pe ekendeke epai na bato.” Nguya! Pe liboso ete ókoka kobimisa yango, osengeli liboso kozala na yango. Soki ozali na yango te, ekobima te. Ezali na eloko moko te ya kobimisa.

145 Bongo soki moto ameki kobimisa nguya kati na biso, kasi chèque ekozonga pe bakomi “ezali na mbongo ya kokoka te”? Bomoni? Te, te, eloko ya kozua kuna ezali te, chèque yango eboyami. Moto moko azali kotala yo lokola Moklisto, pe lobi amoni yo kuna libanda ozali kobika lokola mosumuki, nguya mpenza moko te ekoki kozuama kati na yango. Bomoni? Ya solo.

146 Nguya esengeli kozala kati na biso. Pe kino ete tozua nguya. . . Bongo na ntango tozui nguya ya solo, nde tokoki kobakisa yango na kondima na biso. Yango nde etutú ya mobóko oyo elandi. Sikawa, bosengeli liboso kozala na kondima. Kondima yango moko ekokoka te. Bosengeli. . . Petelo alobaki: “Na sima, bobakisa nguya na kondima na bino.” Bosengeli kozala na nguya, mpo na kobakisa yango na kondima na bino.

147 Sikawa, na bongo, ekoki kozala ete, ntina oyo bozangi yango, ezali mpo mangomba mingi ya lelo ezali koteya ete otindami kozala na yango te, to ntango na yango esilá koleka. “Batindami kozala na yango te. Likambo bobele moko oyo osengeli kosala ezali kaka kokota na lingomba. Iyo, ntango yango esilá koleka.”

148 Nguya, moto nyonso ayebi nini liloba oyo nguya elingi koloba, bomoni, pe tosengeli kozala na yango. Soki nguya ebimaki kati na Ye, mpo na kobikisa mwasi oyo azalaki na bokono, Azali kotalela nguya yango moko kati na Lingomba na Ye, mpo Ye azalaki ndakisa na biso. Pe soki Ye azalaki na nguya ya kopesa epai na bato, Akotalela biso ete tozala na nguya ya kopesa epai na bato. Bongo nguya ezali nini? Nguya ezali bokasi, bokonzi.

149 Bamosusu kati na bango bandimaka ata nguya na Nzambe te. Balobaka: “Oyo—oyo—oyo wana esilá koleka. Eloko bobele moko osengeli kosala ezali kotia nkombo na yo na buku, pe bámwangisela yo mai, to básopela yo mai, to óbatisama, to soko nini mosusu. Yango nde nyonso osengeli kosala.”

150 Kasi Petelo alobaki awa: “Bakisa nguya.” Sikawa, Petelo azali kolobela nde kotonga Ndako na Nzambe, bomoni, Tempelo na Nzambe, kobongisa yango ékoma esika. Pe sima na bino kozala na nguya, bosengeli kozala na. . . Sima na bino kozala na

kondima, bosengeli kozala na nguya elongo ná yango. Ya solo. Bózala na nguya mpo na mokili mobimba.

¹⁵¹ Eleki pene na mibu ntuku mibale, nateyáká liteya moko, nabanzi, likolo na Reverend Misie Lísi. Lísi, mokengeli. Nazuaki yango longwa na makomi oyo na esika oyo Yesu alobaki: “Bótala folólo lísi, esalaka te, etongaka pe te. Kasi Nalobi na bino, Salomo, na nkembo na ye nyonso, alataki lokola moko na yango te.”

¹⁵² Bótala folólo lísi. Eutaka mosika kuna na nse ya potopoto. Pe miníti moko moko ya mokolo, asengeli kobenda makasi na mabelé. Bomoni? Pe esalaka nini na nguya oyo ebendaka? Ekabolaka yango. Etalisaka kitoko na yango mpo na kosepelisa motáli. Emifungolaka mpo na mafuta na nzoi, mpo nzoi éya kozua eteni na yango. Emilelaka te. Ezali na yango, mpo na kokabola. Bongo soki nzói eyei kuna; makoki ezali te, mafuta na nzoi ezali te? Mwa nzói yango ekomikwanza motó pe ekoloba: “Oyo folólo lísi ya ndenge nini boye?”

¹⁵³ Soki moto moko ayei, kolukáká kozua lobiko, akei na lingomba oyo endimaka ete mikolo ya bikamwa esílá koleka?

¹⁵⁴ Ndenge Jack Coe alobaki mokolo moko. Akotaki na restaurant moko, pe akamati menu monene moko; abandi kotanga yango, Mosuni ya mokuwa ngombe ná bilei mosusu. Alobi: “Nakolia Mosuni ya mokuwa ngombe.”

“Ee, ezalaki mpo na eleko moko eleká. Tozali na yango te.”

¹⁵⁵ Malamu kutu kotia menu yango na nse pe kobima, bomoni, ya solo, mpo bazali na eloko moko ya kolia te. Boye, ekozala malamau ete ókende na restaurant oyo ezali na biloko ya kolia.

¹⁵⁶ Pe moto ya molimo, oyo azali kokola, azali na bosenga ya bilei. Yango ezali Liloba na Nzambe. Nandimaka Liloba na Yango moko moko.

Nzambe abongisi mesa esika oyo basantu ya
Nzambe bazali kolia,
Azali kobianga baponami na Ye: “Boya kolia.”
Azali koleisa biso mana na Ye, Azali kokokisa
mposa na biso nyonso,
Oh, ezali malamau kolia elongo na Yesu ntango
nyonso.

¹⁵⁷ Ya solo. Iyo, misie. Azali na Yango. Lingomba ezali na Yango, Lingomba ya Nzambe na bomoi, oyo etongami kati na moto abongi be oyo, na boyebi ya Klisto. Boye, sikawa bosengeli kozala na nguya.

¹⁵⁸ Na bongo, nalobaki, eloko ya liboso boyebi, ezali na moto oyo asepelaka koyoka nsolo kitoko. Azali moyími te. Azali na nsolo kitoko. Liboso ete ákoka kobimisa nsolo kitoko, asengeli kozala na yango. Liboso ete ákoka kobimisa mafuta ya nzoi, asengeli

kozala na yango. Liboso ete ákoka kotalisa kitoko na yango, asengeli kozala na yango.

¹⁵⁹ Liboso ete ókoka kokabola nguya, osengeli kozala na yango. Boye, bakisa nguya na kondima na yo. Amen. Bososoli? Tokoki koumela mingi likolo na yango, kasi ntango na biso ekosilela biso noki. Kobakisa nguya na kondima na yo. Sikawa, ya liboso kondima, na sima nguya.

¹⁶⁰ Na sima, ya misato, bakisa boyébi. Boyébi, sikawa, elingi koloba te boyébi ya mokili, mpo yango ezali boléma mpo na Nzambe; kasi boyébi mpo na kososola, kososola (nini?) malamumu ná mabe. Boye okososola yango ndenge nini, soki ozali na boyebi ya Baklisto, ná nguya pe kondima na yo? Okososola soki Liloba ezali solo to lokuta. Pe soki okoki kotia pembeni bindimeli na yo nyonso, ná kozanga kondima na yo nyonso, nyonso oyo olobaka ete osilá kosala, na ntango wana nde ozali na boyébi mpo na kondima ete Nzambe akoki kokosa te. “Tika ete maloba na moto nyonso ézala lokuta, kasi oyo ya Ngai ézala solo.” Bomoni? Sikawa, okomi kozua boyébi. Wana ezali boyébi oyo eleki likolo mpenza. Ozali na ntina ya kozala na ba-diplôme minei ya université te, to eloko moko ya ndenge wana, mpo na kozua yango, mpo ba-nguya nyonso oyo, epesameli yo nde na Nzambe, mpo na kotia yango likolo na mobóko ya kondima na yo, mpo ókoka kokóma na epimelo mobimba ya moto ya solosolo ya Nzambe na bomoi. Iyo, misie.

¹⁶¹ Bakisa, bakisa boyébi, mpo, boyébi ya Liloba na Ye. Bosengeli kondima yango na ndenge oyo. Ndakisa, bosengeli kondima lelo ete bi...pe koyamba yango, ete mikolo ya bikamwa eleki naino te. Boyébi ete oyo Nzambe alobaki, Nzambe azali na makoki ya kosala yango.

¹⁶² Abraham andimaki yango. Pe ntango akómaki na mibu monkama, atiaki ntembe te, na kozanga kondima, na elaka ya Nzambe. Bótala ndenge Liloba yango emonanaki lokola ete etiolami. Bótala mobali oyo, ya mibu monkama, azali kozela ete bebé moko ábotama na libota na ye, na mwasi moko ya mibu ntuku libwa. Bomoni? Alekisaki ntango ya kobota pene na mibu ntuku mitano, abikaki elongo na ye banda ntango azalaki e—elenge mwasi, to moseka. Pe ye oyo, mokongo na ye esilaki kokufa. Pe libumu ya Sara esilaki kokufa. Pe elikya nyonso esilaki, mpo na oyo etali elikya. Kasi, atako, kozanga elikya, ye andimaki na elikya, mpo azalaki na boyébi ete Nzambe azalaki na makoki ya kokokisa nyonso oyo Alakaki.

¹⁶³ Sikawa, ntango ozali na yango ndenge wana, bakisa yango na kondima na yo. Ntango ozali na nguya ya solo, bakisa yango na kondima na yo. Na ntango oyo okoki kotambola na balabala awa, kobika lokola Moklisto, kosala makambo lokola Moklisto, kozala Moklisto, bakisa yango na kondima na yo. Ntango ozali na boyébi... .

164 Okoloba: “Ee, sikawa, nayebi te soki Likomi *oyo* ezali bobele solo. Sikawa, Misala 2:38 yango oyo, nayebi te ndenge ya kokokanisa yango ná Misala 28:19. Nayebi te.” Malamu. Ko—kobakisa eloko moko te, mpo ozui Yango naino te. Bomoni? Okosala nini? Mpamba te, ozui naino boyébi ya kokoka te, oyo euti na Nzambe, mpo na koyeba ete Biblia Emitelemelaka te. Tika yango kimia. Koloba lisusu te na ntina na yango. Bomoni? Tika yango kimia.

165 Kasi, na ntango oyo okoki komona ete Makomi ezali komitelemela te, ete okoki koloba bongo; pe okomi komona, na nzela na emoniseli ya Nzambe, ete Liloba mobimba ekomami na mabombami, pe bobele boyébi ya Nzambe nde ekoki komonisa Yango; na bongo, ntango osololi pe olobi, ondimi “amen” na Liloba moko moko ya Nzambe, na bongo bakisa yango na kondima na yo.

166 Oh, obandi sikawa kokóma moto ya malamumpenza. Bomoni? Ozali komata, bomoni. Na nini? Na kondima, na sima nguya, na sima boyébi. Bomoni ndenge ezali kotonga moto yango? Bokoki komona ete nze—nzela ya kokima yango ezali te. Oyo nde nzela ya kokóma na epimelo mobimba ya Klisto. Iyo, misie.

167 Mpo na kososola, kososola malamumu. Kososola soki ezali malamumu to mabe, kondima Liloba na Nzambe. Kososola soki ezali malamumu to mabe, soki nasengeli kosalela endimeli to kosalela Nzambe. Kososola soki ezali malamumu to mabe, ete nasengeli kobotama mbala na mibale to kokota na lingomba. Na ntango wana obandi. Kososola malamumu, ntango motei alobi: “Ntango ya bikamwa esili koleka.” Biblia elobi: “Yesu Klisto ndenge moko, lobi, lelo pe libela.” Sikawa, okondima oyo wapi?

168 Ntango olobi: “Nakopona Nzambe.” Sikawa, olobi yango kaka mpo na koloba te: “Ee, na—naponi yango,” kouta mpenza na motema na yo. Kasi, eloko moko kati na yo, kondima na yo ezali kofungola nzela. Yango mpenza. Kondima na yo elobi: “Nayebi Azali ndenge moko. Amen. Nasílá kotatola Ye ndenge moko. Eloko moko te ekoki kolongola yango kati na ngai. Nayebi Azali solo.” Amen. Na bongo, bakisa yango na kondima na yo. Fandisa yango likolo na mobóko. Ozali komata sikawa, ozali kokoba komata kino na Bokonzi. Okómi na esika yango sikawa. Malamumu.

169 Sikawa, likambo elandi, motei akoyebisa yo, pe bato mingi balobaka: “Ma... Makambo oyo otangaka na Biblia, ezalaki mpo na eleko mosusu. Sikawa, nakoyebisa yo mpo na nini. Mpo lelo, tozali na ntina ya makambo wana te. Tozali na ntina na yango te. Bomoni? Tosengelaki te. Tozali na ntina ya kosalela makambo wana te, lobiko na nzoto kouta na Nzambe. Biso tosalemela minoko na sika te, kati na lingomba, mpo—mpo na kobatela lingomba na biso alima. Pe tosalaka *boye* te.”

170 Tokokóma na likambo yango. Nazali na Likomi moko awa na ntina na yango, bomoni, soki tosengeli kosala yango to te, sikawa.

171 Kasi awa alobaki: “Nayebi te. Tosengeli kosala yango lelo te. Likambo bobele moko oyo nakanisi ete tosengeli kosala, tosengeli koyekola koloba malamumu liboso ya bato ebele. Tosengeli kokende kotalisa bongó na biso epai ya monganga ya motó, mpo na koyeba soki tokoki kotelema liboso na bato, soki mayele ya bongó na biso ekoki mpenza mpo na kosala yango, pe—pe bongo na bongo ndenge wana. Nakanisi. . . Pe tozali na ba-losambo oyo eleki minene. Totongi ebongiseli na biso.”

172 Tozali kotonga ebongiseli te. Nazali awa na ntongo oyo mpo na kotonga ebongiseli te. Klisto atíndá ngai mpo na kotonga ebongiseli ata moke te. Klisto atíndá ngai mpo na kotonga bato kino na epimelo ya Yesu Klisto, mpo bákóma ndako na nguya pe efandelo ya Molimo, na nzela ya Liloba na Ye. Na nzela ya Liloba na Ye, bomoni, kotonga moto kino na esika wana. Ezali te kotonga ebongiseli mpo na kokómisa yango denomination moko ya monene koleka, kasi kotonga bato kino bákóma bana mibali pe bana basi ya Nzambe. Yango nde likanisi. Bomoni? Bakisa na kondima na yo, nguya; na nguya na yo, bakisa boyébi. Ee, sikawa, ozali kokóma esika moko.

173 Sikawa ntango babandi koloba: “Ee, tosengeli kondima yango lelo te. . .” Bosengeli mpenza. Esengeli bongo.

174 Makomi ekoki kokosa te. “Pe Esengeli na ndimbola ya moto moko te,” ndenge Biblia elobaki. Bondima Yango ndenge Yango ekomami Wana. Bomoni? Bosengeli kozala na makambo oyo. Pe nzela bobele moko oyo bokozaláká na makoki ya kozua yango, ezali kozala na boyébi oyo euti na Lola. Pe boyébi oyo euti na Lola ekotatola Liloba. Bomoni?

175 Bosengeli kondima yango, kosala lokola kondima te. Moko te na oyo ezali lokola kondima ya maloba, bomoni, soki omeki koloba: “Nazali na yango.” Kozala ndeke oyo merle te oyo ezali komeka komitiela nsala ya paon, omoni, mpo ekolongwa mbala moko. Yango ebimi wana yango moko te. Babambi yango kobamba.

176 Nakanisi esika oyo Dawidi alobaki kuna, na Nzembo 1: “Azali lokola nzete oyo ekónami pene na bitima na mai.” Boyebi, bokeseni ezali kati na kokónama pe kotiamu, kobambamu. Ezali lokola nzete oyo ekóli, ekónamaki, misisa wana kuna ezindi pe epikami makasi. Mwa nzete oyo ebimi wana, boyebi eloko nini ekokómela yango te. Ezali na misisa te. Ezali na mobóko te. Bomoni?

177 Ezali lokola bato mosusu oyo bauti na likindo to eloko moko bongo, bomoni. Bazangi. . . “Ee, Docteur *Songolo-pakala* moto abulisaki ngai na mosala.” Esali bokeseni moko te ata soki ezalaki nini.

¹⁷⁸ Klisto nde abotisi yo kati na yango, bomoni, bomoni, na kondima na yo. Bomoni? Obotami lisusu pe obotami kati na yango. Na bongo, sima na yo kobotama kati na yango, oyo nde makambo oyo Ákoluka ete óbakisa. Koba bobele kobakisa yango. Sikawa, tokoleka mbala moko na molongo yango.

¹⁷⁹ Sikawa, ekozala na likambo mosusu, oyo tokoki kolobela, likolo na boyébi oyo, boyébi ya búle. Bomoni? “Na eleko oyo, Biblia ebungisi ntina na Yango?” Bomoni, bango, bato mingi bayebisaka bino bongo, ete Biblia elingi mpenza koloba bongo te. Soki Nzambe asenzelaka likolo na ngai, pe asembolaka ngai na masumu na ngai, soki nazali mwana na Nzambe, Asalaka yango. Asalaka bongo epai na bino, bana mibali pe [Maloba mazangi na bande—N.D.E.] bana basi. Na ntango osali mbeba, Akosembola yo. Na bongo, soki Nzambe alandelaka yo bongo, na lolenge ete Akengelelaka yo pe Asembolaka yo, koleka boni Asalaka bongo mpo na Liloba na Ye, oyo ezali ndakisa mpo na yo, oyo ezali Ye moko!

Na ebandeli Liloba azalaki, pe Liloba azalaki mboka na Nzambe, pe Liloba azalaki Nzambe.

Pe . . . akómaki nzoto, pe afandaki kati na biso, . . .

¹⁸⁰ Liloba ezali emoniseli ya Yesu Klisto, Biblia elobi bongo, Klisto azali komonisama kati na Liloba na Ye. Pe soki Asenzelaka yo ntango obukaka mibeko oyo, Akweisaka yo mpo na yango, koleka boni Asenzelaka mobeko na Ye oyo ekweisaka yo! Amen.

¹⁸¹ Koba na yo, ndeko, koyebisa ngai makambo wana te!

¹⁸² Ngai nandimaka boyébi ya solosolo, ya Molimo Mosantu. Boyébi ya Molimo Mosantu ekondima “amen” na Liloba ntango nyonso. Na ntango omoni makambo oyo emonani lokola kotelemelana, kati na Biblia, fanda kimia pe yekola yango, kati na mabondeli ndenge wana. Pe na mbala moko okomona, Molimo Mosantu abandi komitalisa. Sima na mwa ntango, okomona yango ndenge ekologobana elongo, pe tala yango wana. Bomoni? Yango nde boyébi.

¹⁸³ Bato mosusu balobi: “Ee, sikawa, Biblia elobi ete Azali ndenge moko lobi, lelo pe libela.”

¹⁸⁴ Pe lingomba elobi: “Na lolenge moko boye, Azali ndenge moko.” Ah-ah! Ah-ah! Osili kofungola nzela, kaka wana. Omoni? Iyo, misie. Te, misie. Azali ndenge moko. Iyo, misie.

¹⁸⁵ “Yesu Klisto ndenge moko lobi, lelo pe libela.” Kati na Ye, bokeseni ezali ata moke te. Azali kobika kati na Lingomba na Ye, kosaláká makambo ndenge moko. “Sima na ntango moke,” ndenge nautaki koloba yango kala mingi te, “sima na ntango moke, bamokili bakomona Ngai lisusu te, nde bino bokomona Ngai.” Mpamba te, Alobaki, “Nakozala elongo na bino, ata kati na bino, kino na suka ya mokili.” Alobaki lisusu: “Misala

mizali Ngai kosala, bokosala yango pe lokola.” Alobaki lisusu: “Ngai nakozala Mowiti. Bino bokozala bitape.” Pe etape ebikaka bobele na Bomoi ya Mowiti. Nyonso oyo ezali kati na Mowiti emonisamaka polele na nzela na etape. Nkembo! Na bongo, “Klisto ndenge moko lobi, lelo pe libela.” Ekobota Bomoi ya Nkolo Yesu Klisto. Amen.

¹⁸⁶ Boyébi; oyo ya mokili te (yango ebánzaka). Lolenge nyonso ya boyébi ya mokili ebánzaka. Bomoni? Kasi kondima ezalaka na lobanzo te. Soki Nzambe amonisi yo ete likambo *boye na boye* ekosalema, bato nyonso ya science na mokili bakoki koloba na yo: “Ezali bongo te. Ekoki kosalema te.” Yo ondimi yango, ata bongo. Bomoni? Iyo, misie. Yango ebánzaka te. Biblia elobi: “Tobwaka mabanzo.” Ná kondima babanzaka te. Kondima ezalaka na lobanzo te. Kondima eyebaka esika eteleme. Kondima esalaka. Kondima etelemaka ngwi. Ekoki koningana te. Eloko moko ekoki koningisa yango te. Etali ngai te nani alobi *oyo, wana, mosusu boye*. Eninganaka ata moke te. Etikalaka bobele wana, kozela, kozela, kozela, kozela. Ebongwanaka te. Etikalaka bobele wana.

¹⁸⁷ Nzambe ayebisaki Nowa ete makambo oyo ekosalema. Andimaki yango. Bomoni? Nzambe ayebisaki Mose ete makambo oyo ekosalema. Andimaki yango. Nzambe ayebisaki bayekoli ete makambo oyo ekosalema: “Bomata kuna, na Pentekote pe bozela.” Batikalaki bobele wana. Iyo, misie. Malamu.

¹⁸⁸ Sikawa, boyébi, sikawa, boyébi ya mokili te, kasi ezali boyébi ya Likolo. Pe boyébi ya Likolo, ntango oyo Nzambe azali liziba ya boyébi nyonso, pe Nzambe azali Liloba, na bongo, soki ozali na boyébi ya Likolo, okondima Liloba, pe okobanza likambo nyonso na nzela na Liloba.

¹⁸⁹ Pe likambo ya mpako oyo ekomelaki lingomba, to oyo ekomelaki ngai. Mokolo moko, wana bazalaki koyoka ngai, moko na bato yango ayebisaki ngai. Alobaki, nalobaki. . . “Bakokaki komona mbeba moko te.” Na bongo babandaki ko. . .

¹⁹⁰ Nalobaki: “Ee, na boye, soki mbeba moko ezali te, mpo na nini botiki ngai kimia te?” Bomoni? Bomoni? Pe nakobaki kolobela ye na ntina na mwa Makomi.

¹⁹¹ Alobaki, azalaki engambe mobali ná likaya na loboko, alobaki: “Misie Branham, nazali moyekoli ya Biblia.”

Nalobaki: “Nasepeli koyoka yango.”

¹⁹² Alobaki: “Nalingi koyeba ntina ya bisalasala oyo, ofutisaka mbongo mpo na miswále oyo otindelaka bato, mwa bisálásala wana ya kobondela mpo na miswále pe kotindela bato, ‘biteni ya bilamba oyo epakolami,’ obengaka yango ‘bilamba.’” Alobaki: “Ofutisaka mbongo mpo na yango.”

Nalobaki: “Te, misie. Bafutelaka yango mbongo te.”

Alobaki: “Ee, na ntina na bisálásala oyo.”

193 Nalobaki: “Obengi yango bisálásala, misie. Outi koyebisa ngai kala mingi te ete ozali moyekoli ya Biblia.”

Alobaki: “Ezali bongo.”

194 Nalobaki: “Tangela ngai Misala 19:11.” Boyébi! Amikangaki ye moko na motambo yango, alukaki kobongola lisolo. Nalobaki: “Boye tangela ngai Yoane 5:14.” Akokaki kosala yango te. Nalobaki: “Bongo Yakobo 5:14.” Akokaki kosala yango te. Nalobaki: “Oyebi Yoane 3:16?” Bomoni? Boyébi, mayele ya mokili! Kasi ntango. . .

195 Alobaki: “Kasi, Misie Branham, yo ozali koluka kokata likambo yango na nzela na Biblia. Bisotozali kokata yango na nzela na mibeko ya mboka.”

196 Nalobaki: “Misie, mibeko ya mboka oyo etongami likolo na Biblia, boye te? Boye ezali bosembo.” Amen! Ya solo.

197 Boyébi; oyo ya mokili te. Boyébi ya molimo, ya Liloba, koyeba oyo Nzambe alobi, kosala oyo Nzambe alobi, ya solo. Na bongo, soki ozali na yango pe okoki kondima makambo oyo nyonso, ete Azali ndenge moko, pe na makambo nyonso oyo Liloba elobi ete ezali solo, okoloba “amen” na liloba moko moko. Ezali malamumu. Bakisa yango na kondima na yo. Ezali malamumu. Iyo.

198 Soki moto moko ameki koyebisa yo, ete: “Biblia ebungísá nguya na yango. Libatishi ya Molimo Mosantu ezalaka te.” Ha-ha. Kobakisa yango te. Ekosimba te. Ekokweya. Ezali lokola kotia potopóto likolo na libanga, ekotelema te. Ekopanzana.

199 Bongo bato bakoloba na yo: “Lelo, tokoki kotiela Biblia motema te. Zala na bokebi sikawa. Komeka kondima yango te. Ekoki kozala solo te.” Boyokaka yango ntango nyonso. Mwa elobeli oyo: “Bokoki kotiela Biblia elikya te.” Ee, soki—soki ozali na yango na likanisi na yo, komeka te—komeka kobakisa yango te, mpo ekosimba te. Ndako mobimba yango ekokweya na mbala moko.

200 Asengeli kotiamu ciment na nzela ya Molimo Mosantu. Nalingi koloba kokangisa esika moko, ciment oyo ekokangisa yango. Pe eloko moko oyo ekosangisa yango. . . Boyebi lolenge. . .

201 Chambre à air ya sufúlu eumelaka ntango nyonso koleka eteni ya ndembo oyo babambí. Soki eteni ya ndembo oyo babambi na piné ezui mwa móto, eloko ya liboso boyebi, soki piné yango ezui mwa móto mpo etamboli mwa mbangu, ekonyangwana pe ekolongwa. Iyo, misie. Bomoni?

202 Pe yango nde likambo oyo ezali kokómela bato mingi lelo. Balukaka nde kobamba boyébi na bango likolo na boyébi ya mokili, na mwa kóle ya mokili, pe, ntango komekama eyaka: “Ee, ntango mosusu namikosaki.” Bomoni? Pe mopepe ebimi, pe sima na miniti moke osili mopepe. Koganga pe kopumbwa-pumbwa

na yo nyonso esungi yo ata moke te. Bato bazomona yo bobele kati na bosoto moko yango. Bomoni? Ya solo.

²⁰³ Kasi soki otikali wana na móto ya kokoka ya Molimo Mosantu, kino ete ékómisa yo ná chambre a air yango eloko moko. Yango mpenza. Yo ná chambre a air yango bokómi eloko moko. Na ntango otikali wana kino ete yo ná elaka nyonso ya Nzambe bokómi eloko moko, bongo bakisa yango na kondima na yo. Soki te, kobakisa yango ata te.

Okoloba: “Bakoki kotielá Liloba elikya te.” Komeka kobakisa yango te.

²⁰⁴ Okoloba: “Bilaka oyo awa, ya libatísi ya Molimo Mosantu, ezalaki bobele mpo na bantoma zomi na mibale,” ndenge mangomba mosusu bazali koloba lelo, komeka kobakisa yango te. Wana nde esika mobóko na bango ezali, nyonso epanzaná. Bomoni? Lokola Uziya, lobi na mpokwa, ntango amonaki mobóko ya moto oyo atielaki elikya, nyonso epanzanaki, ebetami na bokono ya mbala, ezalaki ata kitoko te. Sikawa: “Kaka mpo na bantoma zomi na mibale, bobele bantoma zomi na mibale.”

²⁰⁵ Nazalaki kuna epai ya Ndeko Wright...Nakanisi bazali kuna na sima, na esika moko boye. Na mpokwa moko, motei moko azalaki kuna, ngai nde nazalaki koloba, tozalaki batei minei to mitano elongo. Motei oyo atelemaki pe alobaki: “Sikawa, balingami, nalingi koyebisa bino likambo moko. Oh, nabanzi ete bozali bato malamú.”

²⁰⁶ Nalobaki, nayebisaki moto moko, nalobaki: “Moko—moko afandi kuna. Tala malamú.”

²⁰⁷ Bongo, Junior Jackson, kuna na sima, autaki kosilisa koloba. Pe alobaki... azalaki koteya na ntina na ngolu na Nzambe. Oh! la la!

²⁰⁸ Azalaki kozela, na motema dúkúduku. Atelemaki kuna pe azalaki komeka kososola. “Sikawa, nalingi koloba ete Misie Branham oyo, nayebisi bino, azali motemeli ya Klisto.” Pe abandaki ndenge wana, mpokwa mobimba.

²⁰⁹ Batei mosusu babandaki...Nalobaki: “Bózela moke. Sikawa, bóloka eloko moko te, bandeko. Ye azali kaka ye moko, kasi biso tozali mingi.” Nalobaki: “Bótika ye sikawa. Abundisi nde ngai.” Nalingaki mpenza nálandela likambo yango, ngai moko, nayebaki ata eloko ya kosala te. Bomoni.

²¹⁰ Boye, alobaki: “Misie Branham azali motemeli ya Klisto,” pe akobaki koloba makambo nyonso wana, boyebi, na ntina na...Alobaki: “Kuna, alobaki: ‘Libatísi ya Molimo Mosantu.’” Alobaki: “Biblia elobi ete bobele bato zomi na mibale nde bazuaki Molimo Mosantu.” Mpo na oyo etali lobiko na nzoto kouta na Nzambe: “Bobele bantoma zomi na mibale nde bazalaki na lobiko na nzoto kouta na Nzambe.” Alobaki: “Biso tolobaka esika Biblia elobi, pe tofandaka nye esika Biblia efandi nye.”

Nazelaki kino ntango asilisaki bilobáloba wana nyonso, pene na ndambo na ngonga.

²¹¹ Nalobaki: “Zela moke. Nakomaki makambo mingi awa,” nalobaki, “pesa ngai libaku ya koyanola na mwa makambo.” Pe ntango natelemaki, nalobaki: “Misie, alobi ete ‘alobaka esika Biblia elobi,’ lingomba na ye esalaka bongo, ‘pe afandaka nye esika Yango efandi nye.’ Bino nyonso bozali batatoli. ‘Iyo.’” Nalobaki: “Sikawa, alobaki: ‘Bobebe bato zomi na mibale nde bazuaki Molimo Mosantu.’ Biblia na ngai elobi ete bazalaki monkama na ntuku mibale, na mbala ya liboso.” Amen! Bwaka lolenge ya boyébi wana, bomoni, oyo ye azalaki koluka.

²¹² Nalobaki: “Boye nabanzi ete Polo azuaki Molimo Mosantu te, na ntango oyo ye alobaki ete azuaki yango.” Bomoni?

²¹³ Nalobaki: “Kuna na...Ntango Filipino akendeki koteya Basamalia. Basilaki kobatisama na Nkombo na Yesu. Kasi, Molimo Mosantu akitaki likolo na bango te. Pe babengisaki Petelo ná Yoane, bayaki kotiela bango maboko, pe Molimo Mosantu akitaki likolo na bango. Nabanzi wana ezalaki bobele ba-zomi na mibale?”

²¹⁴ Nalobaki: “Na Misala 10:49, ntango Petelo azalaki na likolo ya ndako, pe amonaki na emononeli ete bakokende epai ya Koloneli. Wana ezalaki Petelo koloba maloba oyo, Molimo Mosantu akitaki likolo na baoyo bazalaki koyoka Liloba.” Nalobaki: “Biblia ezali kokoba koloba. Lingomba na bino ezali wapi?” Ezali na yango maloba. Ya solo. Bomoni?

²¹⁵ Nalobaki: “Mpo na lobiko na nzoto kouta na Nzambe, olobaki: ‘Bobebe bantoma zomi na mibale nde bazalaki na lobiko na nzoto kouta na Nzambe.’ Biblia elobi ete Etiene akendeki na Samalia, abenganaki milimo mabe pe abikisaki babéli, pe esengo monene ezalaki na engumba yango. Pe ye azalaki moko na ba-zomi na mibale te. Azalaki ntoma te. Azalaki mosungi.” Amen. Amen.

²¹⁶ Nalobaki: “Polo azalaki moko na ba-zomi na mibale te, oyo bazalaki na ndako ya likolo, kasi azalaki na likabo ya kobikisa babéli.”

²¹⁷ Nalobaki: “Tala naino makabo ya kobikisa babéli! Pe lisusu, mibu ntuku misato na sima, azalaki naino na Bakolinti, kotiáká likabo ya kobikisa babéli kati na Nzoto na Klisto.” Oh! la la!

²¹⁸ Sikawa, boyébi ya ndenge wana, oyo bayekolaka yango na buku moko boye, malamumu kobwaka yango na ngóngóló ya fúlu. Bóya na boyébi oyo. Ntango Nzambe alobi: “Azali ndenge moko lobi, lelo pe libela,” loba: “Amen.” Iyo, misie. Iyo, misie. Ezali mpo na ba-zomi na mibale te; ezali mpo na moto nyonso. Ntango ozui ko—kondima ya ndenge wana, ntango kondima na yo ekómi koloba “amen” na eteni moke nyonso, na ntango wana okoloba: “Malamu,” bakisa oyo wana na yango.

219 Ya minei. Tosengeli kosala noki-noki, mpo nazali kaka... Ékosala elengi mpenza kotelema awa pe kolobela yango. Amen. [Ndeko moko alobi: “Tozali kosepela na yango.”—N.D.E.] Iyo. Ya minei... Natondi yo.

220 Bakisa “komipekisa.” Oh! la la! Tokómi na komipekisa. Sikawa, ozuaki liboso kondima; osengeli kozala na yango, mpo na kobanda. Na sima, obakisi nguya na kondima na bino, soki ezali nguya oyo na ndenge elongobani. Na sima, obakisi boyébi, soki ezali boyébi oyo elongobani. Sikawa, okobakisa komipekisa.

221 Komipekisa awa elingi koloba te “kotika komela masanga,” to eloko mosusu. Te, te. Komipekisa elingi koloba te ndenge nini kotika masanga, na likambo oyo te. Oyo ezali komipekisa ya Biblia, komipekisa ya Molimo Mosantu. Oyo wana ezali bobele moko na ba-mposa mabe ya nzoto, kasi tozali kolobela komipekisa ya Molimo Mosantu. Elingi koloba, ndenge nini kokonza lolemo na yo, kozala bilobáloba te; ndenge nini kokonza ezaleli na yo, kotomboka te ntango nyonso moto alobeli yo mabe. Oh! la la!

222 Moninga, mingi kati na biso bakokwea liboso ete tóbanda, boye te? Bomoni? Bongo tomitunaka mpo na nini Nzambe azali kati na Lingomba na Ye te, kosaláká bikamwa pe makambo oyo bango bamesáná kosala. Iyo, misie. Bomoni?

223 Bakisa makambo oyo. Bakisa komipekisa na yango. Oh, komipekisa, lolenge nini koyanola na boboto ntango balobeli yo na nkanda. Soki moto alobi: “Bino batúntuki oyo kuna!” Kotelema te mpo na kongúmba maboko ya elamba na yo mpo óbunda. Bomoni? Wana te. Kasi loba na bolingo ya búle, na komipekisa, na boboto. Bolingi kozala ndenge wana? [Losambo balobi: “Amen.”—N.D.E.] Soki bafingi yo, yo kofinga te. Tika ete Ye ázala ndakisa na yo.

224 Ntango balobaki: “Soki Ozali Mwana na Nzambe, bongola mabanga oyo ekóma mapa,” Akokaki kosala yango, pe kolakisa ete Azalaki Nzambe. Kasi Azalaki na komipekisa. Ntango babengaki Ye “Belezebula,” Alobaki: “Nalimbisi bino mpo na yango.” Boye te? Bapikolaki mandefu na elongi na Ye, pe babwakelaki Ye nsói na elongi, pe balobaki: “Kita na ekulusu!”

225 Alobaki: “Tata, limbisa bango. Bayebi ata eloko bazali kosala te.”

226 Ntango, Azalaki na likabo, Ayebaki makambo nyonso, mpamba te litondi na Bonzambe kati na nzoto ezalaki kati na Ye. Bamónáki Ye kosala bikamwa, na koyebisáká bato makambo oyo ezalaki kotambola te ná bango, pe bongo na bongo, ndenge wana. Bazingaki Ye eteni ya elamba na motó ndenge wana, na miso na Ye, pe babetaki Ye lingenda na motó, pe balobaki: “Sakola, yebisa biso nani abeti Yo. Tokondima Yo.” Bomoni? Azalaki na komipekisa.

²²⁷ Sikawa, soki ozali na yango ndenge wana, bakisa yango na kondima na yo. Soki ozali kaka kotomboka pe kopesa biyano ya mabe, kosuana, kosilika, kobendana, ha-ha, ozangi na yo. . . Okoki kobakisa yango te, mpo ekobakisama te. Bomoni? Ekosangana te. Okoki kozua eteni ya ndembó te, boyebi, mpo na kosangisa yango na eteni ya ebende. Ekosimba na yango te. Te, esengeli kozala pete-pete, kaka ndenge ndembó ezalaka. Omoni? Pe na ntango kondima na yo pe komipekisa na yo ekómi ndenge moko na komipekisa ya Molimo Mosantu oyo Ye azalaki na yango, na ntango wana nde ekosangana na Ye. Obakisami na yango.

Ntango nguya na yo ezali lokola nguya na Ye, na bongo ekobakisama na yango.

²²⁸ Ntango boyébi na yo ezali lokola boyébi na Ye: “Nayei kosala mokano na Yo, e Nzambe.” Omoni? Ná Liloba ya Tata, Alongaki milimo mabe nyonso. Likolo pe nse ekoleka, kasi Liloba ekoleka te. Bomoni? Na ntango ozui boyébi ya lolenge wana, ekosangana na kondima na yo.

²²⁹ Na ntango ozui komipekisa oyo ya malamumu, lokola oyo Ye azalaki na yango, ekosangana. Soki ozali na yango te, bobele komipekisa to kondima moko ya ndambo, esilá ngala, ya lolenge na bato: “Oh, esengelaki nábeta ye mpenza, kasi—kasi ntango mosusu malamumu násala yango te, mpo bakoki kotia nkombo na ngai na zulunale mpo na yango.” Wana ezali lolenge ya komipekisa oyo Azali kolobela te. Komeka kobakisa wana te. Ekosimba te. Kasi na ntango okoki mpenza, na bopolo ya motema na yo, kolimbisa moto nyonso, kofanda kimia, kobosana yango, bomoni, na ntango wana nde ekosangana. Okoki kobakisa yango na kondima na yo. Fiuu!

²³⁰ Ékokamwisa te ete lingomba ezali na bozangi mpenza boye. Boye te? Ékokamwisa te. Nakoki koloba: “Bóbongola mitema pe bobatisama, ndenge Biblia elobi, na Nkombo na Yesu Klisto.” Kasi mondimi mpenza ya ba-Trinitaire oyo andimaka yango te, akoloba: “Motemeli Klisto wana. Azali moto ya Nkombo na Yesu. Azali moto ya Yesu Kaka.” Keba, moninga, nayebi te lolenge oyo komipekisa na yo ezali na ngonga oyo. Bomoni? Mpo na nini te koya koloba: “Totala likambo oyo elongo, Ndeko Branham. Nakosepela koyoka ndimbola na Yango”? Bomoni? Boye yaka koyoka Yango. Na bongo, Yango etiami liboso na yo, na sima okei na yo; toko—tokokoma na likambo wana kala mingi te, na “bosantu,” bomoni. Kasi na ntango o—na ntango otomboki, pe okómi kozua mokano nyonso na lombangu, ha-ha, wana ezali—wana ezali yango te. Bomoni? Ozali na komipekisa ya Biblia te, na ntango osali bongo; ndenge ya koyanola. Na bongo, soki ozui nyonso oyo, okoki kobakisa yango na kondima na yo.

²³¹ Boye, sima na yango, ya minei, okolinga kobakisa motema

molai na kondima na yo. Soki ozali na kondima “yango ebótaka motema molai,” Biblia elobi. Bomoni? Boye, *oyo* nde motema molai. Sikawa, yango nde eloko oyo elandi mpo na kotonga epimelo yango. Boyebi, Nzambe azali na bisaleli ya solosolo kati na Ndako na Ye.

²³² Bomoni ndenge tozokelela, ndeko mobali, ndeko mwasi? Bomoni? Bomoni ntina nini, epayi wapi tokómi? Iyo, misie. Bomoni? Tozali na nkembo, tozali na milóló pe nyonso wana, mpo tozali na kondima. Kasi, ntango tokómi na makambo oyo *awa*, Nzambe akoki kotonga biso te kino na epimelo wana. Bomoni? Akoki te. Akoki komatisa biso kino na esika ya ndenge wana te. Tozali na makambo nyonso mosusu. Tozali kokweya, koselimwa mosika na yango. Bomoni? Akoki kotonga Lingomba na Ye te.

²³³ Motema molai ná nini? Motema molai ya ndenge nini? Eloko ya liboso, ezali kozala na motema molai ná Nzambe. Soki ozali na kondima mpenza ya solosolo, okozala pe na motema molai mpenza ya solosolo, mpo kondima ebotaka motema molai. Soki Nzambe alobi likambo, okondima yango. Esili. Ozali na motema molai.

²³⁴ Okoloba: “Ee, lobi na mpokwa nasengaki Ye ete ábikisa ngai, kasi na ntongo oyo, nazali kaka na bokono.” Oh! la la! Motema molai nini wana?

²³⁵ Nzambe asololaki na Abraham, kasi sima na mibu ntuku mibale na mitano, ata elembo moko ezalaki te. Azalaki kaka kondima. Azalaki na motema molai na Nzambe. Ha-ha.

²³⁶ Bótiaka Ye ntango nyonso liboso na bino. Bótika Ye ázala likambo mpenza oyo elandi. Bokoki koleka liboso na Ye te, na boye, bóbatela Ye liboso na bino. “Ye nde alobaki bongo, pe ekokosalema.” Bomoni? Bóbatela Ye liboso na bino. Ya solo.

²³⁷ Nowa azalaki na motema molai. Iyo. Nowa azalaki mpenza na motema molai ya bonzambe. Nzambe alobaki: “Nakoboma mokili oyo na mbula,” pe, Nowa ateyaki naino mibu nkama na ntuku mibale. Motema molai mingi. Ata mamwe ekitaki uta na Likolo te. Eloko moko ezalaki te. Ezalaki bobele putulu ndenge ezalaká, mibu monkama na ntuku mibale, kasi azalaki na motema molai.

Na bongo, Nzambe amekaka motema molai na bino. Ya solo. Nzambe amekaka yango.

²³⁸ Na sima Alobaki na Nowa, sikawa Alobaki: “Nowa, Nalingi ete ókende liboso, pe ókota na masuwa. Ngai nakokamba banyama bákota kuna, pe Na—Nalingi ete yo ókota. Sikawa, matá bibuteli kuna likolo, mpo ókoka kotala libanda, na lininisa ya likolo. Sikawa, Nalingi ete ókota kuna. Nalingi ete óyebisa bato oyo: ‘Lobi, likambo oyo nazalaki koteya na mibu monkama na ntuku mibale, ekosalema.’ Malamu, kende kuna pe yebisa bango.”

239 Elemba ya liboso ezalaki nini? Nowa akotaki na masuwa. Mbula ezalaki te. Nowa amilengelaki, alataki monkóto ya mbula, pe nyonso wana, mpo ákoka kotalaka libanda, mbala na mbala. Amilengelaki. Kasi na mokolo oyo elandaki. . .

240 Nabanzi ete akokaki koyebisa libota na ye, ná babokilo na ye ya basi pe bango nyonso, alobaki: “Oh! la la! Lobi bokomona likambo moko oyo botikálá komona ata moke te. Mpamba te, bisika nyonso na likolo ekoyinda. Nkake pe mikalikali ekozala. Mopanga monene ya Nzambe ekopasola likolo. Akopesa etumbu na basumuki oyo baboyaki biso, na mibu monkama na ntuku mibale nyonso oyo. Bino bótala kaka, bokomona.” Bomoni?

241 Bandimi mosusu ya maloba, boyebi, baoyo bateleganaka zingazinga, batikalaka kokota te, boyebi. Ba—bazalaka pe kaka, boyebi. Boye ba—bapusanaki wana, balobaki: “Ee, ntango mosusu mobangé yango azalaki na ye koloba sólo, boye tokokende kuna pe tokozela mwa mikolo, to tokozela mwa bangonga na ntongo, pe tótala.”

242 Na mokolo oyo elandaki, na esika ya mapata ya moindo, tala moi nde ebimaki kaka ndenge esalaka ntango nionso. Nowa atalaki libanda. Alobaki: “Hé, lipata moko ezali te.”

243 Elenge mobali yango apusanaki, alobaki: “Ah, nayebaki ete ozali moko na bango. Omoni, ozali nde kotelengana zingazinga awa.”

244 “Ee, limbisa ngai, misie. Ha-ha. Ntango mosusu na—na—nazalaki kaka na, oyebi, kaka na esengo nde, oyebi. Tóloba bongo, omoni. Ha-ha-ha.”

245 Kasi, Nowa, azalaki na motema molai. Alobaki: “Soki yango eyei lelo te, ekoya lobi.” Mpo na nini? Nzambe alobaki bongo.

“Ntango nini Ye ayebisaki yo yango, Nowa?”

246 “Eleki mibu monkama na ntuku mibale. Nakomi kino awa, sikawa, boye ngai nazali bobele kozela awa.” Bomoni yango? Sima na mwa ntango. . .

247 Tomoni, Nzambe akomi kino awa, azali kozela pe Lingomba, kasi Ekokóma wana. Bómitungisa te. Alakaki Yango.

248 Tozali kozela lisekwa ntango nyonso oyo. Ekosalema. Bómitungisa te. Nzambe alakaki yango. Bózela kaka na motema molai nyonso. Soki bolali mpongi, yango eko. . . Okoki ntango mosusu kozua mwa mpongi liboso ete ésalema, kasi okolamuka na ngonga yango. Alakaki yango, bomoni. Mwa mpongi, bomoni, oyo tobengaka mwa mpongi ya liwa, boyébi. Oyo tobengaka liwa, ezali bobele mwa mpongi moke, to kolala kati na Klisto. Kokufa kati na Klisto ezalaka te. Bomoi ná liwa ezalaka esika moko te. Bomoni? Tozuaka bobele mwa mpongi, mwa mpongi oyo baninga na biso bakoki kolamusa biso na yango te. Kaka Ye nde akoki kolamusa biso. “Akobenga, pe nakoyanola Ye,” ndenge Yobo alobaki. Yobo azali kolala sikawa, eleki mibu nkoto minei.

Bómitungisa te. Ako—akolamuka. Bómitungisa te. Azali kaka kozela.

²⁴⁹ Nowa azelaki. Mokolo ya minei elekaki. Mbula te. Ezali likambo te. Ekokokisama.

²⁵⁰ Nakoki koyoka Madame Nowa kopusana pembeni pe koloba: “Papa, ozali mpenza ko- . . . ?”

“Koloba bongo te.”

²⁵¹ Azalaki na motema molai, mpo azalaki na kondima. Iyo, misie. Azalaki na nguya. Azalaki na boyébi ete Nzambe azali na elonga. Azalaki na komipekisa. Atombokaki te mpo na koloba: “Ee, nayebi te ntina na makambo nyonso oyo. Nabungisi lokumu na ngai nyonso kuna.” Te, te. “Bato bazali lisusu kokipé ngai te. Nakokende na ngai kuna mpo na kobandela nyonso, lisusu.” Te, te. Azalaki na motema molai. Nzambe alakaki. Nzambe akosala yango. Nzambe akosala yango, mpo Nzambe alobaki bongo.

²⁵² Pe nakoki komona mwana na ye koya, koloba: “Papa, oyebi. . .” Alekisi loboko na suki na ye milai, ya mpembe, boyébi. Pe azalaki na mibu nkama na nkama, boyébi, afandaki wana. Alobaki: “Nayebi ete ozali mobange tata ya libota. Na—nalingaka yo, papa. Kasi, ekokaki kosalema ete okoki kozala na libunga mwa moke?”

“Oh, te. Te.”

“Mpo na nini?”

“Nzambe alobaki bongo!”

²⁵³ “Ee, papa, mikolo motoba yango oyo tofandi awa. Tofandi na kati ya masuwa monene oyo, ya kokauka, tofandi kaka awa. Pe epakolami mpaka, na kati pe libanda. Pe tolekisi mibu nyonso oyo kotongáká yango. Pe yo ozalaki kotelema wana pe ozalaki koteya, kino suki na yo ekómi mpembe pe obimi libandi. Pe tala yo oyo sikawa, ozali komeka koloba likambo *boye na boye*. Pe bato bazali koseka, kobambáká ba-tomate ya kopola pe biloko mosusu na mpanzi na yango. Tala kuna makambo ozali kosala. Ee, oyebi. . .”

“Zala na motema molai, mwana.”

“Ondimi solo mpenza?”

“Mbula ekobeta!”

Bokilo na ye ya mwasi alobaki: “Tata, oyebi. . .”

“Mbula ekobeta!”

²⁵⁴ “Kasi tozali kozela mibu nyonso oyo. Tozalaki komilengela. Pe eleki mposho moko, oyebisaki biso ete mbula ekobeta. Pe tozali na kati awa, bikuke nyonso ekangami, tala tokómi kaka kobaluka-baluka na kati awa, pe moi ezali kaka kongala ndenge ezalaka.”

“Kasi mbula ekobeta!”

“Oyebi yango ndenge nini?”

“Nzambe alobaki bongo!”

²⁵⁵ Sikawa, soki okómi bongo, bakisa yango. Kasi soki okómi bongo te, komeka—komeka kobakisa yango te. Ekosimba te. Ekosimba te na lobiko na nzoto. Ekosimba te na eloko mosusu. Bomoni? Esengeli ésangisana na eloko ndenge moko oyo esangisami na yango. Ya solo. Osengeli kobakisa yango. Motema molai na elaka na Nzambe. Iyo, misie. Nowa andimaki yango. Pe azalaki na motema molai na Nzambe, mibu monkama na ntuku mibale.

²⁵⁶ Mose, azalaki na motema molai na Nzambe. Iyo, misie. “Mose, Nayoki kolela ya libota na Ngai. Namoni monyoko na bango. Nakiti mpo na kosikola bango. Nakotinda yo kuna.”

²⁵⁷ Pe mwa kobendana ezalaki kati na ye ná Nzambe, pe Nzambe alakisaki ye nkembo na Ye. Alobaki: “Tala nakei.” Kaka ntango amonaki nkembo na Nzambe, bomoni, azuaki kondima.

Alobaki: “Eloko nini ezali na loboko na yo, Mose?”

Alobaki: “Lingenda.”

Alobaki: “Bwaka yango na nse.”

Ebongwanaki nyoka. Alobaki: “Oh! la la!” Abandaki. . .

²⁵⁸ Alobaki: “Lokota yango, Mose. Soki Nazali na makoki ya kobongola yango nyoka, Nakoki pe kozongisa yango.”

²⁵⁹ Ah! [Ndeko Branham abeti maboko mbala misato—N.D.E.] Amen! Soki Nzambe akoki kopesa ngai bomoi ya mokili oyo, Akoki pe kopesa ngai Bomoi ya molimo! Soki Nzambe akoki kopesa ngai mbotama ya liboso, Akoki pe kopesa ngai mbotama ya mibale! Amen! Soki Nzambe akoki kobikisa *oyo*, na nzela ya lobiko na nzoto kouta na Nzambe, Akoki pe kosekwisa yango mpo na nkembo na Ye, na mokolo ya suka. Ya solo.

²⁶⁰ “Nakoki kobwaka lingenda oyo na nse pe kobongola yango nyoka. Nakoki pe kozongisa yango lingenda. Lokota yango na mokila.”

²⁶¹ Mose asembolaki loboko pe azuaki yango. Ezongaki lingenda. Abandaki kobakisa boyébi esika wana. Bomoni?

“Eloko nini ekómeli loboko na yo, sikawa, Mose?”

“Eloko te.”

“Tia yango na ntolo na yo.”

²⁶² “Malamu. Bongo mpo na . . .” Mpembe na bokono ya mbala. “E Nkolo, tala loboko na ngai!”

“Zongisa yango na ntolo na yo, Mose.”

²⁶³ Azongisaki yango *boye*, ezongaki kaka ndenge. . . Abandaki kaka kobakisa yango *boye*, na bongo, bomoni. Iyo, misie.

264 Akómaki kuna. Pe kobendana ya liboso . . . Akómaki kuna. Akómaki kuna pe alobaki: “Nkolo Nzambe alobi: ‘Tika libota na Ngai bakende.’ Falo, nalingi ete óyeba yango. Naye lokola ntoma ya Nzambe. Osengeli kotosa ngai.”

265 Falo alobaki: “Kotosa? Oyebi ngai nazali nani? Nazali Falo. Kotosa yo, yo moombo?”

266 Alobaki: “Okotosa ngai, soki te okokufa. Okopona oyo olingi.” Mpo na nini? Ayebaki oyo ye azalaki koloba. Azalaki na etinda. Autaki kuna. Asololaki na Nzambe. Azalaki na kondima. Ayebaki esika atelemaki.

“Olingi ete ngai nátosa yo? Longwa awa!”

“Nakolakisa yo.”

“Lakisa ngai elembo.”

Abwakaki lingenda na nse; ebongwanaki nyoka.

267 “Oh,” alobaki, “kisoloka ya pamba-pamba wana! Bóya naino awa. Bóya awa, Yane, yo ná Yambele, bóbwaka mangenda na bino na nse.” Babwakaki yango na nse, pe ebongwanaki nyoka.

268 Alobaki: “Sikawa, yo moto mpamba oyo, óya awa epai na ngai, Mo-ezipito, falo ya Ezipito. Pe oyei awa ná mwa kisoloka na yo ya pamba-pamba, ná makambo ya lokuta,” boyebi, lokola kotanga makanisi. Boyebi oyo nalingi koloba. Nabanzi ete bozali kososola yango. “Telepatí ya makanisi to eloko moko boye, bomoni, iyo, oyei awa ná eloko ya ndenge wana.” Alobaki: “Ee, biso pe tokoki kosala eloko moko oyo ozali kosala.”

269 Mose asalaki nini? Alobaki te: “Oh, Misie Falo, li—limbisa ngai, misie. Nakozala moombo na yo.” Te, misie.

270 Afandaki kimia. Amen. Tikala bobele wana. Azalaki na ntembe moko te na motema na ye, Nzambe alobaki: “Fanda kimia. Nakolakisa yo eloko moko.” Na ntango osali mpenza oyo Ye ayebisaki yo ósala, kasi emonani lokola ete etamboli malamumu te; fanda kimia, zala na motema molai.

271 Mose alobaki: “Oyebi, ntango natiaki mobóko wana, motema molai pe etiamaki kuna, boye nakozela kaka mpo námona oyo Nzambe akosala.”

272 Kuna, banyoka ya kala yango, ezalaki konguluma-nguluma, kofúláká pe kopióláká moko na mosusu. Na mbala moko, nyoka ya Mose esalaki: “Kyu, kyu, kyu,” pe emelaki bango nyonso. Azalaki na motema molai.

Baoyo batalelaka Yawe, bakozua nguya ya sika,
Bakopumbwa likolo na mapapu lokola mpongo.

Ezali bongo? [Losambo balobi: “Amen.”—N.D.E.] Bomoni? Iyo.

Bakopota mbangu pe bakolemba te,
bakotambola pe bakosenzwa te.

Bomoni, bótaalelaka bobele Nkolo. Bozalaka na motema molai. Bomoni? Iyo, misie.

273 Na bongo, Yisalaele alingaki kobima. Kobendama monene eyaki, pe Mose azelaki.

274 Na bongo akómaki na biliki. Ezali bobele mobembo ya mikolo misato to minei. Ezali bobele na ntaka ya kilometele ntuku motoba kolongwa na esika oyo akatisaki, kaka na esika oyo bakatisaki lisusu. Kasi, Mose, na biliki, azelaki mibu ntuku minei. Motema molai. [Ndeko Branham aseeki—N.D.E.] Amen. Ya solo. Azelaki mibu ntuku minei. Oh! Iyo, misie.

275 Bisó pe tosengeli kozala na motema molai bamoko na bamosusu. Bomoni? Ntango moko. . . Tokómaka—tokómaka na motema mokuse mingi bamoko na bamosusu. Tokanisaka ete tosengeli kozala lokola Mose. Mose azalaki na motema molai na bato. Botala, yango nde esalaki ete bakatisa te. Bomoni? Soki ozali komeka kosala likambo moko. . .

276 Ndakisa, namekaki kosala ete losambo basosola Liteya oyo, mpo na komona ete mondimi moko na moko ya losambo oyo ákóma *Boye*. Ezali mpasi mpo na kosala yango. Nameká kozala na motema molai; mbula ntuku misato na misato yango oyo. Bomoni? Kozala na motema molai. Basi bazali kaka kokata suki na bango, kaka ndenge moko. Kasi zálá kaka na motema molai. Bomoni? Zálá kaka na motema molai. Kozela. Osengeli kozela. Soki ozali na yango te, komeka kotonga likolo *awa* te. Zala na motema molai.

277 Kutu, mokolo moko, ntango etóna ya batomboki wana bazangaki motema molai mpenza, basalisaki Mose libunga moko. Kasi, ata bongo, na ntango esengaki kosukisa likambo, Nzambe alembaki makambo na bango. Alobaki: “Kabwana na bango, Mose. Nakoboma bango nyonso, pe kobandela sika.”

278 Amibwakaki na kati-kati, pe alobaki: “E Nzambe, kosala yango te.” Nini? Motema molai epai na bato oyo bazalaki kotombokela ye.

279 Nazali komituna soki biso tokoki kosala yango? Soki okokoka te, komeka kotonga likolo na *oyo* te, mpo e—ebongwanaka te, boyébi. Ndenge wana nde oyo ya liboso esanganaki na *oyo*, pe ndenge wana nde nyonso mosusu esengeli kosanganana. Soki te, okokóma na epimelo ya efandelo ya Nzambe na bomoi te, soki bozali na motema molai te, motema molai, bamoko na bamosusu. Malamu.

280 Bana ya Baebete bazalaki na motema molai. Na ntembe te, bazalaki na yango. Nzambe alakaki bango, ayebisaki bango: “Bókumbamela ekeko moko te.” Kasi bazalaki na motema molai. Balobaki: “Nzambe na biso azali na makoki. Kasi, ata bongo,

tokokumbamela ekeko na bino te.” Motema molai, bayebaki yango, ete Nzambe akosekwisa ye na mikolo na suka.

281 Kútu, bomoi oyo ezali mpenza na ntina te. Bomoni? Nzambe akosekwisa yango na mikolo na suka. Kasi mpo na kokumbamela ekeko, tokosala yango te. Sikawa, tokopesa na Kaisala oyo ya Kaisala, kasi, soki Kaisala amikotisi na makambo ya Nzambe, Nzambe nde liboso.

282 “Nzambe alobaki: ‘Bókumbamela ekeko wana te.’ Pe nakosala yango te. Nzambe na biso azali na makoki ya kosikola biso. Soki Asali yango te, nakokumbamela ekeko yango te.”

Alobaki: “Malamu, litumbu na móto yango wana.”

283 “Ee,” alobaki, “oh, nabanzi, mbula makasi ekobeta na butu pe ekoboma móto yango.” Kasi esalemaki te. Bazalaki kaka na motema molai.

284 Na ntongo oyo elandaki, ntango bamemaki bango liboso na esambiselo, Nabukadanesala afandaki wana. Alobaki: “Malamu, bana, bobele mi mpo na kondima ngai lokola mokonzi na bino?”

“Na ntembe te. E mokonzi, wumela libela.”

“Sikawa bókumbamela ekeko na ngai.”

“Oh, te.”

285 “Ee, bokozika na móto. Bozali bato na bwanya. Bozali na mayele mingi. Bozalaki lisungi monene mpo na biso. Bozalaki lipamboli mpo na bokonzi na biso. Bokoki kososola te ete nazali na mposa ya kosala yango te? Kasi nasili kopesa motindo awa, pe esengeli kotosama. Pe nazali na mposa ya kobwaka bino na kati te. Oh, mibali, likambo nini na bino?”

286 “Nayebi ete ezali komonana malamau. Kasi, Nzambe na biso azali na makoki ya kosikola biso. Kasi ata bongo . . .” Bazalaki na motema molai.

287 Babandaki komata ebuteli yango. Moko atalaki mosusu. “Ezali malamau. Malamau.” Bazalaki na motema molai. Batiaki litambe moko, Nzambe azalaki wana te. Matambe mibale, Azalaki wana te. Matambe misato, matambe minei, matambe mitano, bakobaki kokende, Azalaki kaka wana te. Pe mbala moko akoti kati na litumbu ya móto. Bazalaki na motema molai. Kasi Azalaki wana. Bomoni? Bobele mwa móto ezuaki bango, mpo na kozikisa ba-nsinga oyo ekangaki maboko pe makolo na bango. Na bongo ntango akómaki na nse ya libulu, Azalaki wana. Bomoni? Bazalaki na motema molai.

288 Ndenge moko na Daniele. Daniele azalaki na motema molai. Na ntembe te. Alingaki kotika te. Te, misie. Asalaki nini? Afungolaki maninisa yango pe abondelaki, ata bongo. Ezalaki lotomo ya Nzambe. Azalaki na motema molai. Atalelaki Nzambe, ayebaki ete Nzambe azalaki na makoki ya kokokisa

Liloba na Ye. Babwakaki ye na libulu ya ba-nkosi, balobaki: “Tokotika ba-nkosi bália yo.”

289 Alobaki: “Ezali likambo te.” Azalaki na motema molai. Mpo na nini? “Ee, natalelaki Nzambe, na ntango nyonso oyo. Soki nasengeli kozela lisusu mibu nkoto na nkoto, nakosekwa na mokolo ya suka. Boye, nazali na motema molai, nakozela.”

290 Polo azalaki na motema molai. Ya solo mpenza. Botala makambo oyo Polo asengelaki kosala. Likambo ya motema molai!

291 Bongo bato na Pentekote? Na ntango nyonso oyo bazalaki na etinda oyo: “Bozela kino,” bomoni, “bozela kino bokotondisama na Nguya.” Ntango boni? Batunaki mituna te: “Ekoumela ntango boni?” Bazuaki bobele eyano: “Bozela kino.”

292 Bamataki kuna pe balobaki: “Malamu, bandeko, ntango mosusu sima na miníti zomi na mitano, Molimo Mosantu akokita likolo na biso pe tokozua mosala na biso ya koteya.” Miníti zomi na mitano eleki, moto moko te. Mokolo moko eleki, eloko te; mibale, misato, minei, mitano, motoba, nsambo.

293 Bamosusu kati na bango bakokaki koloba: “Hé, bomoni te ete tosili kozua Yango?”

“Te, te, te, te.” Yango nde. Te. Ya solo.

294 “Malamu bóbima libanda, bandeko.” Zabolo alobaki: “Bo—bo—boyebi ete bosili kozua oyo bozali na yango mposa. Bokende kobanda mosala na bino ya koteya.”

295 “Te, te, te. Naino tozui Yango te. Mpamba te, Alobaki: ‘Ekosalema ete, likambo oyo ekokokisama na ntango ya suka: Na bibebu na likukuma pe na minoko mosusu nde Nakoloba na bato oyo, yango nde Kopema oyo Nalobaki,’ bomoni, Yisaya 28:19.” Alobaki: “Ezali—ezali Yango, bo—bokozua Yango ntango. . . Ee, tokoyeba ntango Ekoya. Tokoyeba ntango Ekoya. Tokoyeba yango, ‘Elaka ya Tata.’” Azalaki kuna mikolo libwa. Na sima, na mokolo ya zomi: “Tozalaki wana.” Bazalaki na motema molai, mpo na kozela.

296 Sikawa, soki ozali na motema molai ya ndenge wana, sima na Nzambe kopesa yo elaka pe omoni yango na Biblia: “Ezali ya ngai,” na boye zela. Na bongo, soki ozali na motema molai ya ndenge wana, bakisa yango na kondima na yo. Pe omoni na mosanda nini okómi sikawa? Okómi na likolo mpenza *awa* sikawa. Malamu. Likongá ya saa ezali pe kotambola, boye te? Malamu. Malamu. Bakisa oyo na kondima na yo.

297 Kotiaka Ye ntango nyonso liboso na yo, komikaniselaka, ete Ye nde apesaki elaka wana. Ezalaki ngai te moto napesaki elaka. Ezalaki mokengeli te moto apesaki elaka, Ndeko na biso Neville. Ezalaki motei mosusu te nde apesaki elaka. Ezalaki sángo moko to pápa te. Ezalaki moto ya mabele te. Ezalaki Nzambe nde apesaki elaka, pe Nzambe azali na makoki ya kokokisa nyonso

oyo Ye alakaki. Malamu. Soki ozali na kondima ya ndenge wana, ya koyeba ete Nzambe nde alakaki yango! Okoloba: “Ndeko Branham, nazali kobela. Nazali na mposa makasi ya lobiko na nzoto.” Yamba yango. Ezali likabo oyo epesameli yo, iyo, misie, soki okoki kondima. “Ee,” okoloba, “nandimi mpenza.” Boye bosana likambo yango. Esili. Esili na yango. Omoni?

²⁹⁸ Zala na motema molai, soki ozali na motema molai. Soki te, okokweya pe okobukana uta na Ndako yango, bomoni. Ekokweisa nyonso oyo etikali, eloko moko wana. Osengeli kozala na yango. Kobakisa yango te, mpo, ekobuka ndako na yo soki ozangi motema molai, soki ozali na nguya ya kobakisa na kondima na yo te, oyo olobaka ete ozali na yango. Pe soki ozali na kondima te, kasi omeki kobakisa nguya likolo na yango, ekobuka kondima na yo. Omoni? Okoloba: “Ee, sikawa, zela naino. Ntango mosusu, nyonso oyo ezali kaka libunga, ata bongo. Ntango mosusu Nzambe azali Nzambe te. Ntango mosusu Nzambe azalaka te.” Bomoni, ekobuka eloko yango na biteni mibale. Bomoni?

²⁹⁹ Kasi soki ozali na kondima ya solosolo, na bongo bakisa nguya ya solosolo likolo na yango, na sima boyébi ya solosolo, na sima komipekisa oyo ya solosolo, na sima motema molai oyo ya solosolo. Bomoni? Ozali kaka komata likolo. Malamu.

³⁰⁰ Ya mitano, bakisa bosantu. Oh! la la! Bosantu nde esengeli kobakisama. Bosantu elingi koloba nini? Natalaki na ba-dictionnaire minei to mitano, kasi namonaki ata ndimbola na yango te. Sukasuka, nazalaki kuna epai ya Ndeko Jeffrie, tomonaki yango na—na dictionnaire moko. *Bosantu* elingi koloba “kozala lokola Nzambe.” Oh! la la! Sima na yo kozua kondima, nguya, boyébi, komipekisa, motema molai, na sima, zala lokola Nzambe. Fiuu!

³⁰¹ Okoloba: “Nakokoka te, Ndeko Branham.” Oh, iyo, okokoka.

³⁰² Bótika nátangela bino mwa Makomi awa, kaka miníti moko. Matai 5:48. Tokozua oyo boye pe tómona oyo yango elobi, Matai 5:48, bongo totala soki moto asengeli kozala lokola Nzambe. Boyébi ete Biblia elobi: “Bozali ba-nzambe.” Yesu nde alobaki bongo. Mpo na nini? Nguya nyonso, nyonso oyo ezali kati na Nzambe, ezali kati na bino. Matai 5:48: “Tika ete bozala...” Yesu nde azali koloba, kati na mapamboli.

Tika ete bozala m-a-l-a-m-u b-e, (Ezali nini?) malamumu be, lokola Tata na bino... na likolo azali malamumu be.

³⁰³ Okómi sikawa na likolo *awa*, liboso esengamela yo kosala yango. Nyonso oyo esengeli kobakisama liboso. Na sima, ntango okómi na likolo awa, Asengi na yo sikawa ete ózala malamumu be, bosantu, bana mibali pe bana basi ya Nzambe. Ya solo. Nakokaki koloba makambo mingi mpenza ya molongo wana!

³⁰⁴ Tózua Baefese 4, pe tótala yango awa, na Buku ya Baefese, eloko oyo elobami pe na ntina na likambo oyo, na ntina na

ndenge tosengeli—ndenge tosengeli kosala. Efese, mokapo ya 4, kobanda na molongo ya 12. Baefese 4, kobanda na molongo ya 12. Malamu. Tobanda awa na molongó ya 11.

Apesi bamoko lokola bantoma, bamosusu basakoli, . . .

305 Bozali koyeba lisusu lobi na mpokwa eleki? Koluka kosala mosala ya moto mosusu te. Bomoni?

*. . .pe bamosusu bapalanganisi nsango malamumu,
bamosusu babateli . . .pe bamosusu balakisi,*

306 “Mpo na kobongisama ya Nzambe”? Ekomami ndenge wana? [Losambo balobi: “Te.”—N.D.E.] Kobongisama be ya nini? [“Babulami.”] Babulami ezali banani? Baoyo babulisami. Amen. Baoyo babandaki na nse *awa*.

*. . .kobongisa babulami, mpo na mosala na kosungaka
(mosala ya Yesu Klisto), mpo na kolendisaka nzoto na
Klisto (mpo na kolendisaka, kotonga Yango, kolendisaka):
kino . . .*

*Kino ekokóma biso nyonso kati na bomoko ya
kondima, pe . . . boyébi ya Mwana na Nzambe, pe kino na
mobali mobimba, kino na elikia (oh! la la!), na epimelo
na lolenge na litondi ya Klisto,*

307 “Kobonga be” esengaka bosantu. Na kondima na yo, osengeli kobakisa bosantu. Bomoni, obandi na nse *awa*, na nguya. Na sima okei na boyébi. Na sima okei na komipekisa. Na sima okei na motema molai. Sikawa okómi na bosantu. Bosantu! Oh! la la! Ntango na biso ezali kokende mbangu. Totala naino. Kasi boyébi oyo bosantu elingi koloba. Boyembaka loyembo oyo:

*Kozala lokola Yesu, kozala lokola Yesu,
Na mokili, nalingi mpenza kozala lokola Ye;
Na mobembo ya bomoi na mokili kino na
Nkembo
Nasengi bobele kozala lokola Ye.*

308 Yango nde bosantu. Ntango babetaki Ye na litama moko, Apesaki oyo mosusu. Ntango balobelaki Ye maloba makasi, Alobaki te. Azongisaki na kofinga te. Bomoni? Bosantu, koluka ntango nyonso eloko moko: “Nasalaka ntango nyonso makambo oyo esepelisaka Tata.” Bomoni? Iyo, misie. Ntango nyonso. Yango nde bosantu. Bomoni?

309 Sima na yo kouta *awa*, kino *awa*, kino *awa*, kino *awa*, kino *awa*, kino *awa*, sikawa obandi kokóma na epimelo mobimba ya mwana na Nzambe. Kasi osengeli kozala na *oyo*, bakisá nyonso *oyo*, pe okoki ata kobanda te soki naino ozui *oyo* te.

310 Sikawa bókanisa lisusu ndeke oyo merle na nsala ya paon. Bóbosana ye te. Bomoni? Komeka kobakisa yango te, soki obotami mpenza mbala na mibale te. Mpamba te, yo, ekosimba te, pe o—okoki kosala te ete ésimba. Ekokóma kino *awa*, to *awa* boye, ekopanzana na esika moko.

311 Kasi, soki okiti *awa*, ebenga ya solosolo oyo abotami mbala na mibale, na ntango wana okobakisa eloko moko te. Yango nde ekobakisamela yo, bomoni, emati, malamumu, kino na kobonga be, sikawa. Malamumu.

312 Na sima, ya motoba, tóbakisa, Biblia elobi awa, tóbakisa bolingo na bandeko. . . boboto na bandeko. Sikawa, wana ezali ya malamumu, awa, oyo ya motoba, nsambo. Malamumu. Bakisa boboto na bandeko. Malamumu. Soki tokómi wana, na boboto na bandeko, mitia na esika na ye, na likambo yango. Sikawa okoloba. . .

313 “Ndeko na ngai asaleli ngai mabe,” ndenge Petelo alobaki. “Nasengeli kolimbisa ye,” alobaki, “mbala sambo na mokolo?”

Alobaki: “Ntuku nsambo mbala nsambo.” Bomoni?

314 Boboto na bandeko. Sikawa, bomoni, soki ndeko moko atomboki makasi, kozala na motema mokuse te ná ye. Bomoni? Te. Bomoni? Zala na boboto epai na ye. Kende, ata bongo.

315 Moto moko alobaki, eumeli te, alobaki: “Ndenge nini okoki kondima makambo oyo ndenge ókodima yango, kasi ozali kaka kokende epai ya ba-Assemblée de Dieu, ba-Unitaire, pe bamosusu nyonso?” Na sima, tia, bomoni, boboto na bandeko. Bomoni? Bomoni? Na elikia ete, mokolo moko, bomoni; zala na motema molai epai na ye, bomoni; na komipekisa, koyikela ye mpiko; boyébi, mpo na kososola oyo ye andimaka, kobosana te, ezali kati na motema na ye, yango wana nde; nguya, kati na yo, mpo na kobimisa yango na boboto, na bopolo, epai na ye; kozala na kondima ete mokolo moko Nzambe akokotisa ye. Bomoni?

316 Boboto na bandeko, likambo ya nsambo. Moko, mibale, misato, minei, mitano, motoba, nsambo. [Ndeko Branham abeti na etánda mbala nsambo—N.D.E.] Bomoni, likambo ya nsambo. Bongo, sikawa, okómi.

317 Likambo oyo elandi, na sima, bakisa kolinga, elingi koloba bolingo. Yango nde libanga ya motó. Moko na mikolo oyo, kati na lingomba. . .

318 Sikawa, nalómbi na bino, tika ete baoyo bazali kolanda na bande báyebe, pe na bisika nyonso, ete nazali koteya yango lokola malakisi te, likambo oyo nalingi náloba sikawa. Kasi nalingi bobele kolakisa bino yango, na lisungi na Nzambe, oyo yango ezali mpenza, ete Biblia ya liboso oyo Nzambe akomá ezalaki Zodiak na likolo. Ebandi na mongondo. Esuki na Leo, nkosi. Pe ntango nakokóma na Elembo ya Motoba pe ya Nsambo, bokomona ete, ntango Elembo mosusu wana efungwamaki, elembo ya Zodiak ya esika wana ezalaki cancer, mbisi oyo ekutani. Pe yango nde eleko ya canser oyo tozali kobika kati na yango sikawa, emonisami. Pe likambo elandi oyo Elembo yango efungolaki, Emonisaki Leo nkosi, Boyei ya mibale ya Klisto. Ayaki, mbala ya liboso, na mongondo; Akoya, na sima, Leo, nkosi. Nakomema yango na. . .

319 Sikawa, nayebi te soki nakozua ntango na ntongo oyo. Nakosala nyonso oyo nakokoka, mpo nálakisa bino ete bibuteli oyo ezali kati na ba-piramíde, ndenge moko mpenza, Biblia ya mibale oyo Nzambe akomá. Enok moto akomá yango, pe atiaki yango kati na piramide.

320 Pe ya misato, Nzambe abongaka be ntango nyonso na misato, na sima amikomisasi Ye moko Liloba na Ye.

321 Awa, sikawa, bobosana te, na piramide. . . Nakanisi mingi kati na bino, basodá pe bamosusu, bosílá kokende na Ezipito. Piramide ezali na libanga ya motó likolo na yango te. Etikálá kozala te. Bazali na li—Libanga ya Scone, pe nyonso mosusu, kasi ata bongo. . .

322 Soki ozali na lokasa ya dollar moko na libenga na yo, tala lokasa ya dollar yango, okomona ete, na ngámbo ya mobali, ezali na mpóngo ná bendele ya Amerika. Pe elobi, elembo “ya Etats-Unis.” Na ngámbo mosusu, ezali na piramide, ná libanga monene ya motó pe liso ya moto. Na ngámbo yango elobi: “Elembo monene.” Ee, soki oyo ezali ekólo monene, mpo na nini elembo monene oyo ekozala elembo ya ekólo yango moko te? Nzambe nde asali ete bátatola, ata soki bakei wapi.

323 Mokolo moko, nazalaki kosolola na monganga moko, azalaki kolobela ngai makasi mpenza, na ntina na lobiko na nzoto kouta na Nzambe. Totelemaki na balabala. Alobaki: “Misie Branham, yo ozali kaka kotia bato na mobulu.” Alobaki: “kobikisama na bokono ezalaka te, libanda na nkisi ya monganga.”

324 Esalemaki ete nabaluka, natalaki elembo oyo ezalaki na motuka na ye, ezalaki nyoka likolo na likonzi. Nalobaki: “Boye, malamú ólongola elembo wana na motuka na yo, mpamba te elembo na yo moko ezali kotatola ete Nzambe azali Mobikisi.”

325 Monganga ya solo mpenza andimaka yango. Bango bazali minganga ya lokuta. Iyo, misie. Nyoka likolo na likonzi! Mose atombolaki nyoka yango likolo na likonzi. Alobaki: “Nazali Yawe oyo abikisaka malali na yo nyonso.” Pe bazalaki kotala nyoka yango, mpo na lobiko na nzoto kouta na Nzambe. Kasi, ata bongo, bazali kotemela yango; nzokande, elembo na bango moko ezali kotelemela bango. Fiuu!

326 Tala, ekólo na biso, bákolobáká oyo bazali koloba, pe bákotioláká makambo oyo, kasi mbongo na bango moko, mosolo na bango, ezali kotatola ete elembo ya molóngó mobimba ezali Nzambe. Bomoni liso oyo ezali likolo na yango, likolo na lokasa ya dollar moko? Yango nde elembo monene.

327 Etikálá kotiamá likolo na piramide te. Bakokaki kososola te mpo na nini. Libanga ya motó eboyamaki, Motó, Klisto. Kasi mokolo moko, Ekoya.

328 Sikawa, na kotongáká, nguya. . .Kotonga ndako oyo, kotonga epimelo oyo, bomoni, ebandaka na libanga ya mobóko;

kondima, nguya, boyébi, komipekisa, motema molai, bosantu, boboto na bandeko. Sikawa, esalaka nini? Na sima, ezelaka Libanga ya motó, oyo ezali bolingo, mpo Nzambe azali bolingo. Pe Ye nde akonzaka, pe Ye nde makasi ya biloko yango moko na moko. Ya solo. Iyo, misie.

329 *Awa* na kati mpenza, *awa* na kati mpenza, bomoni natie, na katikati, misala nyonso wana *awa* na kati, pe *awa* mwa bambonge yango eyaki. Ezali nini? Kokita ya Molimo Mosantu, na nzela na Klisto, bomoni. Molimo Mosantu! Molimo Mosantu ezali likolo na nyonso *oyo*, ezali kosangisa yango esika moko, mpo na kotonga (nini?) Lingomba oyo ebongi be, mpo Libanga ya motó ékita likolo na Yango.

330 Esali lisusu nini? Emonisami kati na Bileko Nsambo ya Lingomba, na nzela na batíndami nsambo na Lingomba.

331 Ebandaki *awa*. Lingomba ebandisamaki liboso wapi? Lingomba ya pentekote ebandisamaki liboso wapi? Na nzela na Santu Polo, na Efese, monzoto ya Eleko na Lingomba ya Efese, Efese.

332 Eleko ya Lingomba ya mibale ezalaki Sumulana. “Nguya.” Irénéé, moto monene oyo asimbacki Nsango Malamu ya Polo.

333 Eleko ya Lingomba oyo elandi ezalaki Pelegamo, oyo ezalaki Martin. Martin nde azalaki moto monene oyo atelemaki ngwi. Polo, Irénéé, Martin.

334 Na sima, na Twatila, Colomba ayaki. Boyebi lisusu? Yango oyo, eyemami *wana*. Colomba. Sima na Colomba. . . Bileko ya Molili ebandaki wana.

335 Na sima, Salade eyaki, oyo elingi koloba *mokufi*. Luther. Aleluya! Na sima nini? Nini elandaki, sima na Salade, Luther?

336 Na sima, Filadelefi eyaki. “Bosantu.” Wesley, bosantu! “Moyengebeni akobika na kondima,” ndenge Luther alobaki. Kobulisama na nzela na Wesley.

337 Na sima boboto na bandeko eyaki, na nzela na Laodikia. Pe tondimi ete Nsango monene ya komonana ya mibale ya Eliya, na ntango ya suka, ekokende ekolo mobimba.

338 Yango oyo, Bileko Nsambo ya Lingomba, bibuteli nsambo. Nzambe azali kotonga Lingomba na Ye, ezali lokola moto moko kati na moto, kati na Ye moko. Nkembo, Nguya ya Nzambe, ezali kokitela na nzela *oyo*, kosangisa Yango esika moko. Yango wana, ba-Pantekotiste oyo batii ba-Lutherien pembeni, batii ba-Wesleyen ná bamosusu pembeni, bayebi likambo oyo bazali kolobela te. Bomoni, bango babikaki na eteni *oyo* ya tempelo. Nde ndenge wana, bato mosusu bakoki komata kino wana, pe kokwea. Kasi ezali na eteni na yango moko ya solosolo, oyo ezali kokoba kotonga ndako yango. “Nakozongisa,” elobi Nkolo.

339 Bozali komikanisela *Nzete Ya Mwasi-na-libala?* Bozali komikanisela liteya ya *Nzete Ya Mwasi-na-libala?* Baliaki Yango

mobimba, kasi Ye akataki bitape na yango. Bazalaki na bitape ya ba-denomination; Ye akataki yango nyonso. Basalaki lingomba mosusu, bitape ya ba-denomination; Akataki yango nyonso. Kasi motema ya Nzete yango ekobaki kokóla. “Na ntango na mpokwa Pole ekozala.” Bomoni? Na ntango yango nde Klisto akoya, Molimo Mosantu. Yesu akokita pe Akomitia Motó ya Lingomba na ntango wana, pe Akosekwisa Lingomba yango, oyo ezali Nzoto na Ye Moko. Nzoto yango ezali na kati *kuna*.

³⁴⁰ Pe ndenge Nzambe azali kozela ete moko moko na biso ákóla, ndenge yango pe Amemi Lingomba na Ye na kokóla. Eleko ya Lingomba moko moko, Ekomi Lingomba moko monene. Bomoni?

³⁴¹ *Baoyo* esengamaki na bango oyo esengami na *baoyo* te. *Oyo* esengamaki na ye oyo esengami na *oyo* te. Bomoni? Kasi Atongi Lingomba na Ye ndenge moko. Atongi Li—Lingomba na Ye ndenge Azali kotonga bato na Ye. Na bongo, awa, Petelo alobi, liboso, makambo nsambo: kondima, nguya, (bomoni, ezali komata), boyébi, komipekisa, motema molai, bosantu, bolingo na bandeko, bakisa boboto na bandeko, pe na sima bolingo na Nzambe. Molimo Mosantu, Klisto kati na bomoto ya Molimo Mosantu, ayei likolo na yo, na libatisi ya solo ya Molimo Mosantu, pe ozali na ba-nguya nyonso oyo etiami elembu kati na yo. Na ntango wana, Nzambe azali kobika kati na Mongombo oyo ebengami Ndako, Mongombo na bomoi ya efandelo ya Nzambe na bomoi.

³⁴² Na ntango moto azui makambo ya boye, na bongo nde Molimo Mosantu akokita likolo na ye. Ata ndenge nini, okoki koloba minoko na sika, okoki komekola makabo nyonso oyo Nzambe azali na yango. Okoki kosala yango. Kasi soki ba-nguya *oyo* ekoti kati na yo te, ozali naino libanda na mobóko ya solosolo ya kondima. Kasi na ntango ba-nguya oyo ekóli na kati, pe obakisi yango likolo na yango, na ntango wana ozali ekeko ya bomoi. Ozali ekeko ya bomoi, oyo ezali kotambola.

³⁴³ Kasi, boyebi, ba—bapagano, bafukamelaka ekeko, nzambe ya makanisi. Pe na ndenge ya makanisi, bandimaka ete nzambe yango ya makanisi yango ayanolaka bango. Wana ezali bopakano. Wana ezali bo-Roma. Bakúmbamelaka basantu ya ndenge na ndenge pe biloko mosusu nyonso. Pe bazali na Santu Cecile, nzambe ya libota, pe makambo mingi ya ndenge na ndenge, ndenge wana. Bakúmbamelaka yango, pe bandimelaka yango mpenza na ndenge ya makanisi. Oyo e—oyo etaliseli mpenza, ya Nzambe na bomoi ya solosolo.

³⁴⁴ Kasi ntango biso, na ndenge ya makanisi te, kasi ntango tofukamelaka Nzambe na bomoi, nguya ya bomoi, boyébi ya bomoi, motema molai ya bomoi, bosantu ya bomoi, Nguya ya bomoi kouta na Nzambe na bomoi, ekómisaka moto na bomoi elilingi ya bomoi kati na epimelo ya Nzambe. Azali kosala nini?

Bobebe makambo oyo Yesu asalaki; kotamboláká kaka ndenge Ye atambolaki, kosaláká kaka makambo oyo Ye asalaki. Mpamba te, ezali likambo ya makanisi te. Ezali na bosolo moko oyo ezali komonana.

³⁴⁵ Bomoni oyo nalingi koloba? Bomoni ndenge ba-nguya oyo, bisaleli ya kotonga oyo, ekokani na batíndami na Lingomba, na bileko ya Lingomba? Sikawa, moko na mikolo oyo, tokozua maloba oyo moko moko, mpo na koyekola yango malamumu, pe kolakisa ete yango etalisi yango. Nyonso ezali kotambola elongo. Ya solo. Bomoni? Oh! la la! Ezali mpenza malamumu mingi, bomoni, komona oyo yango—oyo yango esalaka.

³⁴⁶ Sikawa, yango nde Ndako oyo Nzambe afandaka kati na yango; ezali te ndako oyo ezali na ngonga monene likolo na yango, ná linóngi ya molai. Bomoni? “Kasi Osili kobongisela Ngai Nzoto,” Nzoto oyo Nzambe akoki kofanda kati na yango, Nzambe akoki kotambola kati na yango, Nzambe akoki komona kati na yango, Nzambe akoki kosolola kati na yango, Nzambe akoki kosala kati na yango. Amen! Esalelo ya bomoi mpo na Nzambe, Nzambe akómi kotambola na makolo mibale, kati na yo. Nkembo! “Matambe na bayengebeni ekambamaka na Nzambe,” Nzambe azali kotambola kati na yo. “Mpo ete, bino bozali mikanda mikomami, mitangami na bato nyonso.” Pe soki Bomoi oyo ezali kati na Klisto ezali kati na bino, bokobika Bomoi oyo Klisto abikaki.

³⁴⁷ Ndenge nalobaka ntango nyonso. Soki olongoli mai ya nzete ya pêche, pe soki okokaki kotia yango kati na nzete ya pomme, ndenge bazongisaka makila, nzete ya pomme ekobota mbuma ya pêche. Ya solo. Na ntembe te ekobota. Ata soki bitape na yango ezali ndenge nini, ezali na mai ya nzete ya pomme kati na yango, bomoni, to ya nzete soko nini. Bomoni? Soki olongoli bomoi na yango na nzete ya pomme, longola yango nyonso, pe o—zongisa yango mai ndenge bazongisaka makila, pe longola mai ya nzete ya pêche pe otia yango na nzete ya pomme. Nini ekosalema? Ekobota lisusu ba-pêche te. Bomoni? Te, misie. Ekobota te. Soki bomoi ya nzete ya pêche nde ekoti kati na nzete ya pomme, ekobota lisusu pomme te. Ekobota ba-pêche, bomoni, bomoni, mpo ezali na bomoi wana kati na yango.

³⁴⁸ Ee, soki okamati biso, oyo tozali bobele bato pamba, bilémá, bomoni, pe tozali na biso eloko moko te, mpo biso nyonso tosilá kokufa na masumu pe na bikweli. Bisu nyonso tozali na lolenge wana. Na bongo biso, biso moko, tokoki kofukama biso moko, komitika mpenza, kino Nzambe ázua nsinga na Ye ya kozongisela makila, Nkombo na Yesu Klisto, mpo “Nkombo mosusu ezali te awa na nse, mpo bato bábikisama na yango,” pe ákotisa Bomoi ya Klisto kati na biso. Na ntango wana tozui kondima ya *boye*, kondima oyo Klisto azalaki na yango. Pe kondima ya Klisto etongamaki te likolo na Bafalisai, to Basadukai, to na malako na bango ya kosukola mbeki, mbilika

pe nzungu. Etongamaki likolo na Liloba na Nzambe, amen, mpenza, na lolenge ete Klisto azalaki Liloba, Liloba akómaki mosuni. Na bongo, soki bakoki kozongisa biso makila na Nguya na Ye, na lolenge ete tokufi na makanisi na biso moko, pe kondima na biso ekómi kondima oyo ya solosolo, aleluia, na ntango wana Bomoi na Klisto eleki pe ekoti kati na biso. Tokómi bikelamo ya bomoi mpo na Nzambe, efandelo oyo, na nzela yango, Molimo Mosantu akoki kotinda mapamboli na Ye oyo ezali kongenga, pe tozali na epimelo ya Klisto.

³⁴⁹ Yesu alobaki: “Ekomami te? Bozali kokweisa Ngai, mpo Nalobi: ‘Nazali Mwana na Nzambe.’ Ekomami te ete ‘Bozali bantzambe.’ Mibeko na bino moko elobi yango te?” Lokola Mose, lokola Eliya, lokola basakoli oyo babikaki mpenza pene na Nzambe, kino ete Nzambe amikotisaki Ye moko kati na bango. Pe balobaki, bango moko te, kasi Nzambe. “Bomitungisa te soko bokoloba nini, mpo ete bino bokoloba te. Ezali Tata oyo afandi kati na bino; Ye nde akoloba.” Maloba na ye ezali ya ye moko te, mpo, bomoi na ye, asili kokufa.

³⁵⁰ Soki moto akufi, balongolaka ye makila, bakausaka ye. Kokoso ezali ete, mingi kati na bango bakausami ata moke te. Soki balongoli moto makila, esili mpo na ye. Boye, likambo bobele moko ya kosala ezali ete bátia makila mosusu kati na ye; akozonga na bomoi. Balongolaki ye nde makila.

³⁵¹ Pe sikawa totii Makila ya Yesu Klisto na kati, bomoni, pe yango ememi kondima ya Yesu Klisto, nguya ya Yesu Klisto, boyébi ya Yesu Klisto, komipekisa ya Yesu Klisto, motema molai ya Yesu Klisto, bosantu ya Yesu Klisto, boboto na bandeko ya Yesu Klisto, pe bolingo ya Nzambe, oyo ezali Yesu Klisto. Ye azali Motó pe akokonza yo. Pe makolo na yo ekómi mobóko, kondima. Amen! Ekonzami na Motó, esengaka...?...Yango mpenza. Wana nde moto na Nzambe oyo abongi be, soki azui banguya oyo.

³⁵² Na bongo, Nzambe azali kotalisa Lingomba na Ye lokola Mwasi na libala, mwasi. Nzambe atalisaka Lingomba na Ye lokola Mwasi na libala. Pe ndenge Amemaka moto moko moko akoma mwana na Ye, mpo ákota kati na Mwasi na libala yango, Alekisi pe Mwasi na libala kati na bileko, [Ndeko Branham abeti na etánda mbala nsambo—N.D.E.] kino ete Alekisi Lingomba oyo mobimba kati na *yango*.

³⁵³ Makolo na ngai ezali koningana. Mpo na nini? Mpo motó na ngai elobi bongo. Sikawa, ekoki koningana lokola loboko na ngai te, mpo ezali makolo na ngai. Luther akoki kosala makambo biso tosalá te, ba-Methodiste pe bakoki te, mpo bazalaki eloko mosusu. Bomoni? Makolo eningani mpo motó elobi bongo. Kasi motó elobaka ata moke te: “Sikawa, makolo, bókoma maboko. Matoi, bókoma miso.” Bomoni?

354 Kasi, na eleko moko na moko, Nzambe atiaki makambo yango kati na Lingomba na Ye, Apesaki ndakisa, na kotalisáká ete moto moko na moko azali na yango, azali na makoki yango. Pe Ezali *oyo*, ntango esili, ezali Lingomba ya Nzambe oyo ekokende na Konetolama. Pe ezali *oyo*, pe esili, akómi mosali na Nzambe, kati na Lingomba ya Nzambe, oyo akokende na Konetolama. Nkembo! Bomoni oyo nalingi koloba? Yango wana mpenza. Yango nde mobimba ya likambo.

355 Moto moko ayaki *awa*, Polo, atiaki mobóko. Irénée abandaki kosopa *oyo* likolo na yango. Oyo alandi asopaki *oyo*. Oyo alandi asopaki *oyo*. Oyo alandi *oyo kuna*, pe *oyo kuna*, pe *oyo kuna*, pe bongo na bongo kino ekómi na eleko ya suka. Kasi ezali nini? Ezali kaka Molimo yango moko.

356 Molimo yango moko oyo efandi kati na ngai, elobaka: “Maboko, simba sanduku wana.” Molimo yango moko elobaka: “Makolo, bwaka lokolo moko.” Bomoni oyo nalingi koloba?

357 Boye, epimelo mobimba ya bozali na yo ekambamaka pe ekonzamaka na makambo yango, kasi ekoki kokonzama na mobimba te kino ete ézua makoki oyo nyonso.

358 Bosila koyoka likambo oyo? Sikawa, botika nayebisa bino likambo oyo. Pe bofanda mpenza. . . Bóyoka na bokebi nyonso. Bomoni? Bayebaka makasi ya moniololo na eteni na yango ya pete mpenza koleka. Ya solo. Ezali makasi te, koleka eteni na yango ya pete mpenza koleka.

359 Ata soki biteni *oyo* etongami makasi ndenge nini, eteni *oyo* pe etongami; soki ezali na eteni ya pete, wana nde esika ekokatana. Pe ezali makasi te, koleka eteni oyo ya pete mpenza koleka. [Ndeko Branham azali kosalela liyemi na ye oyo ezali na etánda—N.D.E.] Sikawa, soki ozui, olobi ete ozali na *oyo*, *oyo*, *oyo*, ozangi *oyo*, wana nde esika ekokatana. Soki ozali na *oyo*, kasi ozangi *oyo kuna*, ekokatana nde wana. Ozali na *oyo*, kasi ozangi *oyo kuna*, ekokatana. *Oyo*, kasi ozangi *oyo*, ekokatana. *Oyo*, kasi ozangi *oyo*, ekokatana. Bomoni? Pe soki ozangi. . . Okoki kozala na *oyo* te kozanga kozala na *oyo*.

360 Boye, ntango opesi bomoto na yo mobimba, na bongo Molimo Mosantu ekosopana na kati na yo, kati na ba-nguya oyo, na ntango wana okómi mongombo ya bomoi. Na bongo, bato bakotala pe bakoloba: “Oyo wana nde moto oyo atondi na nguya, boyébi (andimi Liloba), komipekisa, motema molai, bosantu, boboto epai na bandeko, atondi na bolingo ya Molimo Mosantu. Bomoni, ye wana, azali kotambola.” Ezali nini? Epimelo oyo bazangi kondima bakoki kotala pe koloba: “Moklisto ye wana. Wana nde mobali, to mwasi, oyo ayebi eloko oyo azali koloba. Naino bomoná moto ya boboto, bopolo, bosantu koleka ye te.” Otiami elembo. Elembo emonisamaka na ngambo nyonso mibale. Ézala ozali kokende to koya, okomona elembo yango bobele ndenge moko. Yango mpenza. Bomoni? Ntango mobali to mwasi

azui *oyo*, na ntango wana Libanga ya motó ekokita pe ekotia ye elembo kati na Bokonzi na Nzambe, oyo ezali Molimo Mosantu.

³⁶¹ Na bongo Liloba, kouta *Awa*, Ekomimonisa na nzela na moko na moko ya bikelamo oyo, bomoni, pe ekokómisa Ekelamo oyo mobimba Mongombo ya Nzambe na bomoi, ndakisa solosolo ya Boklisto oyo ezali kotambola. Oyo Klisto azalaki, bato oyo bakómi yango, mpo Bomoi na Ye ezali na kati awa. Bazali kati na Klisto. Bomoi na bango ekufi pe ebombami kati na Klisto, na nzela na Nzambe, pe batiami elembo na kati na nzela na Molimo Mosantu. Bakolinti ya Liboso 12. Ya solo. Bomoni? Omikamati lokola mokufi, na bongo obotami na kondima. Na sima, nguya pe makambo mosusu oyo ebakisameli yo, kino ete okómi elilingi ya bomoi, oyo ebongi be, ya Nzambe. Kitoko mpenza, boye te? [Losambo balobi: “Amen.”—N.D.E.]

³⁶² Na bongo Nzambe, na nzela na yango, apesi pe Bileko Nsambo ya Lingomba, mpo na kotalisa bibuteli nsambo oyo Apesaki, kotongáká motó na Ye na elilingi na Ye, Atongi Lingomba mobimba na elilingi na Ye. Pe na lisekwa, Nzoto oyo mobimba ekosekwa mpo na kobika elongo na Ye libela, mpo ezali Mwasi na libala. Bomoni? Boye, esalemi na bileko nyonso, na bileko nyonso oyo eyaki.

³⁶³ Pe mingi esengami, bómikanisela. Bómikanisela oyo Polo alobaki awa na Baebele 11? Bótika nátangela bino líkambo moko awa liboso ete tósilisa, bozela moke. Na bongo, bino... Esalaka lokola ómiyoka mwa ndenge ntango na...ntango nyonso, ntango natangaka yango. Nakozua Baebele 11, pe nakobanda na molongo ya 32.

Lisusu nini, *naloba lisusu nini? Nazali na ntango te mpo na koloba makambo ya Jedeon, ... ya Barak, pe ... Samson, ... pe Jefté, ... David, ... pe Samuel, ... na basakoli.*

Baoyo bakitisi makonzi mpo na kondima, basalaki na boyengebeni, bazui elaka, bazipi monoko na bankosi,

Bazimisi nguya na móto, bakimi mopotu na mopanga, pe bakembisami kati na bolembu, bazui makasi kati na kokima, bakimisi ... bibe le na bapaya.

Basi bazuaki bakufi na bango mpo na lisekwa: ... bamosusu balekaki na minyoko, banyokwamaki, baboyaki kokangwa ete bazua lisekwa lileki malamau.

³⁶⁴ Na nse *awa*. Bomoni? [Ndeko Branham azali kosalela liyemi na ye oyo ezali na etánda—N.D.E.] Malamau.

Bamosusu na bango bamekamaki...basekamaki mabe...babetamaki fimbo, iyo, na koleka wana... bakangwamaki...batiamaki na bolóko.

Babwakelami mabanga, bakatamaki biteni mibale na mosumani, babomani na...mipanga; batamboli na

mposo na mpate pe na mposo na ntaba, bazangi, pe banyokolami, pe basalelami makambo mabe.

(Mokili ebongi na bango te.) . . .

³⁶⁵ Bomoni, ezali kati na ba-parenthèse, bótala na Biblia na bino.

. . . bazalaki kotelengana na kati na bisobe pe na bangomba pe na madusu pe na mabulu ya mabele.

. . . baoyo nionso, atako litatoli epesamaki mpo na bango na nzela na kondima na bango, . . .

³⁶⁶ *Awa!* [Ndeko Branham azali kosalela liyemi na ye oyo ezali na étánda—N.D.E.]

. . . litatoli epesamaki mpo na bango na nzela na kondima, bazuaki kokokisama na elaka te, (Bomoni?)

Nzambe abombeli biso eloko eleki malamumu ete bango bakoka bobele esika moko na biso.

³⁶⁷ Bososoli yango? Bato oyo bakufaki, na kati *awa*, bazali kotalela pe kozela biso. Boye, Lingomba *oyo* esengeli kokóma na kobonga be, mpo lisekwa ésalema. Pe bango bazali na nse, milimo oyo ezali na nse ya etumbelo, ezali kozela ete Lingomba oyo ékóma na kobonga be na Yango, na ntango Klisto ayei mpenza.

³⁶⁸ Pe Lingomba oyo, bomoni, ezali kokóma moke koleka, bato moke. [Ndeko Branham azali kosalela liyemi na ye na étánda—N.D.E.] Ekómi mpenza nsóngé koleka wana, kasi ezali kaka mpo na kokoma ekulusu yango kuna, bomoni. Ekómi lokola nsóngé ya ntonga. Kino, Lingomba, ya bato moke, esengeli kokóma na esika oyo ekokóma na mosala ndenge moko na oyo *oyo* etikaki, mpo, ntango Libanga ya motó oyo ekozonga . . .

³⁶⁹ Esika moko ezali lokola mwa libenga *awa*, oyo yango ekoya kofanda wana mpenza, lokola likolo na piramíde nyonso. Bobele motó ya mpamba te nde ekotiana likolo na yango. Ezali na mwa nkingo, pe esengeli kofanda likolo na yango, mpo yango ebimisaka mai.

Pe ntango ekoya, Lingomba oyo esengeli kosebisama.

³⁷⁰ Mabanga mosusu nyonso oyo ezali kati na piramíde, etiami malamumu be na lolenge ete okoki kolekisa jiléte na katikáti na yango te, ezali na kiló nkóto na nkóto, ndenge etiami wana. Bamatisaki yango ndenge nini, bango bayebi te. Kasi etongamaki.

³⁷¹ Pe *awa* na likolo, ntango Libanga ya motó ya piramíde ekoya, piramíde Yango moko, Nzoto ya Klisto ekosengela kosebisama. Ekozala bobele mwa bindimeli to malakisi moko te, to eloko mosusu oyo toleki kati na yango. Ekosengela ezala mpenza be lokola Klisto, kino, ntango Akoya, Ye ná mosala

wana bakosangana elongo mpenza malamumu. Bomoni? Na bongo Konetolama ekosalema, kozonga na Ndako.

³⁷² Bótala esika tozali kobika sikawa, na Laodikia, esika lingomba ezalaki na eleko ya lingomba ya mabe koleka nyonso oyo bazuá. Na Biblia, tomoni ete, yango nde ezalaki eleko ya lingomba bobele moko, oyo Nzambe azalaki libanda na lingomba, Azali kobeta na ekuke, koluka kozonga kati na ndako na Ye moko. Bindimeli ná ba-denomination ebwakaki Ye libanda ya lingomba na Ye moko. “Tala, Natelemi na ekuke pe Nazali kobeta. Soki moto azali na mposa pe alingi kofungola ekuke, Nakokota, kolia bilei ya mpokwa elongo na ye.” Bomoni? Yango oyo, na eleko ya lingomba oyo. Babimisaki Ye libanda malembe-malembe, kino ete *awa* babwaki Ye libanda na mobimba. Balingi eloko moko oyo etali Yango te.

³⁷³ Sikawa, lelo, bomoni epai wapi tozali kokende. Atako suka ya Eleko ya Lingomba ya Laodikia ekómi mpenza na lolenge ya libanda, kino ete yango ná Bokatoliko, oyo epanzaki yango kino *awa*, ezali koya esika moko pe kosangana lokola lingomba moko ya monene. Na lisanga ya mangomba, ezali ndenge moko na Bokatoliko.

³⁷⁴ Bokeseni ezali bobele moko, soki bakoki bobele kolonga yango, ezali likambo ya kolia elambo. Yango nde likambo bobele moko kati na diocèse, oyo—oyo—oyo esalaka ete ba-Katoliko ná ba-Protestant básangana te, ezali nde likambo ya elambo. Lingomba Katoliko elobaka: “Ezali nzoto.” Pe lingomba Protestant elobaka: “Ezali kotalisa nzoto.” Ba-katoliko basalelaka yango mísa. Mísa ezali, ete, baliaka elambo, na elikia ete balimbisami. Ba-Protestant baliaka yango na kondima, batondaka Nzambe, na elambo, ete balimbisami. Ba-Protestant balobaka: “Tolimbisami.” Ba-Katoliko balobaka: “Tozali kolikia ete tolimbisami.” Mísa ná elambo. Babengaka yango mísa; biso tobengaka yango elambo. Mísa ezali kolikia ete ezali bongo. Elambo ezali koyeba ete ezali bongo, pe kotonda Ye mpo na yango. Bomoni? Yango nde likambo bobele moko oyo bazokoka kotambola elongo te. Bakosala yango.

³⁷⁵ Oh, ékomonana lokola eloko ya kitoko mpenza. Ekosangana, mpo na komema . . . Eko—ekomema nyonso oyo . . . Ee, Biblia elobi: “Banyama oyo bapesaki nguya na bango na mwasi ya ndumba,” bomoni, basanganaki elongo. Bomoni? Kaka mpenza ndenge Biblia elobi ete bakosala, bazali kosala yango sikawa. Ezali kosalema, kaka na mpóso oyo. Ezali te ete nazali kotelemela ba-Katoliko, to ba-Pretestant.

³⁷⁶ Bino ba-Methodiste ná ba-Batiste, pe mingi kati na bino ba-Pantekotiste, na ntango mangomba na bino ekoti na lisangana ya mangomba oyo, na ntango batongi ndako monene ya bibembe kuna na New York, ya lisangana ya mangomba wana, ezali

ndenge moko na Nations-Unies pe nyonso mosusu. Bazali koluka kosangisa ba-Protestant nyonso.

377 Sikawa, ba-Katoliko bazali na lisosoli na likambo yango, pe bakomema Pápa Yoane wa ntuku mibale na misato, to wa ntuku mibale na mibale, to soko nani ye azali. Na ndenge ya bopolo pe ya komikitisa, azali koluka komema kondima ya ba-Protestant nyonso ná kondima ya ba-Katoliko na kondima moko, ndenge mpenza Biblia elobi ete bakosala. Nde yango mpenza. Pe ba-Protestant bazali kokweya na motambo yango, komela ndobo, nsinga ná mondolu.

378 Mpo na nini? Mpo na nini? Mpo bazali na makambo *oyo* te. *Boyébi*: “Liloba elóngi.” *Motema molai*: “Baoyo batalelaka Nkolo.” Bomoni oyo nalingi koloba?

379 Ndenge évéke ya ba-Methodiste wana alobaki mokolo mosusu, ntango balekisaki yango. Pe moto nyonso ayebi ete, ndenge, eloko oyo epesaki mpémélá yango, bazalaki koluka ete libondeli moko esalemaka na losambo, to na eteyelo. Pe balingaki ko... Nakanisi ezalaki buku ya mabondeli ya ba-Presbiterien, to eloko mosusu, pe baboti bafundaki e—e—eteyelo yango mpo baboyaki ete mabondeli oyo esalemaka na eteyelo. Pe évéke yango ya ba-Methodiste azalaki mobange moko ya bwanya, atelemaki pe alobaki: “Ezali mabe.” Alobaki: “Etemeli mobeko likonzi.” Asosolaki mopepe yango. Alobaki: “Lokola na lingomba na biso ba-Methodiste,” alobaki, “na lingomba na biso ba-Methodiste,” alobaki, “bato na biso mingi batelemelaka ntango nyonso makambo ya nsoni ya Hollywood, kasi bato ntuku libwa na mitano likolo na monkama kati na bango bakendeke kotala yango ata bongo.”

380 Likambo ezali nini? Batikaki *oyo*. Ezali yango mpenza. Batikaki yango.

381 Mokolo mosusu awa, kaka na ndako oyo, nazalaki kosolola na—na—na mokambi ya moko na ba-losambo ya minene koleka ya ba-Methodiste oyo ezali na Falls City, moko na ba-losambo ya molimo koleka ya ba-Methodiste oyo ezali na Falls City. Kolakisa, ete eleko ya ba-Methodiste oyo ezali pene na eleko na biso, ba-Pantekotiste, kuna. Pe alobaki: “Na St. Louis, na Missouri, bayekolaki likambo moko, eleki sanza misato to minei, pe bazuaki eyano.” Ntango mosusu mbali yango afandi awa na ntongo oyo. Ee, azali motongi-ndako oyo azali kotonga oyo, kobongisela biso ndako oyo. Asambelaka na lingomba Methodiste ya Main Street, epai Ndeko Lum azalaki mokengeli, pe bamosusu. Boye, tomoni ete, kati na yango, ete, nakanisi ezalaki pene na ba-Methodiste ntuku nsambo koleka likolo na monkama, na koyekola yango, bolukiluki ya St. Louis, etalisaki ete ba-Methodiste ntuku nsambo koleka likolo na monkama bamelaka likaya, pe ntuku motoba na mwambe likolo na monkama kati na bango bamelaka masanga ya kolanguisa. Mo-Methodiste! Pe

likambo ya kokamwa ezalaki ete, ntango mbano ya boyekoli yango epesamaki, to motango oyo bakanisaki na kati na mibali pe basi; basi bazalaki ntuku nsambo, ntuku nsambo koleka likolo na monkama, mibali bazalaki pene na ntuku mitano likolo na monkama. Basi mingi bamelaka makaya pe masanga koleka mibali. Ntuku nsambo, ntuku nsambo koleka likolo na monkama, basi mingi koleka mibali.

³⁸² Sikawa, bongo soki tozui Mateyo ya Biblia na oyo etali kolata kupé, kokata suki, pe makambo ya ndenge wana, bomoni, wapi bosantu, basi oyo balobaka ete bazali basantu pe búle? Masano ya kalati pe nyonso mosusu, bato ya songisongi, bato ya bilobéla, bakokaka kobatela lolémo na bango moko te. Lolémo na bango elobaka bilobéla pe songisongi, pe bafandaka esika moko te. Bongo mibali? Masano ya kalati, masano ya golfe, balati ndambo ya bilamba ya mabe, pene na bolumbu, kuna na libanda, ná basi wana pembeni na bango kuna. Kokamwa te!

³⁸³ Bomoni likambo ya soni oyo basali motei wana, oyo ateyaka na bolóko, na ntongo oyo? Iyo, misie. Nandimi te ete mobali wana akweyaki na likambo wana. Esalaki nini? Ezali Ndeko. . . Nabosani nkombo na ye. . . [Moto moko alobi: “Dan Gilbert.”—N.D.E.] Iyo. Dan Gilbert, ateyaka na bolóko. Ntango mobali wana akotaki na mpwasa pe abomaki Dan, awa eleki mwa basanza, pe sikawa mwasi na ye akómi pene na kobota. Na ntembe te, Dan akufi, sikawa bakoki kozongisa bebé yango makila te. Alobaki ete Dan azuaki ye na makasi, pe ete azali. . . “Azali bebé ya Dan.” Likambo ya. . . Nandimi yango te ndenge pe nandimaka te ete—ete e—eyanganga azalaka na nsala ya ebengá. Te, misie. Nandimi ete ezali lokuta. Nandimi ete Dan Gilbert azalaki moto na Nzambe. Pe nandimi ete ezali mayele mabe ya zabolo.

³⁸⁴ Lokola likambo oyo bazali komeka kolekisa na ntina na mabondeli wana. Mobange évéke ya Methodiste—Methodiste wana azalaki na mayele ya kokoka mpo na kososola yango. Soki álekisaka yango, soki élekaka, yango epemelamaki bobele na eloko mosusu. Ya solo.

³⁸⁵ Kaka lokola likambo ya bokabwani oyo kati na mindele ná bato moindo kuna na Súdi, ndenge moko. Nandimaka ete bato basengeli kozala na bonsomi. Nandimaka ete ekólo oyo ebundelaka bonsomi. Nazali kopamela Misie Kennedy te ndenge atindaki basoda kuna. Atako, na—nazali moto na “new dealer” te, nazali pe Démocrate te. Nazali Républicain te. Nazali Moklisto. Boye nazali. . . Kasi nandimaka wana te. Nandimaka pe te ete bato moindo basengeli koteka bokulutu na bango mpo na likambo ya ndenge wana. Ezalaki—ezalaki parti ya ba-Républicain. Makila ya Abraham Lincoln epesaki bango bonsomi mpamba te azalaki moto na bosantu. Nakanisi ete basengelaki, ata bongo, kokangama na parti na bango, soki pe bakovoté ata.

386 Kasi nakoyebisa bino likambo moko, elenge mobali wana akendeki kuna te bobele mpo na biteyelo na bango. Elenge mobali yango azali mwana mboka. Azali Americain. Oyo ezali bonsomi mpo na bato nyonso. Lángi ya moto esengelaki kosala bokeseni ná ye te. Bisó nyonso. . . “Nzambe,” elobami, “uta na moto moko, asalaki makila nyonso, bikólo nyonso.” Bisó nyonso tozali moto moko. Kasi, elenge mobali yango, azalaki soda. Azali soda ya kala. Abundelaki bosembo. Azalaki na likoki ya kokende na eteyelo. Ya solo. Kasi azalaki na biteyelo mingi epai akokaki kokende.

387 Yango nde likambo oyo yango ezali. Soki olandeli yango, ezali makambo ya bibongiseli ya mikolo oyo, kuna, nde ezali kopemela yango. Mpo na nini? Bazali kobongola ba-vote ya bato moindo élongwa na ba-Républicain ékende epai ya ba-Démocrate, pe na nzela yango, bazali koteka makoki na bango ya bokulutu. Ezali mpenza bosolo. Molimo Mosantu azali wana te. . .

388 “Tika ete ye oyo azali na bwanya.” “Tika ete ye oyo azali na boyébi.” Yango mpenza. Kaka ndenge lingomba oyo, eleko oyo, ezali komiteka. Bozali komona likambo oyo elingi kosalema te?

389 Ata soki yango ekamatami na bande, etali ngai te. Tala yango oyo. Ah-ha. Iyo. Likambo nini? Mama na ngai azaláká koloba: “Zongisela satana biloko na ye.”

390 Ezali na moto moko oyo asalaki likambo bobele moko ya bomoto, ezalaki Castro kuna. Iyo, misie. Akendeki kuna. Ba-capitaliste bazuaki bilanga nyonso ya kokó pe nyonso oyo. . . epímamaka na wólo, lokola na Etats-Unis. Asalaki nini? Asombaki ba-titre nyonso wana. Alukaki mbongo na ndenge nyonso. Na sima, asalaki nini? Asalaki mbongo ya moniato, pe asombaki oyo ya solo. Akotisaki yango mpo bato básalela yango. Yango nde likambo bobele moko, ekólo oyo ekokaki kosala.

391 Boyokaki zulunále *Life Line* na ntongo wana? Ee, boyebi, ezali lokola koteka ba-titre mpo na wólo. Basili kokongola ba-titre nyonso. Pe gouvernement oyo ya lelo ezali kosalela mbongo ya nini? Mbongo ya mpako oyo bato bakofuta sima na mibu ntuku minei. Asili kosila. Ekomamaki na zulunale *Life Line* uta na Washington DC., ekei na ekólo mobimba. Bazali kosalela mbongo ya mpako, pe bazali koluka kosomba mbongo ya bapaya. Ee, ata bongo, bazali kaka kokabola-kabola yango. Bozali komona te? Yango mpenza nde oyo bako—oyo bakosala. Bomoni? Ezali nini? Sikawa, soki nkita ya ekólo oyo ekwei, eloko bobele moko oyo yango ekoki kosala, ezali ete ékweya. Eloko bobele moko oyo ekoki kosala, ezali ete ékweya.

392 Yango nde likambo elongobani bobele moko ya kosala, kosala mbongo mosusu. Kasi bakosala yango te, na boyangeli oyo ya lelo. Lingomba Katoliko ya Roma nde ezali na wólo ya mokili mobimba. Pe oyo bakosala, ezali koteka yango nyonso: “Bato

na bozui oyo,” pe bongo na bongo, “ya mokili,” ndenge Biblia elobaki. Bakosala nini, liboso ete babungisa nkita? Kompani ya Makaya Brown pe Williamson, mingi kati na bango bazali ba-Katoliko, ata bongo. Ná makambo mosusu nyonso wana, bakosala nini? Bakondima yango, pe bakozua mbongo kouta na Roma, na ntango wana, ateki mpenza makoki na ye ya bokulutu. Roma akosunga ye. Iyo, misie. Akosunga yango. Pe bazali kosala boyokani ya politiki sikawa, kosangisa nyonso oyo bakoki kosangisa pembeni na bango, komema yango na biró na ye. Bótala likambo oyo Misie Kennedy azali kosenga.

³⁹³ Pe soki bomonaki yango, mokolo mosusu wana, ntina ya kovoté ezali lisusu te. Ntina nini kovoté? Na ntango oyo, bakomaki yango na zulunalé, pe batalisaki yango polele na miso ya bato, pe baboyaki kosala ata likambo moko na ntina na yango. Na ntango oyo, batalisaki polele ete ba-masini yango, na ekólo mobimba, ezalaki motámbo, ete bavotaki Misie Kennedy na vote ya lokuta. Biblia elobi te ete akokota na nzela na lokuta? Na ntembe te, bokosi. Sikawa, natelemeli parti ya ba-Démocrate te to ya ba-Républicain te, kasi nazali bobele kotalisa makambo yango uta na Biblia. Ntina ya kovoté ezali nini? Bayebi moto oyo akozala wana.

³⁹⁴ Boni kati na bino bazali komikanisela emisió ya televizio esika oyo balakisaki basi mibale batelemi? Pe moko alobaki: “Ngai nakovoté Misie . . .” To, mwasi oyo ya Protestant alobaki: “Ngai nakovoté Misie Kennedy.”

Balobaki: “Mpo na nini?”

³⁹⁵ Alobaki: “Mpo nakanisi ete azali mayele mingi, koleka Misie Nixon. Akozala Président ya malamau koleka.”

³⁹⁶ Bongo alobaki: “Mwasi oyo azali mo-Katoliko. ‘Yo okovoté nani?’”

³⁹⁷ Alobaki: “Nazali mo-Katoliko, mo-Katoliko ya Roma, mo-Katoliko ya sembo.” Alobaki: “Nakovoté Misie Nixon.”

“Mpo na nini?”

³⁹⁸ Alobaki: “Mpo nakanisi ete Misie Nixon nde akozala Président ya malamau koleka, mpo amesani mingi na makambo yango. Ayebi makambo ya communisme malamau koleka.” Mwasi yango alobaki lokuta.

³⁹⁹ Nazali na *Bo . . .* oyo babengaka, *Bosolo Ya Kondima Na Biso*, buku ya mosanda likolo koleka ya Katoliko oyo ekoki kosombama. Pe na kati na yango balobi: “Soki basengeli kovoté mo-Katoliko, oyo azali kowela ebonga ná Protestant; soki mo-Katoliko avoté Protestant, bakolongola ye na lisanga ya lingomba Katoliko.” Ya solo. “Pe soki ba-Katoliko mibale bazali kowela ebonga moko, bakopona mo-Katoliko ya bosembo koleka na ‘lingomba-mama’ pe bakovoté ye.”

400 Bomoni bokosi wana, ndenge bazali koluka kosala? Bazali kokabola mbongo, mpo na kosomba. Mpo na nini? Bazali koluka kobebisa yango. Pe bazali kosala yango, pe esili kobeba. Ezali nini? Ezali kopimama na wólo. Pe lingomba Katoliko, bokitani, ezali na wólo ya mokili mobimba. [Moto moko alobi: “Ba-milliard monkama na ntuku motoba na mwambe ya dollars.”—N.D.E.] Ba-milliard monkama na ntuku motoba na mwambe. Yango mpenza. Bazali kozongisa yango mbala moko na wólo, bino bokoki kotikala bobele na bandako na bino pe biloko mosusu, kasi bozali bato ya lingomba Katoliko. Ekólo ezali ya lingomba Katoliko. Eloko yango mobimba ekangami ya yango, ndenge wana, na nzela na misolo na bango. Biblia elobeli yango te? Yango nde elilingi oyo Biblia etalisi biso.

401 Likambo oyo nazali koluka koloba lelo, ndeko. Bakoloba: “Ekosala ete lingomba ékóma malamú koleka. Ekosangisa ba-Protestant.” Ezali komonana malamú, na miso ya bomoto, kasi boyébi ya mokili oyo ezali bolema mpo na Nzambe.

402 “Bongo Nzambe asepelaki kobikisa bato oyo babungi na nzela na bo—bolema ya esakweli,” na mosala ya Nzambe, oyo Atiaki kati na Lingomba na Ye, mpo na kotonga Lingomba likolo na makoki oyo ya molimo, kasi likolo ya eloko moko ya mokili oyo te.

403 Petelo alobaki: “Pe mpo ete bokimi libebi oyo ezali kati na mokili mpo na mposa mabe ya mbongo, pe mposa mabe ya kosepelisa nzoto, ya bisengo, ya kolia, ya komela, pe mposa mabe oyo tozali na yango. Bosili kokima yango. Pe sikawa, botongami ná makoki ya kobikela yango. Nazali koloba makambo oyo na Lingomba,” nde alobaki. Yango mpenza. Botangi yango? Bososoli yango? Boyokaki yango ntango totangaki yango awa na Petelo ya Mibale? Boyoka oyo alobi awa, ezali kitoko ndenge ekomami awa, pe ndenge a—alobeli yango. Malamú. Boyoka ye sikawa ndenge alobi. Malamú.

Petelo, *Simona Petelo, moombo pe ntoma na Yesu Klisto, na bango oyo . . . bazuaki likabo ya kondima ya motuya lolenge moko na biso kati na boyengebeni ya Nzambe na biso pe Mobikisi Yesu Klisto.*

. . . kimia e—eyikana na bino kati na boyebi ya Nzambe, pe na nzela na Yesu Klisto Nkolo na biso.

Nguya na—na bonzambe na ye esili kopesa biso biloko nyonso . . .

404 Banani bakosangola mokili ná biloko nyonso? [Moto moko alobi: “Basantu.”—N.D.E.] Ya solo. “Oyo ekoki . . .” Iyo. Malamú.

. . . oyo ekoki na bomoi pe na kosambela Nzambe, mpo na boyebi na oyo asili kobianga biso na nkembo na nkembo.

Na yango pe asili kotiela biso elaka monene... na motuya m̄ingi, na ntina ete na bilaka yango bozua likabo na bino kati na lolenge ya bonzambe, pe bokima libebi (Boyoka yango.) lizali kati na mokili mpo na mposa mabe.

⁴⁰⁵ Mposa mabe ya mbongo, mposa mabe ya makambo minene, mposa mabe ya lokumu, mpo na mondimi, makambo oyo es̄ili kokufa. Tomitungisaka te. Hema to ndako ya moke, nakomitungisa mpo na nini; bomoi to liwa, ata soki likambo nini? Eloko oyo ngai nazali koluka, ezali Bokonzi ya Nzambe. Ata soki nabateli ndako na ngai, ata soki nabateli libota na ngai, ata soki nabateli eloko nini, b̄otika ngai n̄abatela Klisto, elikia na biso ya Nkembo.

⁴⁰⁶ Tonga ngai, E Nkolo, kati na *Oyo*. Tika ete Klisto ázala Motó na ngai, oyo ákosala na nzela na ngai. Likolo ya mobóko na ngai, kondima na ngai kati na Ye, tika ete nguya, boyébi, komipekisa, motema molai, bosantu, pe boboto na bandeko, ésala kati na ngai, E Nkolo, yango nde libondeli na ngai. Etali ngai te; bomoi to liwa, ata likambo nini; denomination, kozanga denomination; moninga to kozanga moninga. Tika ete Yango ésala kati na ngai, tika ete nguya ya Klisto, boyébi na Ye, étiola kati na ngai, ete n̄ázala na makoki ya koteya baoyo kuna.

⁴⁰⁷ “Mpamba te Nzambe atiaki kati na Lingomba, bantoma, basakoli, balakisi, bakengeli, pe bapalanganisi Nsango-malamu, nyonso mpo na kobongisa be pe komema misala malamu oyo nyonso kati na yango, mpo na kobonga be ya Boyei ya Mwana na Nzambe.” Moko moko ya mabanga *oyo* ezali esalelo euti na *Oyo*. Esalelo *oyo* euti na *Oyo*. Ba-nguya oyo moko na moko ezali kati na Ye, ezali kotiola uta na Ye, kokita na nzela na baoyo. Amen.

⁴⁰⁸ Midi ekoki. Ngonga nyonso wana ekei wapi? Amen. Bolingi Ye? [Losambo balobi: “Amen.”—N.D.E.] Bondimi yango? [“Amen.”] Boyoka, bana mike.

⁴⁰⁹ Na ntongo oyo, Ndeko mwasi Kidd alobaki: “Ndeko Bill, nayebi te soki nakomona yo lisusu.” Elingaki mpenza koboma ngai. Bomoni? Akanisi ete anuní, pe ezali bongo. Nabondelaki ete Nzambe ábatela ye ná Ndeko mobali Kidd, ntango molai.

⁴¹⁰ B̄otika nayebisa bino, toyebi te ntango boni tokozala elongo bamoko na bamosusu. Nayebi te ntango boni nakozala elongo na bino. Nzambe akoki kolongola ngai na mokili. Akoki kobenga ngai na esika mosusu ya mosala. Akoki kobenga yo na esika moko boye. Toyebi te. Kasi, tó—tózua yango. T̄otika te ete oyo éleka likolo na biso. T̄okamata yango.

⁴¹¹ Yango oyo, na kati ya Biblia. Yango oyo, ezali ndakisa mpo na nyonso mosusu. Pe soki mpenza nazalaki na ntango ya kosala yango! Okoki kosala yango na mokolo moko te. Boyebi yango. Kasi, nalingaki kokangisa likambo yango mobimba esika moko!

412 Bótala, ntango tosilisaki liteya wana, bomonaki oyo Molimo Mosantu asalaki kuna, na etutu, boye te? Boni bazalaki awa na ntango yango? [Losambo balobi: “Amen.”—N.D.E.] Bomoni? Ya solo! Ye akitaki pe ayemaki yango ndenge moko, Mwanje na Nkolo.

413 Bomoni, ezali solo. Bótika te ete ékima bino. Bókangama na yango, bana. Bókangama na yango. Bóbosana te, bótonga likolo na kondima na bino, nguya, boyébi, motema molai!

414 Sikawa, bótala, nakanisi ete nazalaki na eteni ya lokasa awa, soki nakweisi yango na esika moko boye te, ntango nazalaki koteya. Yango oyo awa. Matondi, ndeko. Matondi mingi. Soki bolingi ko—kotala yango, mpo bómona soki eloko moko ezali awa, oyo bokoki ko . . . Ntango mosusu ezali ndakisa ya mwa malam koleka oyo ezali kuna, oyo bokoki kokoma mwa makambo mosusu oyo. Nakobamba yango mwa nsete awa, mpo bókoka kotala yango pe—pe kobeta yango na masini.

415 Pe nalingi ete bózua yango pe bóyekola yango, pe bókokanisa yango, na sima, bósalela yango. Bósuka bobele na koyekola yango pe kokokanisa yango te, kasi bósalela yango, na ntango boyekoli yango. Bózua yango na eyóngi mpo na bino moko. Bóloba te: “Ee, nasepelaki koyoka yango.” Ngai pe nasepeli na yango. Kasi koyoka yango, na sima koyamba yango, ekeseni. Bomoni? Bomoni? Ekeseni. Bomoni?

416 Makoki ezali nsambo mpo na kokóma na epimelo ya Nzambe. Bileko ya Lingomba ezali Nsambo, oyo Nzambe alekisi Lingomba mpo ézua makoki yango. Pe Azali na batindami nsambo mpo na kosala yango. Ezali nsambo, nsambo, nsambo. Bomoni? Nsambo ezali—ezali motango ya kosukisa ya Nzambe, pe misato ezali motango oyo ebongi be ya Nzambe. Boye, ezali misato, pe nsambo misato. Boye, na ndenge ya mathématique, na ndenge ya molimo, na nzela na Liloba, na nzela na litatoli ya Molimo Mosantu, yango nyonso esilisi likambo yango na mobimba. Tóyekola yango.

417 Tóbakisa makambo oyo na kondima na biso, na bongo, mpo tókóma na epimelo mobimba ya Klisto; wana tosangani na bolingo ya bonzambe, kobanga Nzambe, limemia na mitema na biso bamoko na bamosusu, limemia ya solosolo bamoko na bamosusu, boboto na bandeko mibali pe basi, makambo ya pamba-pamba ata moke te, eloko mosusu te, bobele bomoi ya peto ya Molimo Mosantu. Bomoni? Kobika elongo, kozala Moklisto. Kotambola na kondima. Tika ete nguya ya Nzambe étiola kati na yo; tika ete boyébi ya Nzambe, soki ekómi likambo ya koyeba mabe ná malam. Ntango zabolo alakisi yo likambo oyo elongobani mpenza na Makomi te, kende mosika na yango. Ya solo.

418 Nakoki kokanisa ete bantoma bazalaki kosala ata moke te lokola biso. Bazalaki kokende bipai na bipai, ntango mosusu

bazalaki koloba mingi te, kino ete bákóma na eteyelo. Bazalaki kokota pe kosala oyo basengelaki kosala, bongo babimaki. Iyo, misie. Bazalaki na bokonzi. Bazalaki na nguya. Bazalaki kowelana na bato te. Bayebaki esika batelemaki. Esili. Bayebaki nani bandimelaki. Bakobaki kotambola na Molimo. Kosala bobele . . .

⁴¹⁹ Kaka ndenge nalobaki na mpokwa mosusu wana. Koningisa motó mwa moke, yango nde nyonso oyo Nzambe asengelaki kosala, na bongo eloko moko te ekokaki kopekisa bango. Bazalaki te kotia ntembe, kotúnatuna, koyimayima pe komitungisa lokola biso, soki basengelaki kosala *oyo to oyo kuna*. Bazalaki kokende liboso pe kosala yango, ata ndenge nini. Nzambe áningisa motó kaka mwa moke, yango ekokaki, na mbala moko. Mpo na nini? Ndenge nini bazalaki koyeba ete Nzambe nde aningisi motó? Bazalaki na ba-nguya nyonso oyo awa, makoki nyonso oyo. Pe kaka mwa koningisa motó ya Nzambe bazalaki kokokanisa yango na nyonso *oyo*, pe na Liloba na Ye. Bazalaki koyeba ete ezali Liloba na Nzambe, pe bazalaki kokende. Bazalaki na ntina ya komitungisa mpo na eloko mosusu te. Na ntango Nzambe alobi, bazalaki kokende. Biso tolobaka . . .

⁴²⁰ Nzambe akoloba na biso, pe biso tolobaka: “Ee, tokobanda. Tokotala soki tokokoka kobika Bomoï oyo.” Na mbala moko, moto moko atungisi yo. Ee, na ntembe te, ezali zabolo.

⁴²¹ Bosengelaki komona ndenge azalaki koluka kosala ete nákóma na liyangani oyo te, na ntongo oyo. Bosengeli kobikela yango mbala moko. Oh, mawa! Nasengeli kobunda ntango nyonso nalakaka liyangani. Pe soki nalingi nábondela mpo na mobeli moko, mpo na moto oyo azali kobunda na liwa kasi abikisami na molimo te, bakobenga ngai na telefone mbala ntuku misato na miníti zomi, soki ekoki koya na lombango bongo, mpo násala yango te. “Oh, Ndeko Branham, osengeli kosala *boye*.” Kasi molimo moko ezali kokufa. Ya solo. Iyo.

⁴²² Na mpokwa mosusu wana, babengisaki ngai na esika moko. Elenge mobali moko, nasololáká na ye awa, bobengaka yango nini, na supermarché, eleki mibu mingi. Akómaki molangwimasanga. Nayebaki elenge mobali yango, elenge mobali malamû, kasi azalaki mosumuki. Na bongo, mama na ye abengaki ngai. Nakanisi abengaki Doc mbala mibale to misato. Ngai . . . Abengaki, pe abengaki Billy, pe—pe sukasuka nazuaki nsango yango. Pe ntango nazuaki nsango yango, na bosembo mpenza, natungisámá naino ndenge wana te na bomoi na ngai, mpo nákóma esika elenge mobali yango azalaki.

⁴²³ Pe ntango nakómaki kuna, elenge mobali yango azalaki lisusu koyeba ngai te. Azalaki wana, alalaki wana, kozanga lisosoli, pe kokóba na bisálásala. Tata na ye azalaki komeka komama ye, pe koloba: “Cheri.” Pe mobali yango azalaki na mibu

ntuku mitano, pene na ntuku mitano na moko. Azalaki koloba: “Cheri,” *oyo*, pe “fanda kimia.” Pe azalaki komeka kotelema. Mwa maboko na ye ekomaki monene penepene *boye*. Elenge mobali yango azalaki na cancer mingi mpenza kino ete nzoto na ye etondaki bobele na cancer. Binamá nyonso ya nzoto na ye ezalaki na cancer. Ata makila na ye ezalaki na cancer, biloko nyonso. Pe azalaki wana, azalaki komeka kotelema, pe kosala bisálá-sala.

⁴²⁴ Nasimbaki ye na loboko, nalobaki: “Woodrow, Woodrow, ezali Ndeko Branham.”

⁴²⁵ Papa na ye alobaki: “Ozali lisusu koyeba ye te? Ezali Ndeko Bill. Woodrow, ezali Ndeko Bill.”

Alobaki: “Ah. Ah. Ah-ah-ah.” Ndenge *wana*.

⁴²⁶ Papa na ye atalaki ngai pe alobaki: “Billy, okómi mwa moke sima na ntango.”

Nalobaki: “Ezali sima na ntango ata moke te. Ye azali awa.” Nautaki kobundisama.

⁴²⁷ Na bongo, bana mibali mosusu, mwa ndambo ya bilenge mibali, basumuki, bazalaki wana, ndambo ya bandeko na ye. Nalobaki: “Bomoni, bilenge mibali, bómilengela, mpo bokokóma na esika oyo. Bosengeli kokóma mpenza wana. Bomoni? Ntango mosusu na—na cancer oyo te. Ntango mosusu ekozala na eloko mosusu, kuna na balabala monene, makila ekosopana wana ozali kobunda na liwa, to eloko mosusu. Bosengeli kokóma wana.” Tosololaki na bango.

⁴²⁸ Nazalaki kozela oyo Molimo alingaki koyebisa ngai ete násala. Nazalaki kozela. Na mbala moko, nayokaki mwa koningisa motó yango. “Tiela ye maboko.”

⁴²⁹ Natambolaki mwa moke, nalobaki: “Bino nyonso bógumba mitó.” Bango nyonso bagumbaki mitó, bilenge mibali mibale to misato bazalaki wana.

⁴³⁰ Natiaki maboko na ngai likolo na ye. Nalobaki: “Nkolo Nzambe, tika ete elenge mobali oyo ázua lisosoli ya koyeba oyo akosala, liboso ete ákutana na likambo yango. Azali kobunda na liwa. Molimo mabe oyo asili kokanga ye, pe azali kokende. Amelaki masanga mingi kino liwa, pe tala lolenge oyo akómi. Nabondeli ete Oyokela ye mawa.” Pe ntango nabondelaki mpo na ye, na ntongo elandaki afandaki, akómaki kosolola ná papa na ye.

⁴³¹ Busty Rogers, moto . . . Babengaki ngai awa na lopitalo, eumeli te. Nazalaki kuna mokolo yango, sima na koteya kuna na Milltown, epai wapi elenge mwasi Georgie Carter abikisamáká. Bino nyonso bozali koyeba yango lisusu. Kuna, ntango Ndeko Smith, motei ya Metodiste, alobaki: “Soki moto moko atikalá kozua libatishi na Nkombo na Yesu Klisto, ábima na hema na ngai,” kaka bongo. Kuna na Totten Ford, ntango azalaki kosala

liyangani wana kuna. Pe, oh, akweisaki ngai na makambo nyonso oyo bokoki kokanisa. Nalobaki ata liloba moko te; nakobaki kaka. Nazalaki na etinda moko. Nkolo alakisaki ngai emononeli moko. Mwana-mpate moko azalaki kuna, akangamaki na esika moko boye na kati ya biliki. Bino nyonso bozali komikanisela emononeli yango, bino nyonso. Nabanzi ete bozali komikanisela yango. Bozali komikanisela yango? [Losambo balobi: “Amen.”—N.D.E.] Na ntembe te. Malamu. Na bongo, nazalaki kotambola na kati ya biliki kuna, mpo na koluka yango.

⁴³² Nakendeki na Totten Ford. Ndeko Wright oyo kuna ayebi yango. Tokendeki kuna, nayebaki eloko ya kosala te. Nasombaki mwa kési ya sabuni, ya centime zomi. Nalingaki kokende kuna, kotelema wana mpo na koteya likolo na ebóngá yango. Ye alobaki ete alingaki komata kuna, na likolo ya ngomba, mpo na kosomba biloko. Nakendeki elongo na ye. Losambo monene, ya kala, ya ba-Batiste ezalaki kuna, moto moko te na kati. Nkolo alobaki na ngai: “Telema wana.”

⁴³³ Nalobaki: “Kitisa ngai awa, Ndeko Wright.” Natelemaki. Ye akobaki komata pe azongaki.

⁴³⁴ Nakendeki kuna, kasi nakokaki kofungola ekuke te. Nalobaki: “Nkolo, soki Ozali kati ya likambo oyo, soki Olingi ete nákota kati na losambo oyo, fungolela ngai ekuke.” Nafandaki wana pe nazalaki kokanisa.

⁴³⁵ Nayokaki moto moko azalaki koya; apusanaki, pe alobaki: “Mbote na yo? Nalobi,” alobaki, “olingi kokota na losambo?”

Nalobaki: “Iyo, misie.”

Alobaki: “Nazali na fungóla awa.”

⁴³⁶ Nabandaki mayangani. Na mpóso ya liboso, eloko ata moko te. Na mpokwa ya liboso, nazalaki na liyangani moko, Ndeko Wright ná libota na ye. Na mbala moko, na suka ya mpóso yango, ata esika ya kotelema na lopango yango ezalaki te. Ata bongo, mwana-mpate yango ayaki kaka te. Ndeko Hall abikisamaki na ntango yango, ye moto azali mokengeli kuna sikawa, ná bango nyonso. Nazalaki kokoka komona esika mwana-mpate yango azalaki te. Sima na mwa ntango, uta na église de Christ, na nse ya ngomba yango, mwana mwasi wana, oyo azalaki kotambola te, na mibu libwa na sanza mwambe, alalaki wana. Azalaki wana. Bino nyonso boyebi lisolo yango. Iyo, misie.

⁴³⁷ Pe na sima ya nzángá wana, ntango Busty Rogers, engambe mobundi ya kala, azalaki wana. . . Nakotaki kuna. Pe bandimi ya losambo ya Ndeko Smith bazalaki wana mpo na koseka ngai, kotiola ngai, ndenge nazalaki kobatisa na Nkombo na Yesu. Nakotaki na mai ya potopoto ya Totten Ford, na esika bazalaki na. . . [Maloba mazangi na bande—N.D.E.] . . . mwa molúká moko ezalaki wana, ezalaki konguluma na makasi nyonso. Basungi mibale to misato bakotaki elongo na ngai.

438 Nalobaki: “Natelemi awa na sima ya nzánga oyo, lokola ntoma ya Makomi Mosantu ya Nzambe.” Nalobaki: “Natangi na Biblia awa, epai Petelo alobaki: ‘Bóbongola mitema, pe bobatisama moko moko na Nkombo na Yesu Klisto mpo na kolimbisama na masumu na bino.’” Nabalukaki, napesaki Buku yango epai ya moko na basungi.

439 Nakotaki kuna, pe nalobaki: “Moto nyonso oyo alingi, oyo abongoli motema mpo na masumu na ye, akoki koya.” Nakotaki kuna na mai. Nalobaki: “Nazali komona lokola ete Banje bafandi na etape moko moko sikawa, pe bazali kotala.” Oh! la la! Ntango nabatisaki bato pene na mibale to misato, losambo na ye mobimba, basi wana, oyo balataki ba-robe kitoko ya swá, bakotaki na mai, bazalaki koganga na mongongo makasi nyonso. Nabatisaki losambo na ye mobimba na Nkombo na Yesu Klisto. Boyebi yango. Nazali na fotó na yango. Esalemaki bongo.

440 Ezalaki nini? Kobakisa na nguya na bino. Bomoni? Bótika yango kimia. Nzambe ayebi ndenge ya kosala yango. Nzambe ayebi lolenge ya kokokisa makambo yango. Tika bango baloba ndenge balingi. Ekosala bokeseni moko te. Bókoba kaka kokende liboso.

441 Busty Rogers azalaki wana, ntango amonaki bongo, alobaki: “Boye nandimi yango na motema na ngai mobimba.” Pe ayaki kotoka na mai, ná bilamba na ye ya kitoko, pe azuaki libatishi na Nkombo na Yesu Klisto.

442 Eleki pene na mibu misato to minei, babengisaki ngai awa na lopitalo na New Albany. Azalaki kuna, azalaki kobunda na liwa, ná cancer, oyo eliaki ye nzoto mobimba. Minganga bapesaki ye kino ntongo elandi, kozala na bomoi. Balobaki: “Alingi kokufa sikawa.” Alobaki: “Yaka noki mpenza.”

443 Nakotaki na chambre yango, sima na yango, natelemaki wana pe nabondelaki. Alobaki: “Billy, monamá moko ezali kozunguluka na litúmú kuna.”

444 Pe nabalukaki mpo na kotala. Nalobaki: “Busty, ezali boyokani. Okokufa te. Boyokani ya Makila ebikisi yo.”

445 Natiaki maboko likolo na ye, nalobaki: “Nkolo Nzambe, emononeli wana etalisi polele ete Ozali awa. Boyokani na Yo elobi boye, ete: ‘Na mapipi na Ye, biso tobikisami na nzoto.’” Natiaki maboko likolo na ye, pe amiyokaki malamú. Babimisaki ye na lopitalo.

446 Pene na mibu minei to mitano, pene na mibu minei, azalaki kolóba mbisi na ebale pe nyonso wana, azalaki malamú. Pe epai cancer ezaláká, pembeni na oesophage ná estomac, ekómaki makasi, esalaki lizita monene moko ya makasi. Minganga, ya kala ya lopitalo yango, bayebisaki ye bazalaki na nkisi moko ya cobalt, oyo ekokaki kobenda yango, mpo ékóma kolekisa bilei mingi na mbala moko. Ekómaki mpasi mpo ália bilei mingi,

asengelaki kolia malembe-malembe. Akendeki kuna mpo na kosalisa yango. Ngai nayebaki te ete azalaki kuna.

⁴⁴⁷ Na bongo, ntango basalaki ye lipaso, bamonaki ete eningisaki ye makasi, pe azuaki monyiki. Akómaki paralizé na ngámbo moko. Pe nyonso oyo akokaki kosala ezali bobele kolela na ngamgo moko. Pe azuaki ekomeli, *boye*, pe azalaki kosala: “ah, ah, ah.” Pe amekaki kokoma, azalaki kolenga *boye*, na loboko na ye ya malamumu. Ngámbo na ye ya mwasi ezalaki paralizé. Ná loboko na ye, akomaki: “Yesu abikisaka, mibu 1900 pe koleka.” Bazalaki kososola yango te.

⁴⁴⁸ Na bongo, mwasi na ye alobaki: “Ndeko Branham, nayebi te soki alingi koloba nini na yango.”

⁴⁴⁹ Nalobaki: “Madame Rogers, oyo alingi koloba ezali ete, esali mibu 1900 koleka, abikisamaki pe abatisamaki na Nkombo na Yesu, kuna. Yango nde ezali na motuya sikawa. Azali kobanga liwa te.”

⁴⁵⁰ Nalobaki: “Nkolo Nzambe, batela bomoi na ye. Nabondeli, na Nkombo na Yesu, ete Óbatela bomoi na ye.” Natielaki ye maboko. Paralizé esilaki. Azalaki lisusu kokangama te. Alamukaki na mbeto. Pe akómá sikawa kotambola, kopesa litatoli.

⁴⁵¹ Bóbakisa na kondima na bino, nguya; bóbakisa na nguya na bino, boyébi; na boyébi na bino, komipekisa; na komipekisa na bino, motema molai; na motema molai na bino, bosantu; na bosantu na bino, bolingo na bandeko; na bolingo na bandeko na bino, Molimo Mosantu, pe Klisto akoya. Mpamba te, bobele na nse na Ye. . . Molimo Mosantu ezali Molimo ya Yesu Klisto kati na Lingomba, mpo na kotalisa ba-nguya wana. Oh! la la!

Ntango ekoki, midí na miníti zomi na mitano.

Nalingi. . . nalingi Ye
Mpo Alingaki ngai liboso,

Na nse *awa*, liboso ete ókóma soki nini.

Pe Aso- . . . (Asalaki nini?) . . . lobiko na ngai
Likolo na Ekulusu.


Ndenge nini nazali *oyo*? Mpo Alingaki ngai liboso.

Nalingi Ye, nalingi Ye
Mpo Alingaki ngai liboso . . . (Yango nde ntina.)
Pe Asombi lobiko na ngai
Likolo na Ekulusu.

⁴⁵² Nalaki Ye, na ntongo oyo, na motema na ngai mobimba, ete, na lisungi na Ye pe na ngolu na Ye, nabondeli ete nakoluka mokolo na mokolo, nakotika te, kino náyoka moko na moko na ba-bosenga oyo kotiola kati na mwa epimelo na ngai ya kala oyo, kino nákóma kotalisama ya Klisto ya bomoi. Mpamba te, Akómaki lisumu lokola ngai, mpo ngai nákoka kokóma. . .

nákóma boyengebene ya Nzambe, lokola Ye. “Azuaki esika na ngai; Nkolo, tika ngai názua oyo ya Ye sikawa.” Mpamba te, yango nde ntina oyo Ye akufaki. Boni balingi kozua mokano ndenge moko wana, na ngolu na Nzambe? [Losambo balobi: “Amen.”—N.D.E.] Wana togumbi mitó sikawa, pe totomboli maboko. “Ngai. . .”

⁴⁵³ Nazui mokano yango, Nkolo, losambo oyo ezui makano yango: “Epimelo mobimba ya Yesu Klisto!”

Mpo Alingaki ngai liboso
Pe asombi lobiko na ngai
Likolo na Ekulusu. 

62-1014M Epimelo Ya Moto Oyo Abongi Be
Branham Tabernacle
Jeffersonville, Indiana U.S.A.

LINGALA

©2015 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamú ya Yesu Klisto. Búku oyo ekoki kotekama te, koyíkanisama te, kotíama na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org